

卷第二十一

治婦人諸病所由第一

《千金方》云：論曰：夫婦人所以有別方者，以其血氣不調，胎妊產生，崩傷之異故也。

所以婦人之病，比之男子十倍難療。若四時節氣為病，虛實冷熱為患者，與丈夫同也。唯懷胎妊挾病者，避其毒藥耳。

又云：女人嗜欲多於丈夫，感病則倍於男子，加以慈戀、愛憎、嫉妒、憂恚、深著堅牢，情不自抑，所以為病根深，療之難瘥。故傅母之徒亦不可不學。

《短劇方》云：古時婦人病易治者，嫁晚，腎氣立，少病，不甚有傷故也。今時嫁早，腎根未立，而產傷腎故也，是以今世少婦有病，必難治也。早嫁早經產雖無病者，亦夭也。

治婦人面上黑方第二

《病源論》云：婦人面上黑者，或臟腑有痰飲，或皮膚受風邪，血氣不調，致生黑。

若皮膚受風外治則瘥；腑腑有飲，內療方愈。

《僧深方》治婦人面方：

取茯苓，治篩，蜜和，以塗面，日四五。

又方：取桃仁，治篩，雞子白和以塗面，日四五。

《經心方》治面方：

取杏仁末和雞子白，敷之一宿，即落。

治婦人面上黑子方第三

《病源論》云：婦人面上黑子者，風邪搏血氣變化所生。

《如意方》去黑子方：

烏賊魚骨 細辛 栝萋 乾薑 蜀椒

分等，苦酒漬三日，牛髓一斤煎黃色，絞以裝面，令白悅，去黑子。（面黑子方詳在上帙四卷。）

#### 治婦人妒乳方第四

《病源論》云：婦人妒乳者，由新產後，兒未飲之，或飲不能泄，或新斷兒乳，捻（都念反，下也。）其乳汁不盡，皆令乳汁蓄結，與血氣相搏，則壯熱大渴引飲，強掣痛，手不得近是也。初覺便以手助將去其汁，並令旁人助引之，不爾成瘡有膿，其熱勢盛則結變成癰。

《短劇方》治妒乳方：

以雞子白和小豆散塗乳房，令冷以消結也。

又方：黃芩 白蘘 夕藥

三物，分等，下篩，以漿服一錢五七，日五服。（《集驗方》同之。）

又云：宜以赤龍皮湯，天麻草湯洗之，敷黃連胡粉膏。

赤龍皮湯：槲樹皮切三升，以水一斗，煮取一斗五升，夏月冷用之，秋冬溫之，分以洗乳。

天麻草湯：天麻草切五升，以水五升，煮取一斗，隨寒溫分洗乳。（今按：《耆婆方》芫蔚一名天麻草。）

《葛氏方》治婦人妒乳腫痛方：

削取柳根皮熟搗，火溫帛裹熨上，冷更易。

又方：梁上塵，苦酒和塗，又治陰腫。

又方：末地榆白皮，苦酒和敷。

又方：白芨、夕藥。酒服方寸匕，又可苦酒和塗之。

又方：鼠婦蟲，以塗之。

又方：車前草搗，苦酒和，塗之。

《產經》妒乳方：

取牛屎燒末，以苦酒和，塗上。

又方：左乳結者，去右乳汁；右結者，可去左乳汁。（《集驗方》同之。）

《集驗方》治妒乳方：

急灸兩手魚際，各二七壯，斷癰脈也。

又方：以雞子白和小豆散塗乳房，令消結也。

又方：取葵莖搗篩，服方寸匕，日三，即愈。

又方：搗生地黃，敷之，熱則易。

## 治婦人乳癰方第五

《病源論》云：婦人乳癰者，腫結皮薄以澤，是為癰也。寒搏於血則澀不通，而氣積不散，故結聚成癰。亦因乳汁蓄結，與血相搏，蘊積而成癰也。乳癰年四十已還，治之多愈；年五十以上，慎，不當治之，多死。乳癰久不瘥，因變為（章俱反）。

《養生方》云：婦人熱食汗出，露乳蕩風，喜發腫，名吹乳，因喜作癰。

《短劇方》治乳癰方：

大黃(二分) 草(二分) 伏龍肝(二分) 生薑(二分)

凡四物，合篩，以薑並舂治，以□（呼雞反）和，塗乳有驗。

《范汪方》治婦人乳癰方：

大黃，治篩，和生雞子，敷腫上，燥複更敷，不過三，愈。

又方：灶中黃土以雞子黃和，塗之。

又方：熬粉水和，敷之。

又方：大黃、鹿角，二物分等，燒鹿角與大黃篩，以雞子白和，貼之。

《僧深方》治乳癰方：

末黃柏，雞子白和，塗之。

又方：搗根，敷之。

又方：赤小豆末，雞子白和，敷之。

又云：治婦人乳癰生核，積年不除，消核防風敷方：

草(八分) 芎(八分) 大黃(十分) 當歸(十分) 防風(十分) 夕藥(十分)  
白蘘(十分) 黃耆(十二分) 黃連(十分) 黃芩(十分) 枳子中仁(四分)  
十一物，治篩，以雞子白和，塗故布若練上，以敷腫上，日四五，夜三。

《千金方》乳癰二三百日，眾療不瘥，但堅紫色方：

柳根削上皮，搗熬令溫，盛囊熨乳上。(《集驗方》云：一宿則愈。)

《醫門方》療婦人乳癰初得令消方：

赤小豆，草各分等，苦酒和，塗上立愈。

《龍門方》治乳熱腫方：

冷石熨之，瘥。

又方：取朱書乳，作魚字，驗。(《范汪方》同之。)

《錄驗方》治乳癰堅如石，眾醫不能治方：

桂心(二分) 烏頭(二分) 甘草(二分)  
凡三物，冶合，淳酢和，塗腫上。

《產經》乳癰符□(用新筆朱書腫上。)

又方：取焦瓦搗碎，和酢，塗之立瘥，乾易。

## 治婦人乳瘡方第六

《病源論》云：此謂膚腠虛，有風濕亦氣，乘虛客之。與血氣相搏，而熱加之，則生瘡。

《范汪方》治乳端生氣出汁痛方：

鹿角(二分，燒) 甘草(一分)

治合，和雞子黃，置暖灰上，令溫，日二敷之。

《醫門方》療乳頭裂破方：

搗丁香，敷之，立瘥。(今按：《崔侍郎方》同之。)

《僧深方》取韭根燒，粉瘡，良。

《集驗方》婦人女子乳頭生小淺熱瘡，搔之黃汁出，浸淫為長。百種治不瘥者，經年月，名為乳病。宜以赤龍皮湯及天麻草湯洗之。敷二物飛烏膏及飛烏散。

飛烏膏方：

用燒朱砂作水銀上黑煙，名汞(胡動反，盧谷反)粉者(三兩) 礬石(三兩，熬令焦)

二物，下篩，以甲煎和之，令如脂以敷乳瘡，日三。作散不須和，有汁有自著者可用散。亦敷諸熱瘡、黃爛、浸淫汁癢瘡、丈夫陰蝕癢濕、小兒頭瘡、月食耳瘡、口邊肥瘡、蝸瘡，悉效。

又云：若始作者，可敷黃連胡粉散，佳。

黃連胡粉膏散方：

黃連(二兩) 胡粉(十分) 水銀(二兩)

凡三物，末黃連，令消，以二物相合，合皮裏熟之，自和合也，縱不成一家，且得水銀細散入粉中也。以敷乳瘡，諸濕癢瘡，若著甲煎，為膏。

## 治婦人陰癢方第七

《病源論》云：婦人陰癢，是蟲食所為，其蟲動作勢微，故令癢，若重者則痛。

《葛氏方》婦人陰若苦癢搔者方：

蛇床草、節、刺，燒作灰，納陰中。

《孟詵食經》治婦人陰癢方：

搗生桃葉，綿裹，納陰中，日三四易。亦煮汁洗之。今按煮皮洗之，良。

《錄驗方》治婦人陰癢方：

枸杞根切一斤，以水三升，煮，適寒溫，洗之即愈。

《僧深方》婦人陰癢方：

黃連 黃柏各二兩，以水三升，煮取一升半，溫洗，日三。

《極要方》陰中及外癢痛方：

大黃(三兩) 甘草(二兩)  
水三升，煮取二升，漬洗，日三。

《集驗方》治婦人陰中癢如蟲行狀方：

礬石(三分，熬) 芎(四分) 真丹砂(少許)  
三物，下篩，以綿裹，納陰中，蟲自死。

## 治婦人陰痛方第八

《病源論》云：婦人陰痛之病，臟虛風邪乘之，沖擊而疼痛而已。

《葛氏方》婦人陰燥痛者方：

煮甘草，地榆，及熱，以洗之。

又方：以鹽湯洗之。

《延齡圖》云：若陰中重痛，灸枳實熨之，良。

## 治婦人陰腫方第九

《病源論》云：陰腫者，是虛損受風邪所為也。

《葛氏方》婦人陰腫痛者：

熬礬石二分，大黃一分，甘草半分炙，末，以綿裹如棗核，以導之。（《延齡圖》同之。）

又方：炙枳實熨之。

《僧深方》陰腫痛方：

黃芩（一分）礬石（一分）甘草（二分）  
下篩，如棗核綿裹，納陰中。

## 治婦人陰瘡方第十

《病源論》云：婦人陰瘡者，由三蟲九蟲動作侵食所為也。諸蟲在人腹內，腸胃虛損。則動作侵食於陰，輕者或癢或痛，重者生瘡也。

《葛氏方》治婦人陰中瘡方：

末硫黃，敷瘡上。

又方：燒杏仁，搗以塗之。

又方：末雄黃熬二分，礬石二分，麝香半分，和末敷之。（《延齡圖》同之。）

《極要方》治婦人陰瘡方：

取桃葉，搗絞取汁，洗之，日三。

《錄驗方》治婦人陰瘡方：

蛇床子（一升，熬）大黃（二分）胡粉（半兩）  
下篩作散，先以溫湯洗，以粉之。

《僧深方》女子陰中瘡方：

裹礬石末，如棗核，納陰中。

《范汪方》婦人陰瘡方：

地榆(二分) 甘草(一分)  
水煮，適寒溫，洗之良

《千金方》婦人陰瘡方：

野狼牙兩把切，以水五升，煮取一升，濕洗之，日五。(今按：《廣濟方》取汁和苦酒煎，塗，洗。)

又云：治男女陰蝕略盡方：

蝦蟆 兔屎  
二味，分等，搗篩，以敷瘡上。(《集驗方》同之。)

《劉涓子方》治婦人陰蝕當歸湯方：

當歸(二兩) 甘草(一兩) 芎(一兩) 夕藥(一兩) 地榆(三兩)  
上五物，以水五升，煮取三升，洗之，日三夜一。

《錄驗方》治婦人男子陰蝕及膿血不禁，男子莖盡入腹中，眾醫所不能治。大黃湯方：

大黃(二兩半) 黃芩(二兩) 黃柏(二兩) 半夏(二兩) 細辛(二兩) 生地黃(二兩) 虎掌(一兩半) 草(一兩半)  
凡八物，以新汲井水一斗，煮取三升，洗瘡，若陰裡病，取練沽湯中著陰道中，時複易，半日，久佳。惡汁盡當止，止濃劇當如針孔，勿怪也。

### 治婦人陰中息肉第十一

《病源論》云：陰內息肉由胞絡虛損，冷熱不調，風邪客之；邪氣乘陰，搏於血氣，變生息肉也。其狀如鼠乳。

《葛氏方》婦人陰中息肉突出者方：

以苦酒三升漬烏喙五枚，三日，以洗之，日夜三四過之。(《延齡圖》同之。)

又方：取豬肝炙熱，納陰中，即有蟲出著肝。

### 治婦人陰冷方第十二

《病源論》云：胞絡勞傷，子臟虛損風冷客之，冷乘於陰，故令冷也。

《千金方》治陰冷令熱方：

納食茱萸牛膽中令滿，陰乾百日，每取二七枚綿裹之，齒嚼令碎，納陰中，良久熱如火。

又婦人陰冷痛方：

灸歸來三十壯，三報，在俠玉泉五寸是也。

《延齡圖》云：療婦人陰冷方：

石硫黃(三分) 蒲黃(二分)

上二味，搗篩為末，三指撮(粗括反)納一升湯中，洗玉門。(當日急熱。)

### 治婦人陰臭第十三

《病源驗》云：陰臭由子臟有寒，寒氣搏於津液，蘊積，氣衝於陰，故變臭也。

《延齡圖》云：療婦人陰臭方：

槲皮(切，一升) 甘草(二兩) 當歸(三兩)

上，以水一斗，煮取三升，去滓，洗玉門內。日二度洗，如冷，加蛇床子並根莖二分。

治女陰寒臭方：

白藪(一分) 桂心(五分) 苦參(一分) 甘草(一分) 附子(一分)

五物，咀，水煮，洗之愈。

### 治婦人陰脫方第十四

《病源論》云：胞絡傷損，子臟虛冷，下脫，亦因產用力，陰下脫也。

《千金方》治下挺出方：

蜀椒(二分) 烏頭(二分) 白芨(二分)  
三味，篩，以方寸七綿裹，納陰中，入三寸，腹中熱，易之。

又治陰脫硫黃散方：

硫黃(二兩) 烏賊骨(二分) 五味子(三銖)  
三味，冶，下篩，以粉其上，良，日再三。

《經心方》陰脫下方：

礬石(雞子大二枚) 鹽(彈丸大一枚)  
二味，以水三升，煮，洗之，自愈。

《葛氏方》治婦人陰脫出外方：

水煮生鐵，令濃，以洗之。礬石亦良。(《僧深方》同之。)

又方：燒螻蛄末，以豬膏和，敷上，蒲黃粉之。

《極要方》陰脫方：取蛇床子熬，布裏熨之。

《僧深方》治婦人子臟挺出蛇床洗方：

蛇床子(一升) 酢梅(二七枚)  
二物，水五升，煮取二升半，洗之，日十過。

《集驗方》治婦人陰中癢脫下方：

取車 膏，敷之，即癢。

《經心方》治婦人陰挺出方：

灸臍中二壯，愈。

## 治婦人陰大方第十五

《延齡圖》云：療婦人陰寬冷，令急小，交接而快方：

石硫黃(二分) 青木香(二分) 山茱萸(二分) 蛇床子(二分)  
上四物，搗篩，為末，臨交接，納玉門中少許，不得過多，恐撮孔合。

又云：治婦人陰令成童女法：

蛇床子(三分) 遠志(三分) 石膽(三分) 山茱萸(三分) 青木香(三分) 細辛(半兩) 桂心(二分)

上七味，搗篩為散，置狗膽中，懸於屋內。陰乾六十日，藥成，搗為末，可丸如棗核大，著婦人陰中，急小而熱，不過三日。

又方：松上女蘿(一分) 石〔(音預)一分〕 石硫黃(一分)

上三味，分等，搗篩為末，納陰中，當日而急小，甚妙。

又方：取石硫黃末，二指撮，納一升湯水中，以洗，陰急小，如十二三女。

《千金方》治陰寬大令連小方：

菟絲子(二分) 干漆(一分) 鼠頭骨(二枚) 雌雞肝(三枚，百日陰乾。)

四味，丸如小豆，初月七日，合時一丸著陰頭，徐徐納之，三日知，十日小，五十日如十三女。

《錄驗方》治女急如童方：

食茱萸(三兩) 特牛膽(一枚) 石鹽(一兩)

搗茱萸下篩，納牛膽中，又納石鹽著膽中，陰乾百日，戲時取如雞子黃末，著女陰中，即成童女也。

## 治婦人小戶嫁痛方第十六

《集驗方》治童女始交接，陽道違理，及為他物所傷。血流離不止方：

取釜底黑，斷葫摩，以塗之。

又方：燒發，並青布末，為粉，粉之，立愈。(《葛氏方》麻油和塗。)

《千金方》治小戶嫁痛方：

烏賊魚骨二枚，燒為屑，酒服方寸匕，日三。

又方：牛膝五兩。一味，以酒五升，煮再沸，去滓，分三服。

《玉房秘訣》云：婦人初交，傷痛，積日不歇方：

甘草(二分) 夕藥(二分) 生薑(三分) 桂心(一分)  
水二升，煮三沸，一服。

### 治婦人陰丈夫傷方第十七

《集驗方》治女子傷於丈夫，四體沉重，虛吸頭痛方：

生地黃(八兩) 夕藥(五兩) 香豉(一升) 蔥白(切，一升) 生薑(四兩) 甘草(二兩，炙，切)

以水七升，煮取三升，分三服，不瘥，重作。

《千金方》治合陰陽輒痛不可忍方：

黃連(六分) 牛膝(四分) 甘草(四分)

三味，水四升，煮二升，洗之，日四。

又女人交接輒血出方：

桂心(二分) 伏龍肝(三分)

二味，酒服方寸匕，日三。(《劉涓子方》同之。)

《玉房秘訣》云：女人傷於夫，陰陽過。患陰腫疼痛欲嘔方：

桑根白皮(切，半升) 乾薑(一兩) 桂心(一兩) 棗(三十枚)

以酒一斗，煮三沸，服一升，勿令汗出當風，亦可用水煮。

### 治婦人脫肛方第十八

《病源論》云：肛門，大腸候也。大腸虛冷，其氣下冲者，肛門反出。亦有因產用力怒體，氣衝其肛，亦令反出也。

《千金方》治脫肛若陰下脫方：

以鐵精敷上，灸布令暖，以熨肛上，漸推納之。

《集驗方》治婦人脫肛若陰下脫方：

蛇床子布裹，灸熨之，亦治產後陰中痛。

### 治婦人月水不調方第十九

《病源論》云：衝任之二經，上為乳汁，下為月水。若冷熱調和，則血以時而下。寒溫乖適，則月水乍多乍少，不調也。

《千金方》治月水不調，或在月前，或在月後，或多，或少。乍去乍來方：

生地黃三斤，酒煮，取二升服之。

又方：地黃酒及大豆酒亦佳。

《極要方》治月水不調方：

以酒服桂末方寸匕，日二。《玄感敷尸方》同之。

《新錄方》治虛憊（蒲釋反，病也），月經一月再至方：

夕藥三十二枚（重一斤，）酒一斗，漬夕藥，令釋濡出，曝之，乾者復納酒中，復曝之，如是令酒盡，燥，搗篩，服方寸匕，日三。

### 治婦人月水不通方第二十

《病源論》云：婦人月水不通者，由勞損血氣，致令體虛，受風冷也。

《千金方》治月水不通方：

葶藶子一升，搗，蜜和，如彈丸三枚，綿裹，納陰中，入三寸，一宿易，有汁出止。

《新錄方》治月水不通方：

麻子，搗絞取汁服，日三。

又方：芎 末，以酒服方寸匕。

又方：桂心一尺，末，以酒服，日三。

又方：當歸，末，酒服方寸匕。

又方：小豆一升，苦酒一斗，煮取三升，服任意多少，立下。

《極要方》療婦人月水不利，血瘀不通，或一月或一歲，令人無子，腹堅如石，亦如妊娠之狀方：

大黃(四兩) 夕藥(二兩) 土瓜根(一兩)  
上，為散，酒服方寸匕，日三，血下，痛即愈。

《葛氏方》治婦人月水不利，結積無子方：

大黃 桃仁 桂心(各三兩)  
搗末，未食，服方寸匕，日三。

又云：或至兩三月、半年、一年不通者：

桃仁(二升) 麻子仁(二升)  
合搗，酒一斗，漬一宿，服一升，日三夜一。

### 治婦人月水不斷方第二十一

《病源論》云：衝任之氣虛損，故不能製其經血，故令月水不改。

《僧深方》治婦人月水不止方：

黃連，治，下篩，以三指撮，酒和服，不過再三。

又方：服淳酢一壺，不瘥，更服。

《撰集要方》治月水不止方：

服蒲黃良。

《千金方》月水不斷方：

灸內踝下白肉際青脈。

### 治婦人月水腹痛方第二十二

《病源論》云：月水來腹痛者，由勞損血氣，體虛受風冷，故令痛也。

《耆婆方》治婦人月節來腹痛血氣方：

防風(二兩) 生薑(六兩) 濃朴(三兩, 炙) 甘草(二兩) 朮(二兩) 枳實(二兩, 炙) 桔梗(一兩)

七味, 切, 以水六升, 煮取一升半, 去滓, 分為三服。

《僧深方》治月經至絞痛欲死茯苓湯方：

茯苓(三兩) 甘草(二兩) 夕藥(二兩) 桂心(二兩)

凡四物, 切, 以水七升, 煮取二升半, 分三服。

《百病針灸》治月水來腹痛方：

灸中極穴, 在臍下四寸。

《廣濟方》治月水來腹痛方：

當歸 甘草(各八兩) 夕藥 茯苓 桂心(各十二分)

以水六升, 煮取二升, 絞去滓, 分溫三服, 服別相去, 如人行六七裡, 忌生冷、海藻。

### 治婦人崩中漏下方第二十三

《病源論》云：崩中之病, 是複損衝脈, 任脈。衝任之脈, 起於胞內, 為經脈之海。勞傷過度, 衝任氣虛, 不統製其經, 故血忽然崩下, 謂之崩中。而內有瘀血, 故時崩時止, 淋瀝不斷, 名曰崩中漏下也。

又云：漏下不止, 致損五臟, 五臟之色, 隨臟不同, 因虛其五色與血而俱下。其狀, 白者如涕, 赤者如紅汁, 黃者如爛瓜汁, 青得如藍色, 黑者如血也。

《短劇方》治婦人崩中, 晝夜十數行, 醫所不能治方：

芎(八兩)

上一物, 以酒五升, 煮取三升, 分三服, 不耐酒者, 隨多少服之。(《千金方》同之。)

又治婦人五崩下赤白青黃黑大棗湯方：

大棗(百枚) 黃耆(三兩) 膠(八兩) 甘草(一尺)

凡四物，以水一斗，煮取三升半，內膠令烊，分三服。今按：《本草》云：甘草一尺者，重二兩為正。

又治漏下神方：

取槐耳，燒，搗，下篩，酒服方寸匕，日三，立愈。(今按：《千金方》：燒子酒服之。)

又治婦人漏下病不斷，積年困篤方：

取鵲重巢柴，合燒末，服方寸匕，日三。鵲重巢者，去年在巢中產，今歲更在其上複作巢是也。(《集驗方》同之。)

又治崩中去血方：

舂生薊根汁一升，溫頓服之，亦可以酒煮，隨意服之。

又方：舂生地黄汁一升，頓溫服之，即止。(已以《千金方》同之。)

《醫門方》治久崩中晝夜不止，醫不能療方：

芎(八分) 生地黄汁(一升)

凡以酒五升，煮取二升，去滓，下地黄汁煎一沸，分三服，相去八九裡。不耐酒者，隨多少，數數服即止，但此二味可單用服之。

《千金方》治婦人漏赤不止，晝夜上氣虛竭方：

龜甲(炙) 牡蠣

二味，分等，為散，酒服方寸匕，日三。

又方：燒亂髮，服方寸匕，日三。

又治五色 下方：

大豆紫湯，日三服，佳。

又方：煮甑 汁服之。

又方：服蒲。

又灸崩中方：

灸小腹橫紋，當臍孔直下，一百壯。

又方：灸關元兩旁，相去三寸。

《葛氏方》治婦人崩中漏下及月，去青黃赤白使無子方：

鹿茸(二兩) 當歸(二兩) 蒲黃(二兩)

搗篩，酒服五分七，日三，加至方寸七。(《錄驗方》同之。)

又方：赤石脂蜜丸，服如梧子三丸，日三。

又方：露蜂房燒末，三指撮，酒服之，良。

《廣利方》治崩中漏下血方：

凌霄花末，溫酒服方寸七，日三，即止。

《僧深方》治崩中方：

桑耳 乾薑(分等)

下篩，酒服方寸七，日四五。

又方：白茅根二十斤，小薊根十斤，搗，絞取汁，煮取五升，服一升，日三四。

《經心方》治長血芎 丸方：

鹿茸(二兩) 當歸(二兩) 蒲黃(二兩) 阿膠(二兩) 芎 (二兩) 白朮(三兩)  
乾地黃(三兩)

凡七物，搗，篩，和丸如大豆，服十丸，日三。

又方：生地黃，蓮根分等，搗，絞取汁，煎，服任意。

龍骨丸治長血方：

龍骨 阿膠(炙) 赤石脂 牡蠣 乾地黃 當歸 甘草(炙，各二兩) 蒲黃(三兩)

凡八物，搗，篩，丸如梧子，服十五丸，日三。

《龍門方》療婦人 下方：

人參(一兩) 茯苓(二兩) 牡蠣(五兩，別研)  
餘者末，和，飲服酒亦得，日再，以瘥為度。

又方：灸臍左右各一寸五分，各三百壯。

《集驗方》治婦人漏下不止散方：

鹿茸(三兩) 當歸(二兩) 蒲黃(一兩) 阿膠(三兩，炙) 烏賊骨(二兩，去甲)  
下篩，為散，酒服方寸匕，日三夜再。(《千金方》同之。)

《蘇敬本草注》云：刮牛黃服之。

《崔禹錫食經》云：海蠲子刮服之。

#### 治婦人下三十六疾方第二十四

《病源論》云：諸方說，三十六疾者，是十二症、九痛、七害、五傷，三固，謂之三十六疾也。十二者，所下之物，一如膏白，二如清血，三如紫汁，四如赤肉，五如膿痂，六如豆汁，七如葵羹，八如凝血，九如清血，血似水，十如米汁，十一如月浣，十二經廢不應期也。九痛者，一陰中痛傷，二陰中淋痛，三小便來即痛，四寒冷痛，五月水來腹痛，月水止則不止，六氣滿崩痛，七汗出，陰中如蟲嚙痛，八脅下引痛，九腰痛也。七害者，一害食，二害氣，三害冷，四害勞，五害房，六害妊，七害睡也。五傷者，一窮孔痛，二中寒熱痛，三少腹急痛，四臟不仁，五子門不正，引背痛。三固者，一月水閉塞不通，其餘二固者，文闕不載。(今按：《千金方》云：三固者，一羸瘦不生肌膚，二絕產乳，三月水閉塞也。七害者，一窮孔痛不利，二中寒熱痛，三少腹急痛，四臟不仁，五子門不端，六浣乍多乍少，七喜吐陽精也。五邪傷者，一兩脅支滿痛，二心痛引脅，三氣結不通，四邪惡泄利，五前後固塞也云云。)

《千金方》白惡丸主婦人三十六疾病各異同。療之方：

白惡(三分) 龍骨(三分) 夕藥(二分) 黃連(二分) 當歸(二分) 茯苓(二分)  
黃芩(二分) 瞿麥(二分) 白藜(二分) 石韋(二分) 甘草(二分) 牡蠣(二分)  
細辛(二分) 附子(二分) 禹余糧(二分) 白石脂(二分) 人參(二分) 烏賊骨  
(二分) 甘皮(二分) 本(二分) 大黃(二分)

二十一味，下篩，蜜丸如梧子，未食服十丸，日二，不知，稍增。服藥，二十

日知，三十日百病悉愈。（今按：《短劇方》有桂心四分、白芷四分，無甘皮、本。）

### 治婦人八瘕方第二十五

《病源論》云：八瘕病者，皆胞胎生產，月水往來，血脈精氣不調之所生也。其八瘕者，黃瘕、青瘕、燥瘕、血瘕、脂瘕、狐瘕、蛇瘕、鱉瘕也。

《千金方》婦人血瘕痛方：

乾薑（一兩） 烏賊魚骨（一兩）  
二味，治，篩，酒服二方寸七，日三。

《錄驗方》治婦人臍下結物，大如杵升，月水不通，發熱往來，下利羸瘦。此為氣瘕也，故生肉瘕，不可治；未生肉瘕，可治。

干漆丸方：

生地黃（三斤，一方二十斤，取汁） 干漆（一斤，熬，搗，篩）  
凡二物，地黃搗，絞取汁；漆治，下篩，納地黃汁中，微火煎令可丸，藥成，酒服如梧子十五丸，當以食後服之。（《葛氏方》同之，《集驗方》服三丸。）

《玄感敷尸方》治血症如四五月身大方：

浸前件二味，五日以後取服，一服一盞，溫服之良。

### 治婦人遺尿方第二十六

《病源論》云：婦人遺尿候，腎虛冷，冷氣入胞，胞虛冷，不能製小便，遺尿也。

《錄驗方》治婦人遺尿方：

礬石（三兩，燒令沸，汗盡） 牡蠣肉（三兩）  
下篩，為散，酒服方寸七，日三。（《集驗方》各二兩。）

### 治婦人尿血方第二十七

《病源論》云：血性得寒則凝澀，得熱則流散，若勞傷經絡，其血虛。熱滲入於胞，故尿血。

《極要方》婦人無故尿血方：

龍骨五兩，為散，空腹，服方寸匕，日三。

《千金方》治婦人無故尿血方：

取其夫爪甲，燒作末，酒服之。

又方：取船故竹茹，曝乾，搗末為散，酒服方寸匕，日三。

《葛氏方》治婦人尿血方：

車前草一斤，水一斗，煮取四升，分四服。

又方：葵根、莖、子，無在，取一升，水四升，煮取一升，納書中白魚蟲十枚，研，服一合。

### 治婦人瘦弱方第二十八

《玄感敷尸方》主婦人年老體漸瘦弱，頭面風腫，骨節煩疼，冷，口乾狀如骨蒸者，是牛膝酒方：

牛膝（一斤） 生地黃（切，三升） 牛蒡（切，曝乾，一斤） 生薑（合皮切，一升） 凡四味，切，於絹袋盛之，以清酒一大升，浸七日，溫服一盞，日三。

### 治婦人欲男方第二十九

《太清經》云：皇帝問素女，對曰：女人年二十八九，若二十三、四，陰氣盛，欲得男子；不能自禁，食飲無味，百脈動體，候精脈實，汁出污衣裳，女人陰中有蟲如馬尾，長三分，赤頭者悶（莫困反，煩也。），黑頭者沫（莫葛反）。

治之方：用面作玉莖，長短，大小隨意，以醬清及二辨，綿裹之，納陰中，蟲即著來出。出復納，如得大夫。其蟲多者三十，少者二十。

### 治婦人鬼交方第三十

《病源論》云：婦人夢與鬼交通者，亦由腑臟氣弱，神守虛衰，致鬼靈因夢而交通也。

《玉房秘訣》云：採女曰：何以有鬼交之病。彭祖曰：由於陰陽不交，情欲深重，即鬼魅假像與之交通，與之交通之道，其有勝於人，久則迷惑，諱而隱之，不肯告人，自為佳，故至獨死而莫之知也。

治之法：但令女與男交而勿瀉精，晝夜勿息困者，不過七日，必愈；若身體疲勞，不能獨御者，但深按勿動亦善。

又方：當以石硫黃數兩，燒以熏婦人陰下體體，並服鹿角末方寸七，即愈矣，當息，鬼涕泣而去。

一方云：服鹿角方寸七，日三，以瘥為度。

《短劇方》別離散治男女風邪，男夢見女，女夢見男，悲愁憂患，怒喜無常，或半年，或數月，日複發者方：

楊上寄生（三兩）朮（三兩）桂肉（一兩一方三兩）茵芋（一兩）天雄（一兩，炮）根（一兩）薊根 菖蒲（一兩）細辛（一兩）附子（一兩，炮）乾薑（一兩）

凡十物，合搗，下篩，酒服半方寸七，日三。合藥勿令婦人，雞犬見之。又無令見病者，病者家人見合藥，知藥者，令邪氣不去，禁之，為驗。

《千金方》治婦人忽與鬼交通方：

松脂（二兩）雄黃（一兩）

二味，先煇松脂，乃納雄黃末，以虎爪絞令相得。藥成取如雞子中黃，夜臥以著熏籠中，燒令病患自升其上，以被自覆，唯出頭，勿令過熱，及令氣得泄也。

《玄感敷尸方》主婦人患骨蒸者，多夢與鬼夫交接。為之方：

雄黃（一兩，破）虎爪（一枚，末）沉香（一兩，末）青木香（一兩，末）松脂（二兩，破）

凡五味，合，和以蜜丸，丸如彈丸，納火籠中，以熏陰，夜別一度，大良。

《短劇方》云：婦人欲斷生方：

故布方圓一尺，燒作屑，以酒飲之，終身不生產。

《千金方》云：斷產方：

灸右踝上一寸三壯，即斷。

又方：蠶子故布方尺，燒末，酒服之。

## 卷第二十二

## 妊婦脈圖月禁法第一

《產經》云：黃帝問曰：人生何如以成。歧伯對曰：人之始生，生於冥冥，乃始為形，形容無有擾，乃為始收，妊身一月曰胚（芳杯反），又曰胞，二月曰胎，三月曰血脈，四月曰具骨，五月曰動，六月曰形成，七月曰毛髮生，八月曰瞳子明，九月曰穀入胃，十月曰兒出生也。（今按：《太素經》云：一月膏，二月脈，三月胞，四月胎，五月筋，六月骨，七月成，八月動，九月躁，十月生。）

夫婦人妊身，十二經脈主胎，養胎當月不可針灸其脈也，不禁皆為傷胎，複賊母也，不可不慎，宜依月圖而避之。

懷身一月，名曰始形，飲食必精熟暖美，無御大（丈）夫，無食辛腥，是謂始載負也。（《病源論》云：宜食大麥。）

一月足厥陰脈養，不可針灸其經也，厥陰者是肝，肝主筋，亦不宜為力事，寢必安靜，無令恐畏。上肝脈穴，自大敦上至陰廉，各十二穴。又募二穴，名期門；又輸二穴，在脊第九椎節下兩旁，各一寸半。上件諸孔，並不可針灸，犯之致危。

足厥陰肝脈圖（缺）

懷身二月，名曰始膏，無食辛燥，居必靜處，男子勿勞，百節骨間皆病，是謂始藏也。（《病源論》云：勿食辛腥之物，二月之時，兒精成也。）

足少陽膽脈圖（缺）

二月足少陽脈養，不可針灸其經也。少陽者內屬於膽，當護慎，勿驚之。上膽脈穴自竅陰上至環跳，各十三穴，又募二穴，名日月，在期門下五分。又輸二穴，在背第十椎節下兩旁，各一寸半。上件諸穴，並不可犯之。

懷身三月，名曰始胎。當此之時未有定儀，見物而化。是故應見王公、後妃、公主、好人，不欲見僕者、侏儒、丑惡、瘦人、猿猴。無食苗薑兔肉。思欲食果瓜，激味酸菹瓜，無食辛而惡臭，是謂外像而內及故也。

三月手心主脈養，不可針灸其經也。心主者，內屬於心，心無悲哀，無思慮驚動之。

手心主脈圖（缺）上心胞脈穴自中沖上至天府，各八穴。又募一穴，名曰巨闕，在心鳩尾下一寸五分。又輸二穴，在背第五椎節下兩旁各一寸半。上件諸穴，並不可犯也。

懷身四月，始受水精，以盛血脈。其食稻粳，其羹魚雁，是謂盛血氣以通耳目，而行經絡也。

四月手少陽脈養，不可針灸其經也。手少陽內屬上焦，靜安形體，和順心志，節飲食之。

手少陽三焦脈圖（缺）上三焦脈穴自關沖上至消灤，各十二穴。又募一穴，在當臍下二寸，名為石門。又背輸二穴，在脊第十三椎節下兩旁各一寸半。上件諸穴，並不可犯之。

懷身五月，始受火精，以盛血氣，晏起沐浴浣（胡管反）衣，身居堂，必濃其裳。朝吸天光，以避寒殃（於良反）。其食稻麥，其羹牛羊和菜蕒。調以五味，是謂養氣，以定五臟者也。

五月足太陰脈養，不可針灸其經也。太陰者，內屬於脾。無大飢，無甚飽，無食乾燥。無自灸熱大勞倦之。

足太陰脾脈圖（缺）

上脾脈穴自隱白上至箕門，各十二（三）穴。又募二穴，名章門，在季肋端，側臥取之。

又輸二穴，在脊第十一椎節下兩旁各一寸半。上件諸穴，並不可犯之。

懷身六月，始受金精，以成筋骨。勞身無處，出游於野，數觀走犬，走馬，宜食鷲鳥猛獸，是謂變腠理筋細筋，以養其爪，以堅背脊也。

六月足陽明脈養，不可針灸其經也。陽明內屬於脾，調和五味，食甘，甘和，無大飽。

足陽明胃脈圖（缺）

上胃脈自厲兌上至髀關，各十六穴。又募一穴，名中管，在從心蔽骨下以繩量至臍止，即以繩中折之。又輸二穴，在脊第十二椎節下兩旁，各一寸半。上件諸穴，並不可犯之。

懷身七月，始受本精，以成骨髓。勞躬搖肢，無使身安，動作屈伸，自比於猿。居必燥之。飲食避寒，必食稻粳，肌肉，以密腠理，是謂養骨而堅齒也。

手太陰肺脈圖¥pyxfc8.bmp (缺)

七月手太陰脈養，不可針灸其經也。太陰者，內屬於肺。無大言，無號哭，無薄衣，無洗浴，無寒飲之。右肺脈穴自少商上至天府，各九穴。又募二穴，名中府，在兩乳上三肋間陷者中。又輸二穴，在背第三椎節下兩旁，各一寸半。上件諸穴，並不可犯之。

懷身八月，始受土精，以成膚革。和心靜息，無使氣控(極)，是謂(密)腠理而光澤顏色也。

八月手陽明脈養，不可針灸其經也。陽明者，內屬於大腸。無食燥物，無忍大起。

手陽明大腸脈圖¥pyxfc7.bmp (缺)

上大腸脈穴自商陽上至臂，各十四穴。又募二穴，在臍兩旁，各二寸半，右名天樞，左名谷門。又輸二穴，在脊第十六椎節下兩旁，各一寸半。上件諸穴，並不可犯之。

懷身九月，始受石精，以成皮毛，六腑百節莫不畢備；飲醴食甘，緩帶自持而待之，是謂養毛髮多才力也。

九月足少陰脈養，不可針灸其經也。少陰內屬於胃，無處濕冷，無著灸衣。

足少陰腎脈圖¥pyxfc9.bmp (缺)

上腎脈穴自湧泉上至陰谷，各十七穴。又募二穴，在腰目中季肋，本俠脊腠肉前宛宛中，名京門。又輸二穴，在脊第十四椎下兩旁，各一寸半。上件諸穴，並不可犯之。

懷身十月，俱已成子也。時順天生，吸地之氣，得天之靈。而臨生時乃能啼，聲遂天氣，是始生也。

十月足太陽脈養，不可針灸其經也。太陽內屬於膀胱，無處濕地，無食大熱物。

足太陽膀胱脈圖¥pyxfc10.bmp (缺)

上膀胱脈穴自至陰上至扶承，各十六穴。又募一穴，在臍下直四寸，名中極，又輸二穴，在脊第十九椎節下兩旁，各一寸半。上件諸穴，並不可犯之。

## 妊婦修身法第二

《產經》云：凡妊身之時，端心正坐。清虛如一，坐必端席，立不斜住(經)，行必中道，臥無橫變，舉目不視邪色，起耳不聽邪聲，口不妄言，無喜怒憂恚，思慮和順，猝生聖子，產無橫難也。而諸生子有痴、疵、丑惡者，其名皆在其母，豈不可不審詳哉。

又云：文王初妊之時，其母正坐，不聽邪言惡語，口不妄語，正行端坐，是故生聖子，諸賢母宜可慎之。

又云：妊身三月，未有定儀，見物而為化，是故應見王公、後妃、公主、好人。不欲見僂者、儒侏、丑惡、瘁(秦醇反，病也)人、猿猴。其欲生男者，操弓矢射雄雉，乘牡馬走田野，觀虎豹及走馬。其欲生女者，著簪珥施環。欲令子美好者，數視白玉美珠，觀孔雀，食鯉魚。欲令子多智有力者，當食牛心，御大麥。欲令子賢良者，坐無邪席，立無偏行，是謂以外像而內化者也。

《千金方》云：凡受胎三月，逐物變化，稟質未定。故妊身三月，欲得見犀象猛獸，珠玉寶物，欲得見賢人君子，盛德大師，禮樂、鐘鼓、俎豆、軍旅陣設，焚燒名香，口誦詩書，居處簡靜，割不正不食，席不正不坐，彈琴瑟，調心神，和情性，節嗜欲，生子皆長壽無疾。

《養生要集》云：婦人妊身大小，行勿至非常之地，逆產殺人。

又云：婦孕見麋而生兒，其四目。

又云：孕婦三月，不得南向洗浴，胎不安。

又云：婦孕三月，不得南向小便，令兒暗啞。

又云：婦孕三月，不得兩鏡相照，令兒倒產。

《膳夫經》云：妊身勿北向，向其生年上大小便，使母難。

### 妊婦禁食法第三

《養生要集》云：婦人妊身，不得食六畜肉，令兒不聰明。（一云：壞胎。）

又云：勿食豬肝，令胎不生。

又云：勿食兔肉，令子唇缺，亦不須見之。

又云：勿食雞子乾鱈魚，使子多瘡。

又云：勿不得食魚頭，胎損。

又云：食鯉膾，令兒多瘡。

又云：勿食生薑，令子盈指。

又云：勿食乾薑、桂、甘草，令胎消，胎不安。

又云：勿飲冰漿，令胎不生。

又云：勿食杏仁及熱飴，破損傷子。

又云：勿以炙雀並大豆醬食，令胞漏，使兒多。

又云：勿飲酒，多食雀肉，使子心淫精亂。

又云：勿食雀肉，令兒多所欲。

又云：勿食雀肉並雀腦，令人雀盲。

又云：勿食雀並梨子，令子短舌。

又云：麋並梅、李實，食之，使人清盲。

《崔禹錫食經》云：妊身不可食鳩，其子門肥充，病於產難故也。

《朱思簡食經》云：勿食豬肉，令子暗啞無聲。

又云：飲酒醉，令兒癲癩。

《本草食禁》云：妊身食雞肉並糯米，使子腹中多蟲。

《產經》云：女人胎妊時，多食鹹，胎閉塞。

妊身多食苦，胎乃動。

妊身多食甘，胎骨不相著。

妊身多食酸，胎肌肉不成。

妊身多食辛，胎精魂不守。

今按：妊婦不可服藥八十二種，其名目在《產經》。

#### 治妊婦惡阻(側呂反, 病)方第四

《病源論》云：惡阻病者，心中憤憤，頭重眼眩，四肢沉重；懈惰不欲執作，惡聞食氣，欲啖酸果實，多臥少起，世雲惡食，又云惡字是也。乃至三四月日以上，大劇者，吐逆不能自勝舉也。此由婦人本虛羸，血氣不足，腎氣又弱，兼當風取冷太過，心下有痰水，挾之而有娠也，經血既閉，水漬(漬)於臟，臟氣不宣，故心煩憤，氣逆則嘔吐也。血脈不通，經絡痞澀，則四肢沉重，挾風則頭痛眩。故欲有胎，而病惡阻，所謂欲有胎者，其人月水尚來。而顏色肌膚如常，但苦沉重憤悶，不用食飲，不知患所在，脈理順時平和，則是欲有胎也。如此經二月，日後便覺不通，則結胎也。

《產經》云：半夏茯苓湯治妊身阻病，心中憤悶。空煩，吐逆，惡聞食氣，頭重，四肢百節疼煩沉重，多臥少起，惡寒汗出。疲極黃瘦方：

半夏(五兩) 生薑(五兩) 茯苓(三兩) 旋複花(一兩) 橘皮(二兩) 細辛(二兩) 芎 人參(二兩) 夕藥(二兩) 乾地黃(三兩) 澤瀉(二兩) 甘草(二兩) 凡十二物，以水一斗，煮取三升，分三服。若病阻積日月不得治，及服藥冷熱失候，病變客熱煩渴。口生瘡者，除橘皮、細辛，用前胡、知母，各二兩。若變冷下者，除乾地黃，用桂肉二兩。若食少，胃中虛生熱，大行閉塞，小行赤少者，宜加大黃三兩，除地黃，加黃芩一兩，餘藥依方服一劑，得下後消息者氣力冷熱更增，損方調定，即服一劑，陽便急將茯苓丸，令得能食，便強健也。(《短劇方》同之。)

《短劇方》云：茯苓丸治妊身阻病，患心中煩悶，頭重眩目，憎聞飯氣，便嘔逆吐悶顛倒，四肢痿熱。不自勝持，服之即效。要先服半夏茯苓湯兩劑，後將茯苓丸也。

茯苓(一兩) 人參(二兩) 桂肉(二兩) 乾薑(二兩) 半夏(二兩) 橘皮(一兩) 白朮(二兩) 枳實(二兩) 葛根屑(一兩) 甘草(二兩)

凡十物，搗篩，蜜和丸如梧子，飲服二十丸，漸至三十丸，日三。《產經》同之。

《集驗方》云：治妊身二三月，惡阻嘔吐不下食方：

青竹茹(三兩) 生薑(四兩) 半夏(五兩) 茯苓(四兩) 橘皮(三兩)  
凡五物，切，以水六升，煮取二升半，分三服。

又云：治妊身嘔吐不下食，橘皮湯方：

橘皮(三兩) 竹茹(三兩) 人參(三兩) 朮(三兩) 生薑(四兩) 濃朴(二兩)  
凡六物，切，以水七升，煮取二升半，分三服。

《僧深方》云：治婦人妊身惡阻，酢，心胸中冷，腹痛不能飲食，輒吐青黃汁方。用：

人參 乾薑 半夏

凡三物，分等，治下，以地黃汁和丸如梧子，一服三丸，日三。今按：《極要方》云：

各八分，稍加至十丸。《產經》云：人參丸神良。

《醫門方》云：凡妊娠阻病惡食，以所思食任意食，必愈。(今檢：《延齡圖》云：令子聰明賢善端正也。)

## 治妊婦養胎方第五

《僧深方》云：養胎易生丹參膏方：

丹參(四兩) 人參(二分，一方二兩) 當歸(四分) 芎(二兩) 蜀椒(二兩)  
白朮(二兩) 豬膏(一斤)

凡六物，切，以真苦酒漬之，夏天二三日，於微火上煎，當著底絞之，手不得離，三上三下。藥成，絞去滓，以溫酒服如棗核，日三。稍增可加。若有傷，動見血，服如雞子黃者，晝夜六七服之，神良。妊身七月便可服，至坐臥忽生不覺。又治生後餘腹痛也。(今檢：《產經》云：丹參一斤，當歸四兩，芎八兩，白朮四兩，蜀椒四兩，脂肪四斤。云云)

《千金方》云：安胎魚 法：

鯉魚二斤，生者去鱗臟，粳米一斤，石相和作，少著鹽，勿著豉酢，啖之，日別三過，食之滿十個月。

又方：取鯉魚長一尺者，水自沒納鹽煮飲之。

《本草拾遺》云：鯉魚肉主安胎動懷妊身腫煮為湯食。

### 治妊婦悶冒方第六

《短劇方》云：妊身忽悶冒不識人，須與醒，醒復發，亦仍不醒者，名為瘧病。亦號子癩也，亦號冒也。治之方：

急作淡竹瀝汁與之。無淡竹者，桂竹亦善，複宜服治瘧冒葛根湯。

《集驗方》云：妊身恆苦煩悶者，此子煩也。治之方：

時時服竹瀝，隨多少，良。

### 治妊婦胎動不安方第七

《病源論》云：胎動不安者，多因勞役，或觸冒冷熱，或飲食不適，或居處失宜，輕者轉動不安，重者便致傷胎。

《醫門方》云：凡候胎動法：母唇口青者，兒死母活；唇口中青沫出者，子母俱死；口赤舌青沫出者，母死兒活。

又云：夫胎動不安方：

煮好銀，取汁煮蔥羹，服之佳。（今按：《博濟安眾方》：胎動欲墮，腹痛不可忍方：苧根去皮，切一升，銀五兩，上以清酒一升，水一升，煎取一升，溫分四服即止。）

又云：療妊娠腹內冷，致胎動不安方：

乾薑（三兩） 芎（四兩） 艾（二兩）  
水六升，煮取二升半，分二服。

又方：蔥白（切，一升） 當歸（四兩） 清酒（五升）  
煮取二升半，分溫二服，大效。

又云：療妊娠忽被驚愕，胎向下不安，少腹痛連腰。並下血方：

當歸 芎（各八分）阿膠（炙）人參（各六分）大棗（十二枚）艾葉（八分）茯苓（十分）

水七升，煮取二升半，分三服，服之相去八九裡。

《短劇方》云：治妊身腹中冷，胎不安方：

甘草 當歸（各二兩）乾薑（三兩）大棗（十二枚）

凡四物，以水五升，煮取三升，分三服。

又云：治母有勞熱動胎，胎不安，去血。手足煩方：

生甘竹皮（二升）當歸（二兩）芎（一兩）黃芩（半兩）

凡四物，以水一斗，煮竹皮取六升汁，去滓。納煎取三升，分三服。

《葛氏方》云：妊身猝胎動不安，或胎轉搶心，或下血不止方：

蔥白一把，以水煮令蔥熟，飲其汁。（今按《本草》云：某草一把者二兩為正。）

又方：生魚二斤粳米一斤，調作，頓食之。

《集驗方》云：治妊身胎動，晝夜叫呼。口禁唇寒及下利不息方：

已治艾葉一，以好酒五升，煮取四升，去滓，更煎取一升，一服。口閉者，開口灌之，藥下即安。（今檢：《僧深方》云：艾及葉物一者，以二升，為正。）

又云：治妊身二三月至八九月，胎動不安。腰痛已有所見方：

艾葉（三兩）阿膠（三兩，炙）芎（三兩）當歸（三兩）甘草（一兩半，炙）切，以水八升，煮取三升，去滓（滓），納膠，更上火，膠消分三服。

《產經》云：治妊身七八月，腰腹痛，胎不安，汗出逆冷，飲食不下，氣上煩滿。四肢痺強當歸湯方：

當歸(三兩) 夕藥(二兩) 乾地黃(三兩) 生艾(一把) 甘草(一兩) 膠(四兩, 炙) 生薑(一兩) 橘皮(二分)

上八物, 切, 以水一升(斗), 煮得三升, 去滓, 納膠, 令烱, 分四服之。

又云：妊身臨生月胎動不得生方：

桑上寄生(五分) 甘草(二兩) 桂心(五分) 茯苓(五分)

上四物, 以水七升, 煮得二升, 分三服。

《錄驗方》治胎不安生鯉魚湯方：

生鯉魚(一頭, 重五斤) 乾薑(二兩) 吳茱萸(一兩)

凡三物, 切, 以水一升(斗), 兒煮鯉魚五沸, 出魚, 納藥, 煎取三升, 服一升, 日三。

### 治妊婦數落胎方第八

《病源論》云：陽施陰化, 故得有胎。營衛和調, 則經養周之, 故胎得安而能成長。若血氣虛損者, 子臟為風冷所傷, 不能養胎, 所以數墮胎。妊娠而恆腰痛者, 喜墮胎也。

《產經》云治數落胎方：

作大麥豉羹食之, 即安胎。

又方：取母衣帶三寸燒末, 酒服即安。

《錄驗方》云：治妊身數落胎方：

以生鯉魚二斤, 粳米一升, 作 , 少與鹽啖之, 日(月)三過, 食至兒生。

### 治妊婦胎墮血不止方第九

《病源論》云：妊身胎墮損經脈, 故血不止也。瀉血多者致死。

《葛氏方》云：治胎墮血露不盡方：

艾葉(半斤) 酒(四升)

煮取一升, 頓服之。

《極要方》云：治胎墮血不止方：

丹參(十二兩) 酒(五升)  
煮取三升，分三服即止。

又方：阿膠(五兩，炙) 乾地黃(五兩)  
以酒五升，煮取一升半，空腹分再服。(今按：《博濟安眾方》：藥各二兩，酒二升，煎取一升。)

《僧深方》云：生薑，切，五升，以水八升，煮取三升，分三服。

### 治妊婦墮胎腹痛方第十

《病源論》云：此由墮胎之時，餘血不盡，故令腹痛。

《葛氏方》云：治墮胎後心腹致絞痛方：

鼓(三升) 生薑(五兩) 蔥白(十四枚) 酒(六升)  
煮取三升，分三服。

《千金方》云：治落胎後腹痛方：

地黃汁(八合) 酒(五合)  
合煮，分三服。

《僧深方》云：治墮身血不盡去留苦煩滿方：

香鼓一升半，以水三升，煮三沸，滴取汁，納成末鹿角一方寸七，服須與血下煩止。(今檢：《千金方》云麻角一兩。)

### 治妊婦上迫心方第十一

《葛氏方》云：治妊身胎上迫心方：

取弩弦急帶之立愈。

又方：生曲半斤，碎，水和絞取汁三升，分二服。

又方：生艾搗，絞取汁三升，膠四兩，蜜四兩，合煎取一升五合，頓服之。

## 治妊婦漏胞方第十二

《病源論》云：漏胞者，謂妊娠數月，經水時下也，亦名胞阻漏血盡則斃。

《醫門方》云：夫漏胞者，妊娠下血如故，血下不絕，胞乾便死。宜急治方：

生地黃汁一升，酒五合，和煮一沸。分二服。（《廣利方》同之。）

又云：療妊娠下血如月水來，若胞乾，非只殺胎。亦損其母方：

乾薑 乾地黃（各五兩）

末，酒服一匙，日夜三四服，即止。今檢：《集驗方》云：乾地黃四兩，乾薑二兩。酒服方寸匕，日三。

《葛氏方》云：妊身月水不止，名為漏胞。治之方：

阿膠（五兩） 乾地黃（五兩） 酒（五升）

煮取一升半，未食，溫再服。

《千金方》云：妊身血下不止方：

生艾葉一斤，酒五升，煮取二升，分二服。冬用莖。

又方：燒秤錘令赤，納酒中沸定，出錘，飲之。

《集驗方》云：治妊身血下不止。血盡子死方：

乾地黃搗末，以三指撮酒服，不過再三服。

《產經》云：治妊身血出不止方：

乾地黃十兩，以酒三升，煮得二升，分二服，良。

又方：灸胞門七壯，關元左右各二寸是也。

## 治妊婦下黃汁方第十三

《子母秘錄》云：妊娠下黃汁如膠，及小豆汁方：

糯米(一升) 黃耆(五兩)

上二物，切，以水七升，煮取三升，分四服。(今按：《產經》：搗地黃取汁，以酒合煎，頓服之。)

#### 治妊婦頓仆舉重去血方第十四

《錄驗方》云：治妊身頓仆舉重去血方：

取淡竹斷頭，燒中央，以器承取汁一升，飲之。

《僧深方》云：治妊身由於頓仆及舉重去血方：

搗黃連下篩，以酒服方寸七，日三乃止。

又云：取生青竹，薄刮取上青皮，以好酒一升和三合許，一服。

#### 治妊婦猝走高墮方第十五

《產經》云：治妊身婦人猝賁起，從高墮下暴大去血數斗。馬通陽方：

馬通汁(三合，絞取) 乾地黃(二兩) 當歸(二兩) 阿膠(四兩) 艾葉(三兩)  
上五物，切，以水五升，煮得二升半，去滓，納膠，更上火令烊，分三服，大良。(馬通是馬屎。)

#### 治妊婦為男所動欲死方第十六

圖¥pyxfc12.bmp (缺) 《產經》云：治妊身為夫所傷動欲死方：

取竹瀝汁，與飲一升則愈，不瘥，後作。(《千金方》云：立驗。)

《醫門方》云：若因房室下血，名曰傷胞。治之方：

乾地黃十兩，末，酒服方寸七，日三夜一。若腹內冷，加乾黃服之。

#### 治妊婦胸煩吐食方第十七

《產經》云：治妊身胸中煩熱，嘔吐血，不欲食，食輒吐出，用諸藥無利。唯服牛乳則愈方：

牛乳微微煎，如酪煎法，適寒溫，服之多少任意，初服少少，若減之良驗。

### 治妊婦心痛方第十八

《病源論》云：心痛者，多是因風邪痰飲，乘心之經故也。

《葛氏方》云：刮取青竹皮，以水煮令濃，絞去滓，服三升。

《耆婆方》云：高良薑三兩，以水一升半，煮取半升，去滓，分三服。

《千金方》云：燒來二七枚末，以尿服之，立驗。

《僧深方》云：吳茱萸五合，以酒煮三沸。分三服。

### 治妊婦心腹痛方第十九

《產經》云：治妊身心腹刺痛方：

燒棗十四枚，治末，以小便服之，立愈。（《短劇方》同之。）

《短劇方》云：治妊身心腹刺痛方：

鹽燒令赤熟，三指撮，酒服之，立瘥。

### 治妊婦腹痛方第二十

《病源論》云：妊身腹痛者，因風邪入於腑臟所成。

《葛氏方》云：秤錘燒正赤，以著酒中，令三沸，出錘飲酒。

《集驗方》云：赤小豆，東向戶中吞二七枚，良。

《產經》云：蔥白，當歸，切，酒五升，煎取二升半，分再服。

《耆婆方》云：熬鹽令熱，布裹與熨之，乃停。

《千金方》云：生地黄三斤，搗絞取汁，酒一升，合煎減半，頓服。

又方：燒車脂末，納酒中服之。

### 治妊婦腰痛方第二十一

《病源論》云：腎主腰腳，風冷乘之，故腰痛。

《短劇方》云：治妊身腰痛如折方：

大豆三升，以酒三升，煎取二升，服之。

《葛氏方》云：治妊身腰背痛如折方：

末鹿角，酒服方寸匕。

又方：蔥白煮汁，服之驗。

又方：膠、桂各一尺，搗，以酒三升，煮得一升，去滓，盡服。

《醫門方》云：療妊娠猝腰背痛，反覆不得，如折方：

鹿角一枚，五寸截之，燒令赤，納酒二大升中浸之；冷，又燒之。如此數度，便空腹飲此酒，極佳。

《僧深方》云：治妊身腰痛方：

熬鹽令熱，布裹與熨之。

## 治妊婦脹滿方第二十二

《產經》云：治妊身猝心腹拘急痛脹滿，氣從少腹起上沖。心煩起欲死，是水飲，食冷氣所為。茯苓湯方：

茯苓（一兩） 當歸（三兩） 甘草（二兩，炙） 黃芩（一兩） 朮（三兩） 石膏（如雞子一枚） 杏仁（三十枚） 夕藥（二兩） 芒硝（一兩）

上九物，切，以水八升，煮取三升，納芒硝，上火令烊之，服一升，當下水或吐便解。

又云：治妊身腹痛，心胸脹滿不調，安胎當歸丸方：

乾薑（一分） 當歸（二分） 芎（二分） 膠（四分）

上四物，下篩，蜜丸如小豆，服五丸，日三。

## 治妊婦體腫方第二十三

《病源論》云：此由臟腑之間有停水，而妊娠故也。

《錄驗方》云：治妊身體腫方：

生鯉魚一頭，長二尺，完，用水二斗煮取五升，食魚飲汁。

又方：葵子一升，茯苓三兩，下篩，服方寸匕，先食，日三，小便利即止。

《醫門方》云：治妊身四肢煎腫。皮肉拘急方：

常陸根切，一升，赤小豆三升，桑根白皮切，一升，水一斗二升，煮二味取七升，去滓，納小豆煮令熟，然食豆渴飲汁，小便利即瘥。

《千金方》云：治妊身手足皆腫攣急方：

赤小豆(五升) 常陸根(一斤) 滓柒(一斤)  
三味，水三升煮取一升，恆服。

《集驗方》云：小豆五升，好豉三升，以水一斗煮取三升，分上服。

《葛氏方》治婦人妊身之腫方：

大豆二升，酒三升，煮取二升，頓服之。

#### 治妊婦下利方第二十四

《產經》云：治妊身暴下不止腹痛石榴皮湯方：

安石榴皮(二兩) 當歸(三兩) 阿膠(二兩，炙) 熟艾(如雞子大二枚)  
上四物，以水九升，煮取二升，分三服。

又云：治妊身下利赤白種種帶下黃連丸方：

黃連(一兩) 甘草(一兩) 乾薑(二兩) 吳茱萸(一兩) 烏梅(三十枚) 熟艾  
(一兩) 黃柏(一兩)  
上七物，下篩，蜜和丸如梅子，一服五丸，日三。

《醫門方》療妊娠注(治)下利下(不)止或水或膿血方：

熟艾(二兩) 石榴皮 阿膠(炙，各三兩)  
水四升，煮取一升半，分三服。(《集驗方》同之。)

又云：療妊娠利白膿，腹內冷方：

乾薑(四兩) 赤石脂(二兩) 粳米(一升，熬令黃)  
水七升，煮取二升半，分三服。

《千金方》云：白楊皮一斤，水一斗，煮取二升，分三服。

### 治妊婦小便數方第二十五

《病源論》云：腎氣通於陰，腎虛而生熱，熱則小便澀數。

《錄驗方》云：治妊身猝暴小便數不能自禁止方：

桑螵蛸(十四枚)

凡一物，作散，溫酒服，分為再服。(《產經》同之。)

### 治妊婦尿血方第二十六

《病源論》云：尿血者，有熱氣乘於血，血得熱故尿血。

《產經》云：治妊身尿血方：

取其爪甲及發燒作末，酒服之。

又方：龍骨，治下，三指撮，先食酒服，日三。

又方：鹿角屑(一兩，熬，)大豆卷(二兩) 桂心(一兩)  
三味，下篩，酒服方寸七，日三。

《葛氏方》云：治妊身尿血方：

取黍、燒末，服方寸七，日三。

### 治妊婦淋病方第二十七

《病源論》云：妊身之人胞系於腎，腎患虛熱成淋，謂之子淋。

《錄驗方》云：葵子一升，以水三升，煮取二升，分再服，亦切根用之。

《千金方》云：葵子，茯苓一兩為散，水服方寸七，日三。

《醫門方》云：治妊娠患淋，小便澀，水道熱痛方：

車前子五兩，炙，葵子一升，水五升，煮取一升半，分二服。

《產經》云：妊身小便不利方：

葵子一升，榆皮一把，以水二升，合煮三沸，去滓，服一升，日三。

又方：滑石以水和泥於臍中，濃二寸，良。

### 治妊婦遺尿方第二十八

《產經》云：治妊身遺尿方：

取胡燕巢中草，燒末，服半錢匕，水酒無在。

又方：龍骨治末，三指撮，先食酒服，日三。

又方：白藪十分，夕藥十分，治下，酒服方寸匕，日三。

### 治妊婦霍亂方第二十九

《產經》云：治妊身霍亂甘草湯方：

甘草(二兩，炙) 濃朴(三兩) 乾薑(二兩) 當歸(二兩)  
上四味，切，以水七升，煮取二升半，分三服，日三。(今按：《博濟安眾方》  
：藥各一兩，水三升，煎取一升，分三四服。)

《極要方》云：妊娠飲食不銷，成霍亂，心腹痛大吐胸心痰。濃朴湯方：

當歸(四兩) 人參(三兩) 濃朴(三兩) 芎(二兩) 乾薑(二兩)  
以水九升，煮取二升半，分三服，羸人分四服。

### 治妊婦瘧方第三十

《產經》云：恆山(一兩) 甘葛(半兩) 枳子(二兩) 蔥白(四株)  
凡四物，水五升，煮取二升，未發服一升，臨發複服一升，自斷。

《僧深方》云：竹葉一升，細切。恆山一兩，細切。水一斗半，煮竹葉，取七升半，納恆山漬一宿，明旦煮取二升半，再服，先發一時一服，發一服盡，去竹葉納恆山。

《集驗方》云：恆山(二兩) 甘草(一兩) 黃芩(半兩) 烏梅(十四枚，碎) 石膏(八兩，碎，綿裹)

凡五物，切，以酒一升半，水一升半合。漬藥一宿，煮三四沸，去滓，初服六合，複服四合，後服二合，凡三服。(今按：《博濟要方》：恆山二兩，甘草半兩，黃芩三兩，烏梅半兩、石膏半兩，酒一升，浸一宿，煎一數沸，去滓，分三四服。)

### 治妊婦溫病方第三十一

《產經》云：治妊身溫病不可服藥方：

取竹瀝二升，煎之減半，適寒溫服之，立愈，良。

又方：以井底泥塗病處，良。

又方：以人尿塗，隨其痛處，良。

### 治妊婦中惡方第三十二

《產經》云：治妊身中惡，心腹暴痛，逐動胎。少腹急，當歸蔥白湯方：

當歸(四兩) 人參(二兩) 濃朴(二兩) 蔥白(一虎口) 膠(二兩) 芎(二兩)  
上六物，以水七升，煮取二升半，分三服。

又云：吳茱萸酒方：

吳茱萸五合，以酒三升，煮三沸，分三服，良。

### 治妊婦咳嗽方第三十三

《產經》云：治妊身咳逆，若傷寒咳，人參湯方：

人參 甘草(各一兩) 生薑(五兩) 大棗(十枚)  
凡四物，切，以水四升，煮取一升半，分二服，良。

### 治妊婦時病令子不落方第三十四

《千金方》云：灶中黃土水和塗臍，方五寸，乾復塗之。（今檢：《葛氏方》云：塗腹上。）

又方：泔清和塗之，和酒塗並良。（今按：《葛氏方》云：塗腹上。）

《葛氏方》云：取井中泥，泥心下三寸。

### 治妊婦日月未至欲產方第三十五

《短劇方》云：搗知母，和蜜為丸，如梧子，服一丸，痛不止更服一丸。

《崔侍郎方》云：蘆根下土三指撮，酒服之。

《葛氏方》云：灶中黃土末，以雞子白丸如梧子，吞一丸。

### 治妊婦胎死不出方第三十六

《短劇方》云：治月未足，胎死不出。母欲死方：

大豆，醋煮，服三升，死兒立出，分二服之。（《千金方》、《葛氏方》同之。）

又方：好書墨三寸，末，頓服。

又方：桃白皮如梧子大，服一丸，立出。

又方：鹽一升，雞子二枚，和，頓服之。

又方：瞿麥一把，煮令二三沸，飲其汁立產。一方下篩服方寸匕。

《醫門方》云：療胎死腹中不出，其母氣欲絕方：

水銀二兩，吞之，兒立出。

又方：伏龍下土，下篩，三指撮，以酒服即出。

《產經》云：治妊身子死腹中不出方：

取赤莖牛膝根，碎，以沸湯沃之，飲汁，兒立出。

又云：周德成婦懷身八月，狀□緣之，其腹中兒背折，胎死腹中三日困篤方：

取黑大豆一升，熬，以清酒一斗漬之須臾，擇去豆，可得三升汁，頓服即下胎。

### 治妊婦欲去胎方第三十七

《產經》云：治妊身胎二三月欲去胎方：

大麥面五升，以清酒一斗合煮，令三沸，去滓，分五服，當宿不食。服之其子即墮腹中，令母不疾，千金不易。（《千金方》同之。）

《短劇方》云：妊身欲去子方：

栝萋（三兩） 豉（一升） 桂心（三兩）  
凡以水四升，煮取一升八合，分三服。

又方：附子三枚，冶作屑，以好苦酒和，塗右足心即去，大良驗。

又云：婦人得溫病欲去腹中胎方：

取雞子一枚，扣之，以三指撮鹽置雞子中，服之，立出。

又方：取井底泥，手書其腹，立出。神良。

《千金方》云：妊身得病事煩去胎方：

麥一升，末，和蜜一升服之，神效。

《葛氏方》云：或不以理欲去胎方：

斑蝥，燒末，服一枚即下。

《錄驗方》云：煮牛膝根服之。

《如意方》云：去胎術：

以守宮若蛇肝□和塗臍，有子即下，永無複有。

又煮桃根，令極濃，以浴及漬膝，胎下。

《極要方》云：妊娠欲去胎方：

瞿麥(半斤) 桂心(三兩) 蟹爪(一升) 牛膝(五兩)  
上，以水三升，酒五升，煮取一升，分三服。

又云：去胎後血下冲心方：

生薑，切，五升，以水八升，煮取三升，分三服。

醫心方卷第二十二

醫心方卷第二十二背記

治妊婦中蠱方：

《子母秘錄》云：鼓皮燒，冶末，服方寸七，須臾，自呼蠱主姓名。

## 卷第二十三

## 產婦向坐地法第一

《產經》云：按：產家婦人向坐之法，雖有其圖，圖多文繁難詳求用，多生疑惑。故今更撰採其實錄，俱載十二月圖中也，一切所用曉然易解。凡在產者，宜皆依此，且餘神圖無複所用。然此亦不可不解，故以備載例焉。《生經》曰：婦人懷妊十月，俱已成子，宜順天生，吸地之氣，得天之虛，而避惡神，以待生也。

又云：黃帝曰：人生壽命長短吉凶者，皆在其母，初生向，天一八神產乳。為藏胎胞常避之大凶，若不避而犯者，或傷母子；或傷其父；或子雖長，終不全命；或子雖大，必有多病；或子貧賤；或子□罪，或子分離；或子不孝；或子狐獨；或子頑愚。不可不慎。

又云：婦人產乳，先審視十二月神圖，能順天氣，可向日虛月空。知天一日游八神，諸神所在方向，不可互向，大凶。或日虛之上惡神並者，當向天道天德為吉，無咎。今按：十二月圖依繁不取，但避惡神在方，載天氣行日虛、月空、並天道天德等吉地，以備時用也。

正月天氣南行，產婦面向於南，以左膝著丙地坐，大吉也。（即日虛月德地。）又，天道在辛，天德在丁。（是亦吉地）

二月天氣西行，產婦面向於西，以右膝著辛地坐，大吉。（雖無吉神，本書載之。）又，乙丁地無惡神可用之。

三月天氣北行，產婦面向於北，以右膝著癸地坐，大吉。（雖無吉神，本書載之。）又，日虛天道天德在壬，又丁地無惡神，吉也。

四月天氣西行，產婦面向於西，以左膝著庚地坐，大吉。（即日虛月德地。）又，天道在丁，天德在辛。

五月天氣北行，產婦面於北，以右膝著癸地坐，大吉。（無吉神而本書載之。）  
又，乙丁辛地，無惡神可用之。

六月天氣東行，產婦面向於東，以左膝著甲地坐大吉。（即日虛天道地。）  
又，乙辛地無惡神。

七月天氣北行，產婦面向於北，以左膝著壬地坐，大吉。（即日虛月德地。）  
又，天德在癸，天道在辛。

八月天氣東行，產婦面向於東，以左膝著甲地坐，大吉。（雖有日虛月空，又  
□鬼道可忌。）  
又，乙丁辛地無惡神。

九月天氣南行，產婦面向於南，以左膝著丙地坐，大吉。（即日虛天道天德  
地。）  
又，丁癸地無惡神。

十月天氣東行，產婦面向於東，以左膝著甲地坐，大吉。（即日虛月德地。）  
又，天道在癸。又，丁地無惡神。

十一月天氣南行，產婦面向於南，以右膝著丁地坐，大吉。（無吉神而本書  
載之。）  
又，乙辛癸地無惡神。

十二月天氣西行，產婦面向於西，以右膝著辛地坐，大吉。（雖無吉神，本書  
載之。）  
又，乙辛地無惡神。

## 產婦反支月忌法第二

《產經》云：反支者，周來害人，名曰反支。若產乳婦人犯者，十死，不可不  
慎。若產乳值反支月者，當在牛皮上，若灰上，勿令污水血惡物著地，著地  
則殺人。又澆濯皆以器盛之，過此忌月乃止。

年立反支：

年立子反支在申七月產忌；年立丑反支在酉八月產忌；年立寅反支在戌九月  
產忌；年立卯反支在亥十月產忌；年立辰反支在子十一月產忌；年立巳反支  
在丑十二月產忌；年立午反支在寅正月產忌；年立未反支在卯二月產忌；年

立申反支在辰三月產忌；年立酉反支在巳四月產忌；年立戌反支在午五月產忌；年立亥反支在未六月產忌。

年數反支：

女年十三反支七月忌申；女年十四反支八月忌酉；女年十五反支九月忌戌；女年十六反支十月忌亥；女年十七反支十一月忌子；女年十八反支十二月忌丑；女年十九反支正月忌寅；女年二十反支二月忌卯；女年二十一反支三月忌辰；女年二十二反支四月忌巳；女年二十三反支五月忌午；女年二十四反支六月忌未；女年二十五反支七月忌申；女年二十六反支八月忌酉；女年二十七反支九月忌戌；女年二十八反支十月忌亥；女年二十九反支十一月忌子；女年三十反支十二月忌丑；女年三十一反支正月忌寅；女年三十二反支二月忌卯；女年三十三反支三月忌辰；女年三十四反支四月忌巳；女年三十五反支五月忌午；女年三十六反支六月忌未；女年三十七反支七月忌申；女年三十八反支八月忌酉；女年三十九反支九月忌戌；女年四十反支十月忌亥；女年四十一反支十一月忌子；女年四十二反支十二月忌丑；女年四十三反支正月忌寅；女年四十四反支二月忌卯；女年四十五反支三月忌辰；女年四十六反支四月忌巳；女年四十七反支五月忌午；女年四十八反支六月忌未；女年四十九反支七月忌申。

生年反支：

子生女反支正月；亥生女反支二月；戌生女反支三月；酉生女反支四月；申生女反支五月；午生女反支六月；巳生女反支七月；辰生女反支八月；卯生女反支九月；寅生女反支十月；丑生女反支十一月；子生女反支十二月。

日反支：

子丑朔六日反支；寅卯朔五日反支；辰巳朔四日反支；午未朔三日反支；申酉朔二日反支；戌亥朔一日反支。

### 產婦用意法第三

《千金方》云：論曰：產婦雖是穢惡，然將痛之時，及未產已產，並不得令死喪穢家之人來視之，則生難。若已產者，則傷兒。

又云：凡欲產時，特忌多人瞻視。唯三人在旁，待生訖了，仍可告語諸人也。若人眾看之，無不難耳。

又云：兒出訖，一切人及母忌問是男是女。又勿令母看視穢污。

又云：凡產婦慎熱食熱藥，常當識此，飲食當如人肌。

《產經》云：凡婦人初生兒，不須自視。已付邊人，莫問男女。邊人莫言男女也。兒敗。

《短劇方》云：凡婦人產暗穢血露未淨，不可出戶牖至井灶所也。不朝神祇及祠祀也。

#### 產婦借地法第四

《子母秘錄》云：體女子法，為產婦借地百無所忌，借地文：東借十步、西借十步、南借十步、北借十步、上借十步、下借十步，壁方之中，三十餘步。產婦借地，恐有穢污，或有東海神王，或有西海神王，或有南海神王，或有北海神王，或有日游將軍，白虎夫人，橫去十丈；軒轅招搖，舉高十丈；天狗地軸，入地十丈。急急如律令。（入所指月一日即寫一本，讀誦三遍訖，貼在所居北壁正中。）

#### 產婦安產廬法第五

《產經》云：按月之方安產廬吉：正月、六月、七月、十一月作廬一戶，皆東南向，吉。二月、三月、四月、五月、八月、九月、十月、十二月作廬一戶，皆西南向，吉。

凡作產廬，無以棗棘子、鋌戟杖；又禁居生麥稼水樹下，大凶。又勿近灶祭，亦大凶。

#### 產婦禁坐草法第六

《產經》云：鋪草席咒曰：鐵陽鐵陽，非公當是王。一言得之銅，二言得之鐵，母子相共，左王後西王母，前朱雀後玄武，仙人玉女來此護我，諸惡鬼魘，莫近來觸，急急如律令。（誦三遍。）

#### 產婦禁水法第七

《子母秘錄》云：產時貯水咒曰：南無三寶水，水在井中為井水，水在河中為河水，水在盞中為盞水，水入腹中為佛水。自知非真水，莫當真水。以淨持濁以正邪，日游月殺五十一將軍、青龍、白虎、朱雀、玄武、招搖、天狗、

軒轅、女妖，天吞地吞，懸尸閉肚六甲、六甲禁諱十二神王土府伏龍，各安所在，不得動靜，不得妄干，若有動靜，若有妄干，頭破作七分，身完不具，阿法尼阿法尼，毗羅莫多梨婆地利沙呵。

## 產婦易產法第八

《產經》云：妊身垂七月常可服丹參膏，坐臥之間不覺忽生也。以溫酒服如棗核，日三。其藥在妊婦方中。

《葛氏方》云：密取馬□毛系衣中，勿令知耳。

《短劇方》云：馬銜一枚，覺痛時右手持之。

又方：蛇蛻皮頭尾完具者一枚，覺痛時以絹囊盛，繞腰甚良。

《陶景本草經注》云：皮毛以與產婦持之，令易產。

《千金方》云：臨產時必先脫常所著衣，以籠罩頭及口，令致密，易產。神驗。

《子母秘錄》云：易產法：帶飛鳥毛及蜚生蟲。（狀如嚙發。頭上有一角者。）

又方：帶獺皮，吉。

又云：古今方能令產安穩，以湯從心上洗，即平安。

## 治產難方第九

《病源論》云：產難者，凡有數種，或先漏胞去血，子臟乾燥；或子宮宿挾疾病；或觸犯禁忌；或產時未至便即驚動，穢露早下，子道乾澀，婦力瘦弱，皆令產難。凡腹痛腰未痛者，未產，腹腰連痛者，即產也。

《產經》云：夫產難者，胞胎之時諸禁不慎，或觸犯神靈，飲食不節，愁思帶胸，邪結臍下，陰陽失理，並使難產也。賢母宜豫慎之。

《醫門方》云：產難死生候：若母面赤舌青者，兒死母活；唇口青，口兩邊沫出者，子母俱死；面赤舌青沫出者，母死兒活。（《集驗方》同之。）

又云：產婦身重而寒熱，舌下脈青黑及胎中冷者，子母並死矣。

《大集陀羅尼經》神咒：南天乾陀天與我咒句如意成吉，祇利祇利，祇羅針陀施祇羅鉢多悉婆訶。上其咒，令產婦易生，朱書華皮上，燒作灰，和清水服之。即令懷子易生，聰明智慧，壽命延長，不遭狂橫。（本在上易產篇。）

《子母秘錄》云：防產難及運，咒曰：耆利暗羅拔施，羅拔施耆利暗羅河沙呵。

上，臨產預至心，禮簽誦滿千遍，神驗不可言，常用有效。

又云：若以色見我，以音聲求我，是人行邪道，不能見如來。

上，臨產墨書前四句，分為四符，臍上度至心，水中吞之，立隨兒出，曾有效。

又云：古方酥膏，有難產者，或經三日五不日得平安，或橫或豎或一手出或一腳出，百方千計，終不平安。服此酥膏，其膏在孩兒身上立出。其方無比。初服半匙，漸加至一匙，令多恐嘔逆。

好酥（一斤） 秋葵子（一升） 滑石 瞿麥（各一兩） 好蜜（半升） 大豆黃卷皮（二兩）

上六物（味），先用清酒一升，細研葵子，納酥中相和，微火煎，可強半升為度，忌生冷，餘無忌。

《產經》云：產難時，皆開門戶窗、瓮、瓶、釜、一切有蓋之類，大效。

又云：產難時祝曰：上天蒼蒼，下地鬱鬱，為帝王臣，何故不出？速出速出，天帝在戶，為汝著名，速出速出。

又方：〔圖〕（缺）以朱書吞之良。

又方：〔圖〕（缺）燒作灰，以水服即生。

又方：取真當歸，使產者左右手持之即生。一云：用槐子矣。

又方：胡麻油服之即生。

又方：以大麻子二七枚，吞之立生。

又方：取弓弩弦令帶產者腰中，良。

又方：取大豆中破，書左作日字，右作月字，合吞之，大吉。

又方：取夫褲帶燒末酒服，良。

《葛氏方》云：吞大豆三枚。

又方：吞槐子三枚。

又方：蘆根下土三指撮，酒服之。

又方：以水銀如彈丸大，格口納喉中，捧起令下，子立出。

《錄驗方》云：破大豆以夫名字書豆中，合吞之，即出。

《博濟安眾方》：取牛屎中大豆一粒，一片書“父入”字，一片書“子出”字，吞之。

《龍門方》云：取鑿柄入鐵裏者燒末，酒服之，立下。

《短劇方》云：取其父衣以覆井，即出，神良。

又方：小麥二七枚，吞之即出。

又方：出蠶種布三寸，燒作散，酒服方寸七，立出。

又方：酥一合，以酒和服，即出。

又方：燒兔毛末服方寸七，即生。

《僧深方》云：取豬肪煎吞如雞子者(黃歟)一枚，即生；不生，複吞之。

又方：蒲黃大如棗，以井華水服之，良驗。

又方：取灶中黃土末，以三指撮酒服，立生。土著兒頭，出良。(今按：《博濟安眾方》：

加灶突墨。)

又方：滑石末三指撮酒服。

《千金方》云：燒大刀環(戶關反)令熱以酒潑之，取一升服之，救死。(《短劇方》同之。)

《極要方》云：取赤小豆二枚吞之，立兒手持出。

《新錄方》云：葵子二七枚服之。（今檢：《短劇方》：陳葵子三指撮，酒服之。）

《集驗方》云：令夫從外含水著婦口中二七過，立出。

《經心方》云：芎 為屑，服方寸匕，神良。

## 治逆產方第十

《病源論》云：逆產猶初覺腹痛，產時未到，驚動復早，兒轉未竟，使用力產，則令逆也。或觸犯禁忌所為。

《集驗方》云：逆生橫生不出。手足先見方：

其父名書兒足下，即順。

又方：以鹽塗兒足底。又可急搔爪之。

《產經》云：逆生符文𠄎[圖]𠄎pyxf3.bmp (缺)(𠄎[圖]𠄎pyxf4.bmp (缺)以朱書吞之大吉。)

又云：逆生手足先出者方：取三家飯置兒手內即順。

又方：丹書左足下作“千”字，右(右)足下作“黑”字。

《葛氏方》云：鹽以湯和，塗兒 下，並摩婦腹上。

又方：真丹塗兒 下。

又方：取釜月底墨以交牙書兒 下。

又方：丹書左足下作“千”字，右足下作“黑”字。

《短劇方》云：燒兒父手足十指爪甲，治末服之。

又方：取生艾半斤，清酒四升，煮取一升，頓服之，則順生，若不飲酒，用水。

《千金方》云：取三家鹽，熬，塗兒手足立出。

又方：取車輪上土，三指撮服之。

《錄驗方》云：取鹽，真珠各少許，合和，塗兒 下立順。

《新錄方》云：取三家水，服並洗手即順生。

《僧深方》云：熬葵子令黃，三指撮酒服之。

### 治橫生方第十一

《病源論》云：橫生者，產時未到，始覺腹痛，驚動傷損，兒轉未竟，使用力產之，故令橫生。

《產經》云：取春杵頭糠，刮如彈丸，酒服之即順生。

《短劇方》云：栝萋實中子一枚，削去尖者，以水漿吞之，立產。

《葛氏方》云：服水銀如大豆二枚。

又方：取梁上塵，三指撮服之。

又方：燒鐵杵，令赤，納酒中飲之。

又方：燒斧如上。

《集驗方》云：菟絲子，酒若米汁服方寸匕，即出。

又方：車前子服之如上法。

### 治子上迫心方第十二

《病源論》云：子上迫心者，節適失宜，胎動氣逆，故子上迫心，胎下者生。

《短劇方》云：子上迫心方：

取弩弦縛心下即出。

《千金方》云：若子趨後孔者，熬鹽熨之。（《葛氏方》同之。）

《葛氏方》云：子上迫心方，取烏犬血，小小飲之立下。

又云：先出手者，嚼鹽塗兒掌中。

又云：先出足者，以丹書兒左足下作“千”字，右足下作“黑字”，即順生。

### 治子死腹中方第十三

《病源論》云：此或因驚動倒仆，或染溫 傷寒，邪毒入於胞臟，致令胎死。其候當胎處冷為胎已死也。

《短劇方》云：吞水銀二兩，立出。

又方：搗芎，酒服方寸七，神良。

《僧深方》云：取牛膝根兩株，拍破以沸湯潑之飲汁，兒。(立出)

又方：以酒服蒲黃二寸七。

又方：好書墨三寸，末，一頓飲之即下。

《博濟安眾方》：醋煮赤豆，服三升，兒立出。

又方：驗醋一升，格口灌之。

又方：當歸末，酒服方寸七，立出。

《葛氏方》云：以苦酒煮大豆，令濃，漉取汁，服三升，死胎即下。

又方：飲夫小便一升。

《龍門方》云：桃根煮濃，用浴膝下，立出。

《蘇敬本草注》云：伏翼屎灰，酒服方寸七。

《千金方》云：以牛屎塗母腹上立出。

又方：蟻室土三升，熬令熱袋盛 心下，胎即下。(《短劇方》同之。)

又方：葵子(一升) 膠(五兩, 炙)  
水五升, 煮取二升, 頓服之。

《集驗方》云：灶中黃土, 三指撮, 酒服之, 立出。(《短劇方》同之。)

又云：治產難或半生, 或胎不下, 或子死腹中, 或著脊及在草數日不產, 血氣上蕩心。

女面無色氣欲絕方：

煎成豬膏(一升) 白蜜(一升) 淳酒(二升)  
上三味, 合煎, 取三升, 分五服, 極驗。

又云：產難, 子死腹中。又妊兩兒, 一兒死腹中, 一兒活腹中, 死者出。生者安方：

蟹爪(一升) 甘草(二尺, 炙) 阿膠(三兩)  
上三味, 以東流水一斗, 煮取三升, 納膠令烊頓服。不能頓服, 分再服, 藥入即活。(《千金方》同之。)

《產經》云：治子死腹中方：取瞿麥一把, 煮二三沸, 飲其汁立出。一方：治下服方寸匕。

又云：治胎死腹中符文：(此二符以朱書, 吞之即生。)

#### 治胞衣不出方第十四

《病源論》云：有產兒出而胞不落者, 世謂之息胞。由產出而體疲, 不能更用氣, 胞經停之間外冷氣乘之, 則血道澀, 故胞不出。若挽其胞系斷者, 其胞上則斃人。

《產經》云：(胞衣不出時, 吞之立下, 大吉。)

又方：以水煮弓弦, 令少少沸, 飲之一升許。

又方：多服豬肪。

《陶景本草注》云：吞胡麻油少少。

又方：取弓弩弦縛腰。

《葛氏方》云：月水布燒末，以服少少。

又方：末皂莢，納鼻中得嚏，即下。

又方：解發刺喉中，令得嘔之，良。

《僧深方》云：水銀服如小豆二枚。

又方：取夫單衣若巾，覆井立出。

《短劇方》云：小麥，小豆，合煮汁飲，立出。

又方：井中土如梧子大吞之。

《千金方》云：服蒲黃如棗大者。

又方：男吞小豆七枚，女吞十四枚。（《集驗方》同。）

《集驗方》云：牛膝半斤，葵子三升，切，以水七升，煮取三升，分三服。（《醫門方》同之。）

《龍門方》云：取灶中黃土末，著臍中。（今按：《廣濟方》三指撮水服之。）

## 藏胞衣□理法第十五

《產經》云：凡欲藏胞衣，必先以清水好洗子胞，令清潔。以新瓦瓮，其蓋亦新，畢乃以真絳繒裹胞訖，取子貢錢五枚，置瓮底中羅烈，令文上向。乃已取所裹胞盛納瓮中以蓋覆之，周密泥封，勿令入諸蟲畜禽獸得食之，畢，按隨月圖以陽人使理之，掘深三尺二寸，堅築之，不欲令複發故耳。能順從此法者，令兒長生，鮮潔美好，方高心善，聖智富貴也。且以欲令兒有父才者，以新筆一柄著胞上藏之，大吉。此黃帝百二十占中秘文也。且藏胞之人當得令名佳士者，則令兒辨慧多智，有令名美才，終始無病，富貴長壽矣。

又云：一法先以水洗胞，令清潔訖，複用清酒洗胞，以新瓦瓮盛胞，取雞雛一枚，以布若繒纏雞置胞上，以瓦蓋其口埋之。按十二月圖於算多上藏之吉。其地向陽之處，深無過三尺，堅築之，勿令發也，大吉。男用雄雞。女用雌雞。（一說云：如來云：我不殺生，故得壽長，何殺生求壽命？故不疏之。）

又云：數數失子，藏胞衣法：昔禹於雷澤之上，有一婦人悲哭而來，禹問其由，答曰：外家數生子而皆夭死，一無生在，故哀哭也。禹教此法，子皆長壽，無夭失也。取產胞衣善擇去草塵洗之清，作一土人，生兒男者作男像，生兒女者作女像，以絳衣裹土人。先以三錢置新瓮中已，取土人著錢上，複取子胞置錢上，以蓋新甌，令周密封泥之。按算多地上，使兒公自掘埋之，畢，祝曰：一錢為汝領地主，一錢為汝壽領算，一錢為汝領口食，訖，以左足踏之。堅築如上法。（今按：後條兒公者兒父也。）

### 藏胞衣吉凶日法第十六

吉日

《產經》云：正月亥子 二月丑寅 三月巳午寅 四月申酉卯 五月亥酉 六月寅卯辰 七月午 八月未申 九月巳亥 十月寅申 十一月未午 十二月申酉

又云：甲乙生丙丁藏 丙丁生戊巳藏 戊己生庚辛藏 庚辛生壬癸藏 壬癸生甲乙藏忌日

《產經》云：春無以甲乙，夏無以丙丁，秋無以庚辛，冬無以壬癸。上四時忌日，皆惡，不避，身子俱亡。

又云：甲辰、乙巳、丙丁、午未、戊申、戊戌  
上日勿藏胞，淨洗十餘過，置瓮中須待良日乃藏之。

又云：避月十日、二十日、月未盡一日，不可埋胞，大凶。

又云：當避月一日、十一日、二十一日，凶。

又云：避建、除、破、厄、閉日，大凶。

又云：勿以兒生日，令兒不壽。

又云：藏胞以 日，小兒死。（又 日法在《湛餘經》中。）

又云：無以八魁日、複日、伯日、小兒生相克日，皆忌。

### 藏胞惡處法第十七

《產經》云：藏胞陰地，不見日月，若垣壁下，若糞中，水瀆，坑坎之旁，若清溷（胡困反）旁，皆不宜藏之。令兒多氣疾，瘡疥，癰腫也。

藏胞當道中，若四衢對間，令兒婁逢縣官飛官，遇疫疾。藏胞近故井，若社稷旁，塚墓之邊，祠神處所，所居近者，皆令狂痴不壽。

藏胞故器瓦瓮者，兒令五罪，凶。

藏胞火燒之處者，令兒則燒死，凶。

藏胞勿令入蟲蛾草等入者，令兒丑惡，多死瘍瘡病，凶。

藏胞近社祠，若故社處旁，鬼神祭所，令兒魂魄飛揚不具惡夢，奔走如狂。

痴癲，兒脈易驚恐啼，喜見鬼，生惡瘡腫，腸癰。

藏胞勿令犬鼠豬食之，令兒驚螻多疾。

藏胞故垣牆下令兒常病腹腸。

藏胞中道令兒戮死不壽，後無子孫。

藏胞故墳井處，令兒耳目不聰，害孔竅。

藏胞當門戶，令兒痴，失明，暗聾。

藏胞水旁故池處，令兒以為溺死不葬。

藏胞溜中令兒失精明而盲。

藏胞牛蘭若故 窖處，令兒痴。

又云：勿以小兒行年上。（男寅女申為行年上。）又避小兒禍害絕命之地。（天門絕命地，鬼門禍害地。）

## 藏胞衣吉方第十八

《產經》云：夫生之與死，夭之與壽，正在產乳藏胞。凡在產者，豈可不慎。敬神畏天者，典墳之所崇；避難推禍者，諸賢之所務也。是以順天道者昌，逆地理者亡。古之常道也。余以暗塞究搜百家之要，藏胞之道術於此備矣。使產生之場幾得無咎也。

凡欲藏胞胎者，可先詳視十二月圖，算多處者有壽；算少處者不壽。或算多地者忌神並者亦當避之。次取算多亦吉。又既得壽地，其日惡者，待以良日乃埋之，吉。又，雖為壽處，必得高燥向陽之地，能者壽長、智高、富貴無極也。其高燥地者，達近自在無苦。

又云：《經》曰：欲藏產子胞胎者，先視十二月神圖，八神，諸神在方，不可□（至也）犯，犯之咎重，不可不慎。

又云：未□ 子曰，凡欲藏子胞，直就天德月德之地者，子必富貴壽老無疾，最吉之地，故其利萬倍也。若不得天德月德者，天道人道地亦吉，其利百倍。又不得此地者，亦可用反向大吉之地，亦吉利。若雖是吉地，而與惡神並者，不可藏胞，夫言吉地者，謂之無凶。故雖云吉地而與惡神並者，此為凶地，宜慎擇之。今按：藏胞衣法不載月圖。但避八神等所在之凶地，取天德月德等吉方：

正月藏胞衣：丁地吉，年一百，（即天德地；）丑地年百十而月殺並在，亦小兒禍害地，故不成其善，他皆效此。

又，日虛月德在丙，天道在辛。

二月藏胞衣：人門地吉，年九十，（即天德人道地；）天門鬼門雖有吉神而是小兒禍害絕命之地，故不吉；丑地壽多而小兒行年所立之地，故不可犯□（都奚反）凶也。又，乙丁辛地無惡神，可用之。

三月藏胞衣：庚地吉，年九十二，（即天德人道地。）又壬地大吉，（是天道地。）又丁地吉。

四月藏胞衣：辛地吉，年八十，（是天德人道地，）又丁地，（是天道。）

五月藏胞衣：乾地吉，年九十一，（是天德人道地。）又乙辛地無惡神。

六月藏胞衣：壬地吉，年七十八，（是天德人道地。）又乙辛地無惡神。

七月藏胞衣：癸地吉，年七十八，（是天德人道地。）又辛地（天道，）壬地大吉。

八月藏胞衣：艮地鬼門吉，年八十六，（是天德人道地。）又乙丁辛地無惡神。

九月藏胞衣：甲地吉，年八十五，（是天德人道地。）又丙地大吉（天道。）又丁癸地無惡神。

十月藏胞衣：乙地吉，年八十四，（即天德人道地。）又甲地大吉月德。癸地（天道。）丁地無惡神。

十一月藏胞衣：巽地，戶地吉，年百二十，（天德人道地。）又乙辛癸地無惡神。

十二月藏胞衣：丙地吉，年百天德人道地。又乙辛地無惡神。

### 婦人產後禁忌第十九

《千金方》云：論曰：凡婦人，非止臨產須憂，至於產後大須將慎，危篤之至，其在於斯。勿以產時無他乃縱心恣意，無所不犯，犯時微若秋豪，成病於嵩岱，何則？產後之病難治於余病也。婦人產訖，五臟虛羸，唯得將補，不可轉瀉。若其有病，即須快藥。若行快藥，轉更增虛，虛中複虛，危殆甚矣。所以大也。

凡婦人產後百日以來，極須怖懼憂畏，勿浪犯觸是等，犯觸房事彌深，若有所犯，必身反強直猶如角弓反張，名曰褥風，則是其犯候也。若其如此，事同轉燭。凡百女人，宜熟慎之。

凡產後滿百日乃可行房，不爾至死虛羸，百病滋長。慎之慎之。

凡婦人皆患風臍下冷，莫不由此早行房也。

《短劇方》云：夫死生皆有三日也。古時婦人產下地坐草法如就死也。既得生產，謂之免難也。親屬將豬肝來慶之，以豬肝補養五內傷絕也。非慶其兒也。

又云：婦人產後盈月者，以其產生身經暗穢，血露未淨。不可出戶牖，至井灶所也。亦不朝神祇及祠祀也。盈月者，非為數滿三十日，是跨月故也。若是正月產，跨二月，入三月，是跨月耳。

又云：婦人產時骨分開解，是以子路開張，兒乃得出耳。滿百日乃得完合平複也。婦人不自知，唯盈月便雲是平複，合會陰陽，動傷百脈，則為五勞七傷之疾。

《養生志》云：產婦食酢面無色。又云：食梨子傷，閉塞血結不利。

### 治產後運悶方第二十

《病源論》云：運悶之狀，心煩，氣欲絕是也。亦有去血過多，亦有下血極少，皆令運。若產去血過多，血虛氣極，如此而運悶者，但煩悶而已。若下血過少而氣逆者，則血隨氣上掩心，亦令運悶，則煩悶而心滿氣急。二者為異。亦其候。產婦血下多少，則知其應運與不運。凡產時當慎向坐臥。若觸犯禁忌，多令運悶。

《經心方》：治產後忽悶冒汗出不識人者，是暴虛故也。  
取醎醋以塗口鼻，仍置醋於前，使聞其氣，兼細細飲之。此為上法。（今按：  
《子母秘錄》云：如覺運即以醋噴其面，蘇來，即今飲醋。）

又方：破雞子，吞之便醒。

又云：若不醒者可與男子小便，灌口得一升，入腹，大佳。

又云：若與雞子等不醒者，可急與竹瀝汁一升，一服五合。

《千金方》治產後血運，心悶氣絕方：

醎醋一升，和所產血如棗大，服兼面。

又方：大豆熬令煙絕，熱，以清酒一升潑之，承其汁飲之。

《葛氏方》治血氣逆，心煩滿者方：

生竹皮一升，水三升，煮取一升半，分三服。

《產經》治產後心悶，眼不得開方：

赤小豆為散，東流水和，方寸匕服之。

《僧深方》治產後心悶腹痛方：

生地黄汁一升，酒三合，和溫服。（今按：《博濟安眾方》無酒。）

《集驗方》治產後心悶，眼不得開方：

即當頭頂上取發如兩指大，強人牽之，眼即開。

《孟詵方》治產後血運心悶氣絕方：

以冷水面即醒。

《博濟安眾方》云：產後心悶不語煩熱方：

地黄汁（五合）當歸（一兩，末）清酒（五合）薑汁（二合）  
上，童子小便一升和煎去滓，分服。

《子母秘錄》云：產後促迷不醒，唇口冷，已脈絕血青不語，此是暈鬼所出，血氣上冲心方：取醎醋二合，雞子一顆。上，先破雞子於瓮中，煮醋一沸，投醎於雞子中熟攪，與產者頓服之，立定。

### 治產後惡血不止方第二十一

《病源論》云：產傷於經血，其後虛損不復。或勞役損動而血暴崩下，遂淋瀝不斷時來，故謂惡露不盡。

《葛氏方》治產後惡血不除方：

生薑(三斤)

咀，以水一斗，煮取三升，分三服。當下惡血。

《千金方》治產後惡血不盡煩悶腹痛方：

搗生藕，取汁，飲二升，甚驗。

又方：搗地黃汁一升，酒三合，合溫，頓服之。

《短劇方》治產後漏血不息方：

蜂房 故 船竹茹

凡二物，分等，皆燒末以酪及漿服方寸七，日三。

《醫門方》療產後餘血作(疾)痛兼塊者方：

桂心 乾地黃(分等)

末，酒服方寸七，日二三。

又云：療產後血泄不禁止方：

急以乾地黃末，酒服一匙，二三服即止。

《產經》療產後腹中穢汁不盡，腹滿不減。小豆湯方：

小豆五升，以水一斗，煮熟，盡服其汁，立除。

《耆婆方》治產後惡露不盡方：

生薑(一斤) 蒲黃(三兩)

以水九升，煮取三升，分三服，得惡血出即瘥。

《錄驗方》治產後餘血不盡多結成，吳茱萸散方：

吳茱萸(一兩) 薯蕷(二兩)

凡二物，治下篩，酒服方寸七，日三。

## 治產後腹痛方第二十二

《病源論》云：產後臟虛或宿挾風寒，或新解觸冷，與氣相擊搏，恆腹痛。若氣逆上者，亦令心痛胸脅痛也。

《集驗方》治產後腹痛方：

當歸(一斤) 酒(一斗)

煮取七升，以大豆四升熬，酒洗熱豆，去滓，隨多少服，日二。

《葛氏方》治產後腹痕痛方：

末桂，溫酒服方寸七，日三。

又方：燒斧令赤，以染酒中飲之。

《千金方》治產後腹痛不可忍方：

牛膝(五兩) 酒(五升)

煮取二升，分再服，若乾，以酒漬之，然後可煮。

又方：吳茱萸一升，以酒三升，漬一宿，煎得半升，頓服。

又云：治產後腹中如弦，恆堅痛，無聊賴方：

當歸屑二方寸七，納蜜一升，煎之適口，一頓服之。

《產經》治產後腹中絞痛，臍下墜滿方：

以清酒煮白飴，令如濃白酒，頓服二升，不瘥複作，不過三，神良。

《僧深方》治產後餘寒冷，腹中絞痛並上下方：

吳茱萸 乾薑 當歸 芍藥 獨活 甘草(各一兩)  
凡六物，水八升，煮取三升，分三服。

### 治產後心腹痛方第二十三

《病源論》云：產後氣血俱虛，因遇風寒乘之；血氣相擊，隨氣乍上乍下上沖心下攻腹，故令心腹痛。

《產經》治產後腹中虛冷，心腹痛，不思飲食，嘔吐厥逆，補虛除風冷理仲當歸湯方：

甘草(三兩) 當歸(二兩) 人參(一兩) 白朮(一兩) 乾薑(半兩)  
凡五物，水七升，煮取二升半，分三服，神良。

《子母秘錄》治產後心腹痛方：

當歸 芍 芍藥 乾薑(各六分)  
為散，空腹溫酒服一方寸匕，日二。

《耆婆方》治人心腹痛，此即產後血瘀方：

生薑(三斤)  
以水小三升，煮取一升半，分三服，當下血及惡水即愈。

### 治產後腹滿方第二十四

《經心方》治產後腹滿方：

黑豆(一升)  
水五升，煮取三升，澄清，酒五升合煎，取三升，分三服。

《子母秘錄》治產後腹中穢汁不盡，腹滿不減小豆湯方：

小豆(三升)  
以水一斗，煮熟，盡服其汁，立除。

### 治產後胸脅痛方第二十五

《經心方》治產後胸脅及腹壯熱煩滿方：

羚羊角燒為末，以冷水服之。

《廣濟方》治產後心胸中煩悶，血氣澀，肋下妨不能食方：

生地黄汁（一升）當歸（一兩，末）清酒（五合）生薑汁（五合）  
上，和煎三四沸，去滓，溫四五合服之，中間進少食。

## 治產後身腫方第二十六

《病源論》云：夫產傷血勞氣，腠理則虛，為風邪所乘，邪搏於氣，氣不得宣越，故令虛腫。輕浮如吹者，是邪搏於氣，氣腫也。若皮薄如熟李狀，則變為水。

《短劇方》治產後中風冷，成腫欲死方：

取鼠壤四升，熬令熱，以囊貯著腹上，亦著陰上下，使熱氣入腹中良。

《錄驗方》治產後餘痛及血兼風腫方：

真當歸一物切之，以酒一斗，煮取七升，以四升大豆熬令焦，及酒熱（澆熱）豆中，去滓，多少服，日二。

《千金方》治產後風腫面欲裂破者方：

以紫湯一服即瘥，神效。

《經心方》治產後腫滿方：

烏豆一斗，水五升（二斗），煮取五升，以酒五升，煎取五升，分五服。

《子母秘錄》治產後遍身腫方：

生地黄汁一升，酒二合，溫頓飲之。

《產經》治產後諸大風中緩急腫氣百病獨活湯方：

獨活 當歸 常陸 白朮（各二兩）

凡四物，水一斗，煮取四升，服，且覆取汁。

## 治產後中風口噤方第二十七

《病源論》云：產後中風口噤者，是血氣虛而風入於 頰夾口之筋也。

《短劇方》云：大豆紫湯治產後中風困篤。或背強口噤，或但煩熱苦渴，或頭身皆重，或身癢，劇者。嘔逆直視，此皆虛冷濕中風所為也。

大豆三升，熬令極熟，熟自無複聲，豫便器□ 若，以清酒五升，潑熱豆即漉得二升汁，盡服之，溫覆小微汗出身體裁潤則愈。今產後皆依常稍服之，一以防風氣，二則消血結。雲周德成妻妊胎觸盆緣傷折胎，皆死腸腹中，三日困篤，服此酒即瘥。後以治不安亦佳。（今按：《經心方》治產後中風百病。）

又云：產後忽瘖口噤，面青手足強反張者方：

與竹瀝汁一升即醒，中風者尤佳。（今按：勘《葛氏方》多飲。）

《葛氏方》云：若中風，若風瘖，通身冷直，口噤不知人方：

作沸湯納壺中令生，婦以足躡壺上，冷複易之。

又方：吳茱萸一升，生薑五累，以酒五升，煮三沸，分三服。

今按：《錄驗方》乾薑，生薑累數用者，以其一支為累，取肥大者。

《千金方》治產後百病並中風瘖口噤不開，理血止痛獨活紫湯方：

獨活（一斤） 大豆（一斤） 酒（一斗三升）

三味，先以酒漬獨活再宿。若急須，微火煮之令減三升，去滓。別熬大豆極焦，以獨活酒洗大豆，即去滓服一升，日三夜一。

《錄驗方》治產後中風及飲痛方：

當歸（二兩） 獨活（四兩）

凡二物，以水八升，煮取三升，分服一升。

《僧深方》治產後中風口噤方：

獨活（八兩） 葛根（六兩） 甘草（二兩） 生薑（六兩）

四物，水七升，煮取三升，分四服。（今按：《博濟安眾方》：獨活二兩，葛根一兩，甘草一兩，生薑二兩。上以水二升，煎取八合，分五六服。）

《博濟安眾方》產後中風，角弓反側，口不語方：

蒜(二十瓣)

上，以水一升半，煎取五合，灌之，極驗。

《產經》治產後中風，口噤獨活湯方：

獨活(三兩) 防風(二兩) 乾薑(二兩) 桂心(二兩) 甘草(二兩) 當歸(二兩)  
凡六物，以清酒三升，水七升，合煮，取二升半，分三服。

### 治產後柔風方第二十八

《病源論》云：產後柔風者，四肢不收，或緩或急，不得俯仰也。產則血氣皆損，未平復而風邪乘之故也。

《葛氏方》治產後若中柔風，舉體疼痛自汗出者方：

獨活四兩，以清酒二升合煮，取升半，分二服。

《產經》治產後中柔風，身體疼痛獨活湯方：

羌獨活(三兩) 葛根(三兩) 甘草(二兩，炙) 麻黃(一兩) 桂心(三兩) 生薑(六兩) 夕藥(三兩) 乾地黃(二兩)  
凡八物，以清酒二升，水八升，煮取三升，分五服。一方無夕藥。

### 治產後虛羸方第二十九

《病源論》云：夫產損動腑臟，勞傷血氣。輕者節養將攝，盈月便得平復，重者其日月雖滿，氣血猶未調和，故虛羸也。

《千金方》治產後虛羸喘乏，或一寒一熱，狀如虛，名為勞積，豬腎湯方：

豬腎(一具，去脂皮。無，用羊腎) 香豉(一升) 白粳米(一升) 蔥白(切，一升)

四味，以水三升，煮取五升，去滓適性飲之，不瘥重作。

《葛氏方》治產後虛羸，白汗出鯉魚湯方：

鯉魚肉(三斤) 蔥白(一斤) 香豉(一升)  
凡三物, 水六升, 煮取二升, 分再服, 微汗即止。

### 治產後不得眠方第三十

《葛氏方》若產後虛煩不得眠者方：

枳實, 夕藥分等並炙之, 末, 服方寸七, 日三。

### 治產後少氣方第三十一

《醫門方》療產後少氣, 無力困乏虛煩者方：

人參 茯苓(各十分) 甘草(炙) 桂心 夕藥(各八分) 生麥門冬(去心) 生地黃(各二十分)  
水九升, 煮取三升, 分三服。

### 治產後不能食方第三十二

《子母秘錄》云：產後諸狀亦無所異, 但若不能食方：

白朮(四兩) 生薑(六兩)  
上二味, 細切, 以水酒各三升, 暖火煎藥, 取一升半, 絞去滓, 分溫再服, 許仁則與女。

《博濟安眾方》產後嘔逆不能食方：

濃朴(二兩, 炙) 白朮(一兩, 炒)  
上, 以水二升, 煎取一升, 分四五服。

### 治產後虛熱方第三十三

《病源論》云：產腑臟勞傷, 血虛不複, 而風邪乘之; 搏於血氣, 使氣不宣泄, 而痞澀生熱, 或肢節煩憤, 或唇乾燥, 但因虛生熱, 故謂之虛熱。

《葛氏方》治產後煩熱, 若渴或身重癢方：

熬大豆, 酒淋及熱, 飲二升, 溫覆取汗。

《千金方》治產後虛熱頭痛方：

白芍藥(五兩) 桂心(三兩) 乾地黃(五兩) 牡蠣(五兩)  
四味，以水五升，煮取二升半，分三服。

### 治產後渴方第三十四

《病源論》云：婦人以腎系胞，產則血水俱下，傷損腎與膀胱之氣，津液竭燥，故令渴。

《醫門方》療產後大渴不止方：

蘆根(切，一升) 栝藎(三兩) 人參 甘草(炙) 茯苓(各二兩) 生麥門(各四兩，去心) 大棗(十二枚)  
水九升，煮取三升，分三服。

《子母秘錄》云：產後渴方：

新汲水和蜜飲之，仍不論多少季，溫與大新婦服之。

### 治產後汗出方第三十五

《病源論》云：凡產後皆血虛，故多汗。

《錄驗方》治產後虛勞，汗出不止牡蠣散方：

牡蠣(二兩) 乾薑(二兩) 麻黃根(二兩)  
凡三物，治篩，雜白粉，粉身，不過三四便止。

《千金方》治產後虛羸，盜汗，時邑邑惡寒方：

吳茱萸(如雞子大)  
一味，以酒三升浸之半日，煮得二升，頓服一升，日再。間日飲之。

《子母秘錄》治產後汗出不止，兼腹痛虛乏勞方：

通草 芍藥 當歸(各三兩) 生地黃(切，一升)  
上四味，切，以水六升，煮取二升半，去滓，分溫三服。(今按：《博濟安眾方》：芍藥，當歸各一兩，生地黃切半升。上，水二升，煎取一升，分服。)

### 治產後無乳汁方第三十六

《病源論》云：婦人手太陽少陰之脈，下為月水，上為乳汁。經血不足者，故無乳汁。

《葛氏方》云：凡去乳汁，勿置地，蟲蟻食之，令乳無汁，可以潑東壁上。

又云：治產後血乳無汁者方：

燒鵲巢末，三指撮，酒服之。

又方：末蜂房，服三指撮。

《短劇方》下乳散方最驗。

鐘乳(五分) 通草(五分) 漏蘆(二分) 桂心(二分) 栝萐(一分) 甘草(一分)  
凡六物，搗篩，飲服方寸七，日三。

又方：石膏三兩，以水三升，煮三沸，一日飲，令盡，良。

《集驗方》治乳無汁方：

取栝萐根切一升，酒四升，煮三沸，去滓，服半升，日三。

《經心方》治婦人無乳汁方：

赤小豆三升，煮取汁，頓服之。

又方：搗韭一把，取汁服，冬用根。

《千金方》治乳無汁方：

取母豬蹄一具粗切，以水二升，煮飲汁，不出更作。

又方：燒鯉魚頭，末，酒服三指撮。

《僧深方》治乳不下方：

取生栝萐根，燒作炭，治下篩，食已，服方寸七，日四五服。

又方：治下栝萐，乾者為散，勿燒，亦方寸七，井華水服之。

《醫門方》療乳無汁方：

母豬蹄(二枚，切) 通草(六兩，綿裹)

和煎作羹食之。

(今按：《廣利方》云：母豬蹄一具，通草十二分，切，以水大四升，煎二大升，去滓，食後服一盞，並取此汁，作羹粥煎得。《千金方》：母豬蹄一具，粗切，以水二升，煮飲汁，不更作。)

《枕中方》治婦人無乳汁方：

取母衣帶，燒作灰，三指撮，酒服，即多汁。

### 治產後乳汁溢滿方第三十七

《病源論》云：經血盛者，則津液有餘，故乳汁多而溢出。

《葛氏方》云：乳汁溢滿急痛者，但溫石以熨之。

又云：若因乳兒汁出不可止者，燒雞子黃食之。

### 治產後妒乳方第三十八

《子母秘錄》云：產後妒乳，因乳汁不時泄，蓄積於內，遂成癰腫，其名妒乳；此甚急於癰疽，治之亦同癰結也。

《產經》云：凡產後婦人宜勤泄去乳汁，不令蓄積，蓄積不時泄，內結□（尺製反）痛發渴，因成膿也。

又云：治妒乳腫方：

車前草熟搗，以苦酒和塗之。

《短劇方》治妒乳方：

生地黄汁以敷之。

又方：葵根搗為末，服方寸匕，日三。

《華佗方》治妒乳方：

生蔓荊根，和鹽搗漿，水煮合，日五服，或滓封之。

《葛氏方》治妒乳方：

梁上塵，醋和塗之。亦治陰腫。

又方：榆白皮，搗醋和封之。

### 治產後陰開方第三十九

《病源論》云：子臟宿虛，因產冷氣乘之，血氣得冷不能相榮，故令開也。

《千金方》治產勞玉門開而不閉方：

硫黃(四兩) 菟絲子(五分) 吳茱萸(六分) 蛇床子(四分)  
四味，搗，下篩，為散一升，以方寸匕投湯中洗玉門，日再。

又云：治產後陰道開不閉方：

鍛石(一升，熬之令能燒草)

一味，以水二升，投中，適寒溫入汁中坐，漬之，須臾，複常。此是神方，秘不傳。已治人驗。(今按：《醫門方》鍛石一斗，水二斗，澄取一斗三升。)

### 治產後陰脫方第四十

《病源論》云：產陰脫者，由宿有虛冷。因產用力過度，其氣下沖，則陰下脫也。

《產經》：治產後陰脫下痛方：

取蛇床子搗末，布囊盛之，灸令熱熨陰，大良。

《短劇方》治產後陰脫方：

以鐵精敷上多少，令調，以火灸布，令暖，熨肛上漸納之。

又方：用鰲血，燒地令熱，血著上，使病患坐之良。

《千金方》治產後陰下脫方：

熬鍛石，綿裹，坐其上。冷即易之。

又方：灸臍下橫紋中二七壯。

《極要方》治產後陰脫方：

硫黃(二分) 烏賊魚骨(三分) 五味子(三銖)  
為散，粉陰上，日三。

《廣濟方》療產後子臟挺出數寸痛方：

蛇床子(一升) 酢梅(二七枚)  
切，以水五升，煮取二升半，洗，日夜十度。

#### 治產後陰腫方第四十一

《病源論》云：產氣宿虛，因產風邪乘於陰，邪與血氣相搏；在其腠理，故令痛，血氣為邪所壅否，故腫也。

《錄驗方》治產後陰腫痛方：

取鼠壤四升，熬令熱，以囊貯置陰上，使熱氣入中，良。

《千金方》治產後陰腫痛方：

熟搗桃仁敷之。

#### 治產後陰癢方第四十二

《產經》治產後陰中如蟲行癢方：

枸杞(一斤)  
以水三斗，煮十沸，適寒溫，洗之，良。

又方：煮桃葉若皮洗之。

又方：燒杏仁作灰，綿裹納陰中，良。

#### 治產後小便數方第四十三

《病源論》云：胞內宿有冷。因產氣虛而冷發動，冷熱入胞，虛弱不能製其小便，故令數也。

《短劇方》治產後小便數方：

取衣書中白魚蟲三十枚末之，以綿裹納陰中，良。

《廣濟方》療產後小便不禁方：

取雞毛燒作灰，酒服方寸七，日三。

#### 治產後遺尿方第四十四

《病源論》云：因產用氣，傷於膀胱，而冷氣入胞囊，胞囊決漏，不禁小便；故遺尿多因產難所為也。

《短劇方》治產後遺溺不知出時方：

白薇(二分) 夕藥(二分)

凡二物，搗篩，酒服方寸七，日三。

又方：取胡燕巢中草燒末，服半錢七，水酒無在。亦治男子。

又方：取礬石、牡蠣分等，下篩，酒服方寸七，日三。

《產經》：治產後遺溺方：

龍骨末，以酒服方寸七，日三。

又方：夕藥末，以酒服方寸七，日二夜一。

#### 治產後淋病方第四十五

《病源論》云：因產虛損，而熱氣客胞內，虛則起數，熱則澀少，故成淋。

《子母秘錄》云：產後淋方：

滑石(五分) 通草 車前子 葵子(各四分)

上四味，搗篩，以醋漿服方寸七。

#### 治產後尿血方第四十六

《病源論》云：產傷損血氣，血氣則虛而挾於熱，熱搏於血，血得熱流散滲於胞，故血隨尿而出，為尿血也。

《產經》云：治產後澀有血不盡，已服朴硝煎宜服此蒲黃散方：

蒲黃(一升) 生薊葉(曝令乾，成末，二升)  
凡二物，治，下篩，酒服方寸匕，日三。

#### 治產後下利方第四十七

《病源論》云：產後虛損未復而早起，傷於風冷，風冷乘虛入於大腸，腸虛則泄，故令利也。產後利，若變為血利則難治。

《產經》云：理中湯主之：

乾薑 人參 白朮 甘草(各二兩)  
以水六升，煮取三升，分三服。

又方：藥各一兩，水三升，煮取一升半，分二服。

《極要方》云：產後諸痢方：

宜煮薤白食之，唯多為好。(今按：《子母秘錄》云：許仁則方。)

《醫門方》療產後利不禁止，困乏氣欲絕，無問赤白水穀方：

黃連 濃朴(各三兩) 艾葉 黃柏(各二兩)  
水六升，煮取二升，去滓，分二服。

《子母秘錄》云：產後痢，諸病無不效方：

黃連(一升) 烏梅肉(三兩，擘) 乾薑(二兩)  
上三物，搗篩，蜜丸如梧子，一服二十丸。

#### 治產後月水不調方第四十八

《病源論》云：產傷動血氣，虛損未復而風邪冷熱之氣客於經絡，乍冷乍熱，冷則血結，熱則血消。故令血或多或少，乍在月前，或在月後，為不調也。

《子母秘錄》云：產後月水閉，乍在月前，或在月後，腰腹痛，手足煩疼，唇口乾，連年月水不通，血乾著脊，牡丹丸方：

苦參(十分) 牡丹(五分) 貝母(三分)

上三物，搗篩，蜜丸如梧子，先食以粥清汁，服七丸，日三。

#### 治產後月水不通方第四十九

《病源論》云：產後虛損未復，為風冷所傷。故令月水不通。

《葛氏方》云：產後月水不通方：

桂心為末，酒服方寸匕。

又方：鐵杵錘燒，納酒中，服之。

《子母秘錄》云：產後月事不通方：

濃朴皮三大兩，以水三大升，煮取一升，分三服。空腹服之，神驗。

#### 治產後生瘡方第五十

《錄驗方》治產後匝身生瘡，狀如灼瘡，熱如火方：

桃仁，搗，和以豬膏，敷瘡上，日二三過，便愈。

醫心方卷二十三

醫心方卷二十三背記

右□□（左右符俱以朱書之。）

東借十步西借十步

南借十步北借十步

上借十步下借十步

壁方之中四十餘步

產婦借地恐有穢污

或有東海神王

北壁或有西海神王

或有南海神王

或有北海神王

或有日游將軍

白虎夫人橫去十文

軒轅招搖舉高十丈

天狗地軸入地十丈

急急如律令

以上第七葉

## 卷第二十四

## 治無子法第一

《病源論》云：婦人無子，其事有三也。一者墳墓不嗣，二者夫婦年命相克，三者夫病婦疾，皆使無子。其若是墳墓不嗣，年命相克，此二者，非藥能益。若夫病婦疾，須將餌，故得有效也。然婦人挾無子，皆由勞傷血氣，冷熱不調。而受風寒，客於子宮，致胞內生疾。或月經澀閉，或崩內帶下，致陰陽之氣不和，經血之行乖候，故無子也。

又云：男人無子者，其精清如水，冷如鐵，皆無子。

又云：瀉精，精不射出，俱聚在陰頭，亦無子也。

《千金方》云：凡人無子，當夫妻俱有五勞七傷所致。治之法，男服七子散，女服紫石門冬丸。

七子散方：

五味(八分) 牡荊子(八分) 菟絲子(八分，漬酒三宿) 車前子(八分) 蒜子(八分) 薯蕷(八分) 石斛(八分) 乾地黃(八分) 杜仲(八分) 鹿茸(八分) 遠志(八分) 附子(六分，炮) 蛇床子(六分) 芎(六分) 山茱萸(五分) 天雄(五分，炮) 人參(五分) 茯苓(五分) 黃耆(五分) 牛膝(五分) 桂心(十分) 巴戟天(三兩) 菴蓉(七分) 鐘乳(二兩)

凡二十四味，酒服方寸匕，日二，以知為度，禁如法。不能酒者，蜜丸服。

紫石門冬丸方：

紫石英(三兩，七日研之，少得上浮即熟) 天門冬(三兩) 當歸(八分) 芎(八分) 紫葳(八分) 卷柏(八分) 桂心(八分) 烏頭(八分) 牡蒙(八分) 乾地黃(八分) 石斛(八分) 禹余糧(八分) 辛夷心(八分) 人參(五分) 寄生(五分) 續斷(五分) 細辛(五分) 濃朴(五分) 乾薑(五分) 食茱萸(五分) 牡丹(五分) 牛膝(五分) 薯蕷(六分) 烏賊骨(六分) 甘草(六分) 柏仁(四分)

凡二十六味，搗篩，蜜和，酒服如梧子十丸，日三，漸增至三十丸，以腹中熱為度，禁如藥法。比來服者，皆不至盡劑即有身。

《僧深方》：慶雲散治大(丈)夫陽氣不足，不能施化，施化無所成方：

天門冬(九兩，去心) 菟絲子(一升) 桑上寄生(四兩) 紫石英(二兩) 覆盆子(一升) 五味子(一升) 天雄(一兩，炮) 石斛(三兩) 朮(三兩，熬，令反色)

素不耐冷者，去寄生，加細辛四兩。

凡九物，冶合，下篩，以酒服方寸匕，先食日三。陽氣少而無子者，去石斛，加檳榔十五枚。

承澤丸 治婦人下焦三十六疾不孕育及絕產方：

梅核(一升) 辛夷(一升) 本(一兩) 澤蘭(十五合) 溲疏(一兩) 葛上亭長(七枚)

凡六物，治，下篩，和以蜜丸如蜚豆，先食服二丸，日三，不知稍增。

《極要方》療無子不受精，精入即出，此子門閉也：

山茱萸(一兩) 酸棗(二兩) 柏子仁(二兩) 五味子(二兩)

上，下篩，以好淳酒，丸如麻子，先食吞下二丸。潁川都尉張君夫人年四十八無子，服此藥即生二男。藥無禁。

《葛氏方》治婦人不生子方：

以戊子日令婦人敞脛臥上西北首，交接。五月、七月、庚子、壬子日尤佳。

又方：桃花未舒者，陰乾百日，搗末，以戊子日三指撮，酒服。

《耆婆方》云：常以四月八日，二月八日奉佛香花，令人多子孫，無病。

《新錄方》云：正月始雨水，男女各飲一壞(杯)，有子。

又方：常以戊子日日中時合陰陽，解發振，立得。

又方：灸中極穴，在臍下四寸。

《錄驗方》云：治婦人無子方：

柏子仁(一升) 茯苓末(一升)  
搗，合乳汁和服，如梧子十丸。(《葛氏方》同之。)

《枕中方》云：欲得生子日，子日正午時，面向南臥，合陰陽，(即)有驗。

又云：老子曰：取井中蝦蟆著戶上，生子必貴。

《玉房秘訣》云：治婦人無子，令婦人左手持小豆二七枚，右手扶男子陰頭納女陰中，左手納豆著口中，女自男陰同入，聞男陰精下，女仍當咽豆。有效萬全，不失一也。女人自聞知男人精出，不得失時候。

又云：婦人懷子未滿三月，以戊子取男子冠纓燒之，以取灰，以酒盡服之，生子富貴明達。秘之秘之。

《本草拾遺》云：夫尿處土令有子。壬子日，婦人取少許，水和服之，是日就房，即有娠也。

又云：正月十五日燈盞令人有子，夫妻共於燈下盜取，置臥床下，勿令人知，當此月有娠。

## 知有子法第二

《病源論》云：陰搏陽別謂之有子者，此是氣血和調，陽施陰化也。診其手少陰脈動甚者，妊子也。尺中之脈，按之不絕者，妊娠也。

《產經》云：凡婦人三部脈，浮沉正等者，此謂有子也。(今按：《八十一難》云：從掌後三寸為三部，則寸與關尺各得之寸一。凡診脈者，先明三部九候。)

《短劇方》云：凡婦人虛羸，血氣不足，腎氣少弱；或當風取冷大過，心下有痰水者，欲有胎，便喜病阻。何謂欲有胎，其人月水尚來，顏色肌膚如常而沉重憤悶。不用飲食，不知其患所在，脈理順時平和。則是欲有胎也。如此經二月日後，便覺不通，即結胎也。(《玉房秘訣》云：初施瀉婦陰 陽有力如吮者，是有子之候也。)

《太素經》云：玄元皇帝曰：人受天地之氣，變化而生，一月而高(膏)，二月而脈，三月而胞，四月而胎，五月而脈筋，六月而骨，七月而成形，八月而動，九月而臑，十月而生。

《周書》云：人感十而生，天五行，地五行，合為十也。天五行為五常，地五行為五臟，故《易》曰：在天成象，在地成形者也。

《家語》云：天一，地二，人三，三三而九，九九八十一，一主日，日數十，故十月生。

《玉房秘訣》云：陽精多則生男，陰精多則生女，陽精為骨，陰精為肉。

### 知胎中男女法第三

《病源論》云：脈左手沉實為男，右手浮大為女；左右俱沉實，生二男。左右手俱浮大，生二女。又云：遣向南行，還複呼之，左回是男，右回是女。又云：其夫左乳房有核是男，右乳房有核是女也。

《千金方》云：左手尺脈浮大者為男，右手尺脈沉細者為女。

《產經》云：以脈知胎男女法：

妊身婦人，三月尺脈數也，左手尺脈偏大為男，右手尺脈偏大為女，俱大有兩子。

又云：妊身脈，左疾為男，右疾為女，左右俱大有兩子。

又云：占孕男女法：

說云：以傳送加夫本命，見婦游年上，得陽神為男，得陰神為女。

一云：天罡天後加母年上，或酉臨陽辰，或功曹臨陽；或干有氣，或時與日比，或陽神臨日者，必為男；或功曹臨陰辰，支有氣，皆為女。

一云：用得青龍太裳，子多為男。或得天後太陽(陰)，子多為女。

一云：常以傳送加婦人本命，年在陽神下為男；年在陰神下為女。

一云：微明加四孟為男，神後加四仲為女。

一云：母行年臨孟為男，臨四仲季為女。

一云：騰蛇、朱雀、青龍、勾陳、玄武、白虎，加日辰皆為男。六合、天官(空)、大陰、天後、大裳，加日辰皆為女。

一云：直用，神在陽似父，在陰似母。或旺相者，美容；囚休者，丑鄙。

又云：以母年立知胎子男女法：

女年十三立申生男，年十四立未生女，年十五立午生女，年十六立巳生男，年十七立辰生男

立亥生男，年二十三立戌生男，年二十四立酉生男，年二十五立申生男，年二十六立未生女，年二十七立午生男，年二十八立巳生男，年二十九立辰生男，年三十立卯生女，年三十一立

寅生男，年三十二立丑生男，年三十三立子生女，年三十四立亥生男，年三十五立戌生男，年三十六立酉生男，年三十七立申生男，年三十八立未生女，年三十九立午生女，年四十立

巳生男，年四十一立辰生女，年四十二立卯生女，年四十三立寅生男，年四十四立丑生男，年四十五立子生女，年四十六立亥生男，年四十七立戌生男，年四十八立酉生女，年四十九

立申生男，年五十立未生男。

又云：欲知男女算法，先下夫年，次下婦年，仍下胎月，正月胎下算十二月，並取十二月算合數。仍除天一，又除地二，又除人三，又除四時四，又除五行五，又除六律六，又除七星七，又除八風八，又除九章九，單即男，偶即女，萬無參差。

#### 變女為男法第四

《病源論》云：陰陽和調，二氣相感，陽施陰化，是以有娠，而三陰所會，則多生女。

妊娠二月，名曰始臟，精成為胞裏，至於三月，名曰始胎，血不流滾，象形而變，未有定儀，見物而化。是時，男女未分，故未滿三月者，可服藥方術，轉之令生男也。

《產經》云：伊芳尹曰：蓋賢母妊身當靜，安居修德，不常見凶惡之事。宜弄文武兵器，搯弓矢，射雄雉，觀牡虎，走馬犬，生子必為男也。

又法：妊身三月，取楊柳東向枝三寸，系著衣帶不失，子為男。

又法：妊身三月，取五茄置床下，無令母知，子為男。

又法：始覺有胎，服原蠶矢一枚，勿令母知之。（今按：《千金方》：以井花水服，日三，必得男。）

又法：取石南草四株著下，勿令知之，必得男。

又法：桑螵蛸十四枚，末，以酒服之，若無者，隨多少必得。

《葛氏方》云：覺有妊三月，溺雄雞浴處。

又方：密以大刀置臥席下。（《如意方》同之。）

又方：新生男兒臍，陰乾百日，燒，以酒服之。

《集驗方》云：取弓弦一枚，絳囊盛，戴婦人左臂。

《千金方》云：取雄黃一兩，絳囊盛帶之：

《錄驗方》治但生女無男，此大夫病，非婦人過。馬齒散方：

馬齒（二分，熬）菟絲子（一分）

凡二物，用駁馬齒治合，下篩，先食服方寸匕，日三，用井花水服之。

《枕中方》治婦人欲得轉女為男法：

有身二月中，灸臍下三壯即有男。（今按：《產經》云：初覺時，灸臍中。）

又方：妊身三月求男，取夫衣帶三寸燒作灰，井花水二升，東南向服，大良。

《靈奇方》云：未滿三月，取斧著婦人床下，即反成男。（今按：《如意方》云：試著雞窟下，皆雄。）

《如意方》食宜男草花即生男，一云：妊身時帶之即生男。（今案：《本草稽疑》云：萱草，一名宜男草。《博物志》云：懷妊婦人佩之即生男。字本醫家加之。）

又方：用烏雞左翼毛二十枚，置女人下即男。

又方：取雄鴨翅毛二枚，著婦人臥蔭下，勿令知。

## 相子生年壽法第五

《產經》云：甲子年生，壽九十，食麥。（一云勇貴。）

乙丑年生，壽九十六，食粟。（一云勇而苦。）

丙寅年生，壽九十五，食稻。（一云無咎。）

丁卯年生，壽八十五，食麥。（一云無咎。）  
戊辰年生，壽九十二，食豆。  
己巳年生，壽九十二，食麻。  
庚午年生，壽九十二，食麥。  
辛未年生，壽九十二，食豆。  
壬申年生，壽九十五，食麻。  
癸酉年生，壽九十五，食麻。  
甲戌年生，壽九十，食麻。  
乙亥年生，壽八十三，食麻。  
丙子年生，壽六十三，食麻。  
丁丑年生，壽八十五，食粟。  
戊寅年生，壽九十二，食豆。  
己卯年生，壽九十五，食麥。  
庚辰年生，壽八十三，食麻。  
辛巳年生，壽八十七，食麥。  
壬午年生，壽八十五，食豆。  
癸未年生，壽九十五，食豆。  
甲申年生，壽八十五，食麻。  
乙酉年生，壽九十五，食麥。  
丙戌年生，壽九十三，食粟。  
丁亥年生，壽百五，食粟。  
戊子年生，壽百，食豆。  
己丑年生，壽九十，食粟。  
庚寅年生，壽九十，食麻。  
辛卯年生，壽九十八，食麥。  
壬辰年生，壽八十五，食豆。  
癸巳年生，壽六十七，食豆。  
甲午年生，壽八十五，食豆。  
乙未年生，壽九十，食豆。  
丙申年生，壽百，食麻。  
丁酉年生，壽八十三，食麥。  
戊戌年生，壽八十四，食粟。  
己亥年生，壽八十七，食粟。  
庚子年生，壽八十，粟。  
辛丑年生，壽八十五，食麥。  
壬寅年生，壽八十九，食（子曳反）似黍不粘也。

癸卯年生壽八十，食麥。  
甲辰年生，壽九十二，食豆。  
乙巳年生壽，九十二，食豆。  
丙午年生，壽八十五，食豆。  
丁未年生，壽九十五，食豆。  
戊申年生，壽八十，食粟。  
己酉年生，壽八十三，食麥。  
庚戌年生，壽八十五，食稻。  
辛亥年生，壽九十三，食粟。  
壬子年生，壽八十三，食麻。  
癸丑年生，壽九十五，食粟。  
甲寅年生，壽八十五，食麥。  
乙卯年生，壽九十五，食麥。  
丙辰年生，壽九十二，食豆。  
丁巳年生，壽八十四，食。  
戊午年生，壽八十一，食麻。  
己未年生，壽八十三，食豆。  
庚申年生，壽九十三，食麥。  
辛酉年生，壽八十五，食豆。  
壬戌年生，壽八十六，食麥。  
癸亥年生，壽七十九，食。

### 相子生月法第六

《產經》云：正月生男，妨兄弟，女兒吉。二月生男貴，妨公母。（字曰可安都則無咎，女為異名為候，吉。）三月生男貴，有官，女貧無子。四月生男臨民，女為貴人婦。五月生男不壽，女貧三嫁。六月生男二千石，女富貴。七月生男宜仕官，三娶，女小貴三嫁。八月生男不利官，女為賤。九月生男貴當為師，女小貴三嫁。十月生男宜為吏，女貴宜財。十一月生男有官秩，女為貴。十二月生男宜行祿，女得子力。

### 相子生六甲日法第七

《產經》云：甲子生，人勇而貴。乙丑生，勇而苦。丙寅丁卯生，無咎。戊辰己巳庚午生，賤。辛未壬申癸酉生，賤。甲戌乙亥生，賤。丙子丁丑生，賤。戊寅己卯生，苦。庚辰辛巳生，賤。壬午癸未生，賤。甲申乙酉生，宜為後。丙戌丁亥生，賤。戊子己丑生，多憂。庚寅辛卯生，勇。壬辰癸巳生，貴。甲午

乙未生，多憂。丙申丁酉生，多病。戊戌己亥生，少兄弟。庚子辛丑生，無勇，人而不利。壬寅癸卯生，貴。甲辰乙巳生，人善。丙午丁未生，人善。戊申己酉生，頭不久，庚戌辛亥生，賤。壬子癸丑生，賤。甲寅乙卯生，人勇。丙辰丁巳生，暴貴。戊午己未生，思之。庚申辛酉生，勇愁。壬戌癸亥生，困賤。

## 相子男生日法第八

《產經》云：子日生男子，三日三月不死，樂，年至七十二甲子死，屬桑木。一云：九年不死為人君，終利父母。

丑日生男，四日五月不死，貴，年至六十六死，屬桑木。一云：富貴，利父母，惡腹。

寅日生男，五日四月不死，當富，年至六十七死。屬松木。一云：心勇悍，好田宅畜養，不利父母，心自如。

卯日生男，六日二月不死，當貧，年至八十死，屬楊木。一云：三娶，好腹，正廣不宜道。

辰日生男，七日三月不死，當多病，年至七十三死，屬楊木。一云：心為貧。

巳日生男，一日二月不死，當拾年至六十六死，屬蕩木。一云：富貴二妻。

午日生男，七日三月不死，當兩娶婦，年至六十九死，屬桂木。一云：妨父母，富馬。

未日生男，三日二十一日不死，當官，年至八十五死，屬桃木。一云：為勇。

申日生男，二日二十二日不死，當為吏，年至五十一死，屬棠木。一云：數多病。

酉日生男，六日二月不死，當恐狂，年至六十六死，屬杜檀木。一云：多病。

戌日生男，一日三月不死，當喜爭，年至七十二死，屬青榆木。一云：為富。

亥日生男，三日四月不死，當昌樂，年至六十五死，屬黃榆木。一云：好田宅。

## 相子女生日法第九

《產經》云：子日生女，十日三月不死，當再嫁，年至六十五死，屬榆木。一云：心惡。

丑日生女，三日一月不死，娶為兵家作嫁，年至六十七死，屬杏仁。一云：為巫市買，多辨，二夫。

寅日生女，四日七月不死，當三嫁，年至六十死，屬楊木。一云：惡，好巫。

卯日生女，三月不死，當娶智在家，年至六十三死，屬折木。一云：小財，貧。

辰日生女，三日一月不死，當為王侯後，年至七十一死，屬桃木。一云先貧後富。

巳日生女，一日半不死，當貴相，年至八十九，屬青榆木。一云：為巫，多口舌

午日生女，三日六月不死，當富，年至七十七死，屬杜榆木。

未日生女，五日三月不死，當事一君，至七十四死，屬相信木。一云：為國王妻，貴吉。

申日生女，七日六月不死，當富，年至五十四死，屬桑木。一云：貧，無財多病。

酉日生女，一日五月不死，當資，年至七十八死，屬相楊木。一云：貧，無財亦多病。

戌日生女，二日五月不死，當九嫁，年至六十七死，屬杜析木。一云：喜游，病癰。

亥日生女，三日五月不死，當富，年至六十四死，屬落木。一云：巧，當富，三夫，多病。

凡五月丙午日生男，七年無父，母無母，七月丙辰日生，男勝父，女勝母。

### 相子生時法第十

《產經》云：夜半生子，男富女強，雞鳴生子，男宜為吏。

平旦生子，男女皆富。

日出生子，富樂保財，有威名。

食時生子，見苦多貧。一云：大富吉。

禺中生子，男貴女吉。

日中生子，秩二千石，女富。

日秩( )生子，男貴女富，大吉。

脯時生子，宜賈市，吉。

日入生子，多病，貧苦。

(黃昏可尋之)，人定生子，苦相，貧。一云：多惡奸。

### 相子生屬月宿法第十一

《產經》云：角生子宜兵，善腹，不為人下，身長，好隱潛，至二千石。一云：可以遠行拜吏，生子卿相，祠祀皆吉，不可登埋屋。

亢生子善心，外出道死，不歸。一云：生子為卿，徙移賈市，作門戶，大吉。

氏生子貞信，良腹，好田蠶，男至二千石，吉。一云：入官移徙，遠行造舉百事，大吉。

房生子反急，腹無治切□。一云：富貴，乘車馬出入，皆大吉。

心生子忠信，良腹，聖教賢明，二千石。一云：納財，見貴人，通言語，學書，使行通水除道，大吉。

尾生子 辱不祥，即枉(妊)遠之他(邦)。一云：可以納財，不可祠祀，造舉百事，皆大吉。

箕生子多口舌，不祥，不死其故鄉。一云：不可移徙，嫁娶入官皆不可，納財奴婢，逃亡也。

斗生子屢被懸官，多疾病，破亡。一云：生貴子，不可納財，奴婢亦多死，凶。牛生子質保不祥，蓋亡行。一云：吉。可納財物入官，不可納牛。

女生子宜田蠶，忠孝，良腹，吉昌。一云：可以入室姑市，不可嫁娶，子必賈。虛生子家蓋亡，驚走他鄉，不宜六畜。一云：不可以移徙，入官，嫁娶，皆不吉也，造舉百事，大凶。

危生子貧，遠行，不宜財，死亡。一云：不可入官，移徙，嫁娶，皆不吉也。室生子富貴，子孫番昌。一云：百事小吉，久不可為，室舍凶，出行必死亡也。

璧生子良腹，工巧，不死挾貧。一云：可以移徙，入官、蓋屋、出行皆吉，不可祠祀，凶也。

奎生子為奴婢，善辱，不祥，婦女牛奔奔，男可凶。一云：出行築室，不可嫁娶，生子為奴婢也。

婁生子備守家居，富貴吉昌。一云：可以起土賈市，納六畜魚臘，吉。

胃生子長 腹，八月以後多憂，不祥，信貞。一云：可以出行，作利合眾，入新舍，納奴婢財物作倉，吉也。

昂生子工巧，先貧後富，大吉。一云：可以武事斷獄決事，飲無所宜，入官有獄事，凶。

畢生子殺佐奸，副魚臘。一云：不可嫁娶，病死亡也。

觜生子喜夜行，不祥，盜賊。一云：可以出室，財分異，不可嫁娶，凶也。

參生子好盜持兵，相傷輕(《玉》云：音吳，福也)，死亡保首市。一云：可以追捕，代政入官親事，吉。納奴婢，教公子，生子市死，凶。

井生子必掠死、溺水死，他身不葬。一云：不可移徙，入官行作，凶。生子逢殘病也。

鬼生子好事神明，至奸野狼鬼守腹死亡。一云：可以立神祠為主，吉，生子為鬼所著也。

柳生子簪，遠行他游則死亡。一云：賈市百事，吉，不可壅水瀆，凶。

星生子編泄汗傷，好喜遠行，善祿，樂及後世。一云：可以移徙，入官，市賈，富三世，葬埋六人死也。

張生子吉昌，身體無咎，富貴。一云：可以移徙，嫁娶，賈市，百事皆吉。

翼生子一南一北，身在他邦，心中□□腹如刺棘。一云：造舉百事，皆吉。

軫生子男女富貴，宜子孫，位至侯王，二千石。一云：入官祠祀，乘車，吉也。月宿天倉天府生子大吉利，富貴及後世，福祿巍巍。

凡生子之時見日月之光清明者，賢明多所通遠。不見三光陰兩者，則愚鈍無所通。暴風者，多傷害不祥。晴而有五色雲者，有大聖德。有白雲蘊者，富多財。

## 生子二十八宿星相法第十二

《產經》云：佛家《大集經》曰：東方一角生者。口舌、四指、額身右多黑子者，貴，聰智，年八十二。

亢生，心樂法音，聰明富貴，多有慚愧，樂出家，年六十。

氐生，人愛，身勇健，富貴，二十五，右黑子於父母，惡心滅家。

房生，性□惡無知，右邊有黑子二十五兵死，宜兄弟。

心生，富貴多才，廢(方吠反，痼病也)風病世頭瘡，大多毒不傷。

尾生，相姓雄莊富貴，自在輪相，大名先(光)明勝日月，大智。

箕生，語諍訟犯，或性□惡欲盛，六十資困好行。

南方一井生，多才人，敬樂法臍瘡般，八十，孝父母，先父已，已裡水。

鬼生，短命，臍下黑子四指，不宜父母，諍訟。

柳生，富貴持戒樂法，七十五，眷屬生天子，人伏信。

星生，好卻盜奸，絕短命兼，發兵死。

張生，命八十，音樂山川，二十七，三十二，富貴健聰明，不宜親。

翼生，善知算數，怪□惡性，鈍根邪見赤子三十世天子。

軫生，富貴多眷屬奴仆，聰明受法命一生天。

西方一奎生，兩頰有黑子，持戒樂法富貴施，身瘡五十。

婁生短命，犯戒怪膝瘡世，不宜兄。

胃生，不宜父母，失才，膝有黑子二十二富貴施。

昴生，樂法戲弁，聰明富貴，多稱護戒人敬死生天，膝青子五十。

畢生，人信忍性語暗欲心，姊妹富貴多死，右有黑子七十。

觜生，富貴施，慚愧無病喜見，年七十七，八十七。

參生，性弊作惡業，獄病多欲聰明，貧，年六十五，多黑子。

北方一斗生，受性痴悟不知是(足)，貧窮惡性短命，病食故。

牛生，痴貧，樂偷竊，多疾忌，年七十，無妻子。

女生，持戒樂施，足有黑子，年八十，名聲宜父母兄弟。

虛生，福儉富貴，眷屬受樂怪不施，年六十，足下有黑子。

危生，身無病，聰明持戒，勇健富貴，年八十。

室生，受性弊惡，多犯禁戒富貴，年百歲，不宜父母。  
辟生，母雄多力尊犯禁，富貴，不宜父母也。

### 為生子求月宿法第十三

《產經》云：《湛(堪)余經》曰：正月朔一營室，二月朔一奎，三月朔一胃，四月朔一畢，五月朔一井，六月朔一柳，七月朔一翼，八月朔一角，九月朔一氐，十月朔一心，十一月朔一斗，十二月朔一女。

右件十二月，各從月朔起，數至月盡三十日止，視其日數則命月宿。假令正月七日所生人者，正月一日為室，二日為辟，三日為奎，四日為婁，五日為胃，六日為昴，七日為畢。

正月七日，月宿為在畢星也。又假令六月三日所生兒者，六月朔一日為柳，二日為星，三日為張，張即是其宿也。他皆仿此。

### 相子生屬七星圖第十四

圖(缺)《產經》云：太歲在午生，屬破軍星，其為人威，將眾人之主，為人師，眾人歸之。富貴秩萬石，無憂患，壽九十九歲。

太歲在巳未生，屬武曲星，其為人強腸自用；有武力，宜為吏，生樂秩千石，無憂患，壽八十八歲。

太歲在辰申生，屬廉貞星，其為人小心，有誠信，不勇士，宜為吏。苦貧，少賞財，壽七十七歲。

太歲在卯酉生，屬文曲星，其為人好文墨，便習事，小心救慎，宜為吏，秩六百為石，勞憂，壽六十六。

太歲在寅戌生，屬祿存星，其為人多護，殺人不死，傷人不論，人欲謀之，反受其殃，秩二千石，壽七十七歲。

太歲在丑亥生，屬巨門星，其為人勇悍強梁，為眾人師，宜為吏，秩六百石，無憂患，多智辨，聖壽八十八歲。

太歲在子生，屬貪野狼星，其為人貪財，疆腸自用，宜為吏，富貴，秩二千石，無憂患，壽百歲。

### 相子生命屬十二星法第十五

《產經》云：命在子，名貪野狼星，懸命皂糸，壽百一歲。忌己卯，護命者成宣子，樹為柏，為人武，或有方略，勝□太窮。

命在丑，名傳說星，懸命黃糸，壽百五歲，忌甲戌，護命者王衣冠文物，樹為直，為人廉平，難得成善。所治主樂。

命在寅，名歲星，懸命割剛，壽八十六歲，忌辛巳，護命者曲惡害，樹為楊，為人仁義，多悲腸，不貞，富。

命在卯，名辰星，懸命素糸，壽八十五歲，忌庚子，護命者天屏星，樹為榆，為人多知，意常好人。

命在辰，名大微星，懸命毛繩，壽九十三歲，忌甲戌，護命者國大剛，樹為桑，為人道理微剛傷，不好負人。

命在巳，名熒惑星，懸命絮素，壽七十二歲，忌壬申，護命者文成衡，樹為李，為人曉文理，好君子，後富貴。

命在午，名金雷星，懸命絳糸，壽九十二歲，忌壬子，護命者犯狐橫，樹為桑，人為伉直，不好獨食，常得人力。

命在未，名軒轅星，懸命柔繩，壽百歲，忌乙丑，護命者念內張，樹為桂，為人廉平，好布施，有人義勝。

命在申，名天心星，懸命堅芒，壽八十五歲，忌丙寅，護命者石明長，樹為檀，為人咀語獨諍，不好負人。

命在酉，名大伯星，懸命白糸，壽九十三歲，忌丁酉，護命者民固明，樹為梓，為人慈愛父母，習文理貴。

命在戌，名遠斗星，懸名筋縷，壽八十五歲，忌丁乙未，護命者改章，樹為杜，為人不負人，獨怒富貴。

命在亥，名星，懸命廉素，壽七十八歲，忌己亥，護命者伏河王，樹為斛粟，為人人且義，無取欲，有後。

命所屬星為苦樂，官懸命，壽忌日不舉百事，護人命也。欲無憂患害，常懷生日行。若猝有患亡命，疾病有厄，輒披發左祖，禹步三仰，呼所屬星名，曰：某甲未護無思，勿令惡賊傷我，勿令邪鬼魅鬼來病我。所願，願皆得願，願成皆無不得也。

## 相生子屬七神圖第十六

圖 (缺) 《產經》云：以青龍日生者，至二千石；以朱雀日生者，至六百石，持節；以左將日生，至四百石，內侍愛；以右將日生，至四百石，內侍愛；以句陳日生，至封侯；以玄武星至六百石，為人邪行；以白虎日生，至二千石，為人子。以此七神日生貴重，王相日生貴，月建日生亦貴重，吉也。

## 相子生四神日法第十七

《產經》云：月一日、九日、二十九(五)日、十七日者，朱雀日也，生子妨父母，多病。

月二日、十日、二十六日、十八日者，白虎頭日也，生子不孝。

月三日、十一日、二十七日、十九日者，白虎脅日也，生子吉，貴至二千石。

月四日、十二日、二十八日、二十日者，白虎足日也，生子亡財，失火。

月五日、十三日、二十一日、二十九日者，玄武日也，生子有憂，不壽。

月六日、十四日、二十二日、三十日者，青龍日也，生子亡身，三十三年死。

月七日、十五日、二十三日者，青龍脅日也。生子貴。

月八日、十六日、二十四日者，青龍足日也，生子失火，亡財。

### 禹相子生日法第十八

《產經》云：乳母問禹，生男女日，善惡何？禹對曰：凡入月一日、十一日、二十一日生子多勇，利父母。入月二日、十二日、二十二日生子俊，多勇，利父母。入月三日、十三日、二十三日生子多病疾；入月四日、十四、二十四日生子利父母；入月五日、十五日、二十五日生子父母不得力；入月六日、十六日、二十六日生子早得力，利父母；入月七日、十七日、二十七日生子便父母；入月八日、十八日、二十八日生子不全；入月九日、十九日、二十九日生子皆吉；入月十日、二十日、三十日生子俊多，父母得力。

### 相子生五行用事日法第十九

《產經》云：木用事

甲乙日生上壽，丙丁日生中壽，戊己日生死夭，庚辛日生不壽，壬癸日生下壽。

火用事

丙丁日生上壽，戊己日生中壽，庚辛日生死夭，壬癸日生不壽，甲乙日生下壽。

土用事

戊己日生上壽，庚辛日生中壽，壬癸日生死夭，甲乙日生不壽，丙丁日生下壽。

金用事

庚辛日生上壽，壬癸日生中壽，甲乙日生死夭，丙丁日生不壽，戊己日生下壽。

水用事

壬癸日生上壽，甲乙日生中壽，丙丁日生死夭，戊己日生短壽，庚辛日生小壽。

## 相子生五行用事時法第二十

《產經》云：木用事

木時生貴，火時生富，土時生死絕傷亡，金時生貧賤苦厄，水時生心有貴子。

火用事

火時生貴，土是生富，金時生絕傷亡，水時生貧賤多危，木時生有貴子。

土用事

土時生貴，金時生富，水時生絕傷亡，木時生貧賤苦厄，火時生有貴子。

金用事

金時生貴，水時生富，木時生絕傷亡，火時生貧賤苦厄，土時生有貴子。

水用事

水時生貴，木時生富，火時生絕傷亡，土時生貧賤苦厄，金時生有貴子。

## 相子生熹母子勝憂時法第二十一

《產經》云：甲乙加時，丙丁加時，戊己加時，庚辛加時，壬癸加時。

寅卯（熹時）巳午 四季 申酉 亥子

亥子（母時）寅卯 巳午 四季 申酉

巳午（子時）四季 申酉 亥子 寅卯

申酉（勝時）亥子 寅卯 巳午 四季

四季（憂時）申酉 亥子 寅卯 巳午

子以熹時生富貴，算得千，訾千萬，利父母。

子以母時生人愛，保財，孝順。

子以子時生得算五百，訾千萬，利父母。

子以勝時生，強梁辨自用，少財，可使兵事。

子以憂時生，憂苦，少時多患。

## 相生子死候第二十二

《產經》云：凡兒生，身不收者死。兒生，魚口者死，兒生股間無生肉者死，兒生顛破者死，兒生陰不起者死，兒生陰囊白而後孔赤者死；兒生毛髮不周者子不成，兒生頭四破開亦不成，兒生聲四散亦不成。

凡新小兒有此諸相者皆不字長也。

凡諸生子男偃者不利妻，女伏者不列夫。

凡建日生子是謂北斗之子，男女皆不可起，自死。

### 占推子壽不壽法第二十三

《產經》云：說曰：生子男視日上，生子女視辰上，得吉，神良。將有王相立者，又不終始相克，又太歲上神與日辰。上神相生者，則長壽，吉。若不相生者，自如。若如得凶，將神困死，氣上下相克者，即不壽。若將遇白虎者，子生便死。若遇朱雀得疾病，若遇騰蛇母驚。

一云：常以天魁加子本命上，太一從魁下皆為天殺也。在上為天殺，在下為月殺。下生子為鬼吏乃殺。月殺下生子，為人臣賊害。

一云：以直用神得青龍太常者，富。得太陰者，保家而已。得六合者，常有賞樂。得朱雀者，常遇懸官。得勾陳者，數與人斗諍。得玄武者，數被盜。得騰蛇者，見驚懼，性多悲憂。得天空者，性欺誕。得白虎者，不壽。

### 占推子與父母保不保法第二十四

《產經》云：經曰：四下賤上之時，生男妨父，生女妨母，亡其先人，是孤子。

一云：子生時不欲克其日辰，日辰克，大凶。以此辨之，此為要訣也。

一云：《龍花經》曰：必記初納婦日，納以甲乙而庚辛生子，大凶。干傷害父，支傷害母，皆克日辰則俱害。

一云：凡月殺日生子，不問男女皆妨父母，子不吉。月殺者，丑戌未辰，終而複始。

一云：以神後加孩生時魁加父母年者，妨害二親。

### 占推子禍福法第二十五

《產經》云：說曰：日辰上得青龍傳送，有王相氣者，皆高才多能。

一云：以魁加子本命，□ 加生月者，少孝慎，見功曹傳送者悌。

一云：以魁加本命者生月上，見神後者遠行亡命厄，見大吉者自如，見功曹者福德，見大冲者貧貞，見天□ 者男貧若虎野狼厄，女憂產死落胎。見太一者多疾病牢獄厄，見勝光者火燒，見小吉者自如，見傳送者有福祿，見登（微歟）明者在牢獄厄。

### 相男子形色吉凶法第二十六

《產經》云：男子強骨方身，面方平正且眼正，眼不邪見，邪見必有不直之心。行步直遲，行虎步不為人下。口開則大，閉則小。言語遲遲，言時不見前人者，君子之相也。目蒸（巫）動□ 盜視，言必望前人之面目者，小人氣也。故頸欲如鴻王，身回乃動。因欲如虎視，舉頭乃見。頰如獅子頰，音如鐘鼓鈴音者，賢吉也。

《世紀》曰：凡人身不在吉長短弱也。舜身甚小短，周公身小短，業公又小短，周靈王生而有髯鬚口毛也，吉相。武王並齒。（是謂庚強之相也。）其父文王問裴秀曰：人有相不？裴秀曰：有中撫軍立鬢至地，伸手過膝，非人臣之相也。舜瞳子重，項羽重子，靈帝足下有毛，身短，貴貴相也。湯有四時（肘）口光，左生內幣，黃帝廣頰龍顏，口兌者，賢武相也。仲尼隆頰，堯八字之眉也，有慈人之相也。子骨眉間尺一強心之相也。禹虎鼻懷斗，伏羲大目，蒼頡四目，皆賢智相也。顛卿記曰：老君足下有八卦紋，眉長，耳有三門，鼻有雙柱，濃唇，口方，色黃，是賢智相也。

### 相女子形色吉凶法第二十七

《產經》云：女子不可娶者，黃髮黑齒，息氣臭，曲行邪坐，目大雄聲，虎顏蛇眼，目多白少黑，淫邪欺夫。黑子在陰上，多淫，及口上，愛他人夫，勿娶。大□（肱）而陰水，甲夾而乳小，手足惡，必貧賤，夫勿娶。濃皮骨強，色赤如絳，殺夫勿娶。蛇行雀走，財物無儲，勿娶。小舌煩頭，鵝行，欺未夫。口際有寒毛似鬢，身體恆冷，瘦多病者，無肥肉，無潤色，臂脛多毛，槌項結喉，鼻高，骨節高顯，心意不和悅，如此之相，皆惡相也，慎勿娶，必欺虛氣，夫妨殺夫，貧窮多憂之相也。

#### 女子吉相

白齒，目白黑分明，視瞻正直，眼不邪視，聲人大，小鼻正如篇；人中深長，氣香，眉如八字，面正方平滿，口下有黑子，肩上下相齊而不薄；舌廣色如絳，有紋理，身皮薄滑潤，多肥肉，身體常溫，骨弱，節後不頭，手足長肥，掌又如亂絲，行走正直，心口和順，頭足平直者，皆貴人相也。又夾□（肱）而陰大者，陰上高如覆杯，陰毛長而滑細。順生者，陰有黑子，二千石之妻。乳大小口直，夫乳上下左右黑痣，富相也。手中有黑痣，又齒三十二以上，最貴相也。

又足下有田井字者，為天下主也。  
如此者，大吉祥福德，必可娶之，慎勿放棄之。

#### 醫心方卷第二十四

#### 醫心方卷第二十四背記

### 紫葳

(《本草》云：威靈仙，一名能消。注云：先於□草莖方數葉相對，花淺紫，何以得知紫葳即能消，是草部文也。又木部云：紫葳一名，陵苕一名，芟華。蘇敬云：此即凌霄花也。

《爾雅》云：苕，一名陵苕，葳華云云。是木部葳歟。於威靈仙者，不被甘心之。)

## 卷第二十五

### 小兒方例第一

《短劇方》云：黃帝云：人年六歲以上為小，十八以上為少，二十以上為壯，五十以上為老也。其六歲以還者，經所不載，是以乳下嬰兒病難治者，皆無所承按也。中古有巫立小兒《顛凶經》以占夭壽，判疾病死生，世相傳有小小方焉。

今按：《太素經》云：小兒初生為嬰，能笑為□脈(兒)。

《經義解》云：小兒初生號赤子。

《產經》云：凡兒生當長一尺六寸，重十七斤。

《針灸經》云：十歲小兒，七十老人不得針，宜灸及甘藥。

《千金方》云：凡新生兒七日以上，周年以還，不過七壯，炷如雀屎大。

### 小兒新生祝術第二

《產經》云：凡兒初生時即祝曰：以天為父，以地為母。頌金錢九十九，令兒壽。

凡小兒初生，仍以發其手掌，日號理，壽千歲。至二千石乃起之，大吉。若可，當為天子、王候、後妃、卿相者，即隨共相號之，乃可起抱之，吉。

### 小兒去銜血方第三

《產經》云：兒初生落地，急撩去(兒)口中舌上銜血，即時不去，須與血凝，(兒驚哭發聲，血)吞入(者，)或令兒成腹中百病(也。去銜血法：以綿纏手指頭以拭去之)。

《千金方》云：兒生口中有血，即當去之，不去者，而得吞之，成痞病。

### 小兒與甘草湯方第四

《千金方》云：兒新生出腹，先以指料口中惡血，去之便洗浴，斷臍竟□ 袍訖。未與朱蜜也。取甘草如手中指一節許(計)，打碎，以水二合，煮取一合；以綿纏沾取，與兒吮之，如朱蜜法，連吮，計可得一蜆殼，入腹止。兒當快吐，吐去胸中惡汁也。吐後消息計如飢渴，項複更與之，若前服。乃更與並不吐者，但稍與盡此一合止，得吐惡汁。令兒心神智惠，無病。都不吐者，是不含惡血耳。勿複與之。(《短劇方》同之。)

### 小兒與朱蜜方第五

《產經》云：小兒初生三日，可與朱蜜方，令兒鎮精神魂魄。真朱精練，研者如大豆多，以赤蜜一□ 殼和之，以綿纏沾取，與兒吮之，得三沾止，一日令盡，此一豆多耳。作三日與之，則用三大豆多也。勿過此量，過則複兒也。

今按：《短劇方》云：不宜多，多則令兒脾胃冷，腹脹。

### 小兒與牛黃方第六

《產經》云：朱蜜與竟，即可與牛黃，牛黃益肝膽，除熱，定驚，辟惡氣也。作法如朱蜜，多少一法同也。(《短劇方》同之。)

### 小兒初與乳方第七

《產經》云：凡乳兒，母當枕臂與乳頭平，當乳，不然則令兒噎。

凡乳兒，當先施去宿乳，以乳兒之，不然令兒吐 可利。

凡乳兒，先以手按乳，令散其熱，乃乳兒之，若不然，乳汁奔走於兒咽，令兒奪息成疾也。

凡乳兒，母欲寐者，則奪其乳，恐覆兒口鼻。亦不知飽，令致兒困也。

凡乳兒，頓不欲大飽，大飽則令兒吐。若吐，當以空乳，乳之則消。夏不去熱乳，以乳，令兒嘔逆；冬不去寒乳，令兒咳，下痢。

凡母新飽以乳，令兒喘、熱、腹滿。

母新內以乳，令兒羸，肢脛不能行，殺兒。

母新醉以乳，令兒身熱、腹滿、殺兒。

母新怒以乳，令兒喜發氣疝病。

母有熱以乳，令兒變黃不能食。

母有疾行以乳，令兒病癡狂。

母新吐下以乳，令兒虛羸。

凡兒初生，乳母食豬雞鮮魚胞美以乳兒者，令兒傷害洞泄也。

凡乳母過醉及房室喘息乳兒者，此最為劇，能殺兒，宜慎之。

夫五情善惡，七神所稟，無非乳而生化者也。所以乳兒宜能慎之。其乳母黃發、黑齒、目大、聲、眼精濁者，多淫邪相也。其椎項節高，鼻長，口大，臂、脛多毛者，心不悅相也。其手足丑惡、皮濃、骨強、齒□口臭，色赤如絳者，勝男相也。其身體恆冷，無有潤澤、皮粗、無肌而瘦者，多病相也。

又有漏腋(漏腋者恆濕臭汗也;)胡臭;癩□，(□者，白禿;)易□；(者，諸節生瘡;□□者，皮上疥瘡;)□(□者，聲敗;)嗽；(者鼻息肉也;)聾;齩(齩，齒敗破者;)齩(齩者，蟲食齒;)瘰；；瘦;瘤;痔;唇;癩;眩;癩者。是丑疾相也。

又其本命生年與兒無克，如此諸惡相者，便可飲乳。不隨此法，害兒，不吉。

凡乳兒頓欲大飽，大飽則令兒吐。

## 小兒哺谷方第八

《產經》云：凡小兒生三日後，應開腹助谷神。可研米作濃飲如乳酪狀。抄如大豆粒大，與兒咽之，咽三豆許止，日三與之，七日可與哺。十日始哺，如來核許。二十日倍之。五十日如彈丸許，百日如棗許。若乳汁少者，不從此法，當用意少增之。

今按：《本草》云：以如梧子十六枚準。(彈丸一枚。)

一云：二十日後可乃始哺，令兒無疾也。若早與哺者，兒頭、面、體喜生瘡。亦令兒虛羸難長。若兒大小隨宜哺增減之良。

凡小兒不嗜哺者，勿強與，強與哺不消，便致疾病也。

又云：初哺小兒良日：

五寅、五辰、五丑、五酉，皆大吉。

又云：男以甲乙，女以壬癸，亦吉。

又云：以成、收、開、定、滿日，義日，保日，皆吉，哺兒，兒終身無病，大吉。  
(義日：壬申、癸酉；保日：甲午、乙巳。)

又云：哺小兒忌日：

五戌、五巳、五亥、丁日，大凶。

又：戊戌、戊辰、執、閉日，皆大凶。

### 小兒初浴方第九

《產經》云：小兒初生時洗浴，以牛脂小置湯中，令兒至老無疾。一云：香脂大如指，投湯中浴之，大佳。香脂是半脂也。

又云：小兒初生，以虎頭骨漬湯中洗浴之，令兒不病。

又云：小兒初生以洗浴，以金銀珍寶珠玉等投湯中，兒必為貴尊，大吉。

又云：小兒初浴湯法：桃根、李根、梅根三物，以水煮取汁洗浴兒，卻諸不祥，令兒身無瘡，大吉。(今按：《千金方》云：以豬膽一枚，投湯中浴兒，終身不患瘡疥。)

又云：凡小兒浴數，數者，令兒背冷，發癩。若久不浴者，令兒毛落，亦復令啼呼之。間一二日浴之良。

又云：浴小兒良日：

丑、寅、卯、申、酉。

又：甲寅、乙未、丙午、丁酉、癸酉，癸未、甲辰，皆吉。令兒終身無疾病，長壽，大吉。

又云：浴小兒忌日：

庚戌、壬子、甲乙、庚辛、壬癸、辰巳、午未、亥，大凶。

又：男忌戌日，女忌丁日，大凶。

又：平旦、日中、黃昏、夜半，大凶。

### 小兒斷臍方第十

《產經》云：凡兒斷臍法，以銅刀斷之，吉(去)臍當令長六，七寸，長則傷肌，短則傷臟。

凡兒初生，當即舉之。遲舉則令兒寒中，腹中雷鳴。先浴之，然後斷臍裹之，吉。

《千金方》云：斷臍當令長至足夫，短則中寒，令腹中不調，當下利。

又云：裹臍法：推治帛布令柔軟，方四寸，新綿濃半寸，與布等合之，調其緩急，急令兒吐。兒生二十日，乃解視臍。若十日許兒怒啼，似衣中有刺，此或臍燥還刺其腹，當解。易衣更裹臍時，當閉戶下帳，燃火左右，令帳中溫暖，兒衣亦令溫粉粉之，比謂冬時寒也。若臍不愈。燒蝦蟆令成灰治末(粉臍中。)

### 小兒去鵝口方第十一

《產經》云：凡初生兒，其口中舌上有白物如米屑，名為鵝口，及鼻外亦有。此由兒在胞中之時，其母嗜嚼米，使之然也。此物當時不去之，兒得吞者，化為蟲也，宜便去之。治之方：

以發纏釵頭，沾井花水撩拭之，三四旦，如此便脫去也。猶不去者，可煮栗蒺汁，令濃，以拭，如上法。若春冬無栗蒺者，可煮栗樹皮用如上法，皆良。一云：釵頭著在者，屠蘇水中，勿令兒口中落入吞。(《短劇方》同之。)

《爽師方》云：小兒鵝口方：(桑白汁和胡粉塗之。)

### 小兒斷連舌方第十二

《產經》云：兒初生之時，有口中舌下膜如石榴子，中隔者連其舌下。當時不摘斷者，後喜令兒言語不發，轉舌也。治之方：

可以爪摘斷之，微有血出，無害。若血出不止者，可燒發作末，敷之血止，良。(《短劇方》名之“連舌”。)

### 小兒刺懸癰方第十三

《產經》云：小兒初生後六七日，其血氣收斂成害，則口舌頰裡領領淨也。若喉裡舌上有物如蘆籜盛水狀者，名懸癰，有氣脹起也。又有著舌下如此者，名為重舌。又有上 如此者，名為重 。又有著齒齦如此者，為重齦，皆刺去血汁之，良。

治奇以綿纏長針，未刃如栗以刺決之，令氣泄之，去清黃血汁，良。一刺止之，消息一日，不消又刺之，不過三刺，自消。（《短劇方》同。）

#### 小兒變蒸第十四

《病源論》云：小兒變蒸者，以長血氣也。變者上氣，蒸者體熱。變蒸有輕重，其輕者體熱而微驚。耳冷體亦冷，上唇頭白肉（ ）起如死魚目珠子。微汗出，平者而歇，遠者九日乃歇。（遠者八九日乃歇。）其重者，體壯熱而脈亂，或汗，或不汗，不欲食，食輒吐，無所苦也。變蒸之時，目白精（睛）微赤，黑精微白，亦無所苦。蒸畢，自明了矣。先變五日，後（蒸）五日，為十日之中，熱乃除耳。初變蒸之時，不欲驚動，勿令旁邊多人，變蒸或早或晚，依時如法者少。初變之時，或熱甚者，或違日數不歇，審計日數，必是變蒸；服黑散發汗，熱不止者，服紫（雙）丸，小瘥，便止，勿複服之。其變蒸之時，遇寒加之，即寒（熱）交爭，腹痛夭矯，啼不止，煮熨之則愈。變蒸與溫壯傷寒相似，若非變蒸；身熱耳熱，體體亦熱，此乃為他病，可為餘治。審是變蒸，不得為餘治也。其變蒸日數（出《病源論》。）

又，變蒸者，唇頭白肉起，如死魚目珠子。微汗，平者而歇，遠者九日乃歇。

兒生三十二日始變，變者耳熱也。至六十四日再變，再變且蒸。其狀臥欲端正也。第二變蒸時，或目白者赤，黑者微白，變蒸畢，目便精明矣。至九十六日三變，變者候丹孔出而泄也。至一百二十八日四變，變且蒸，能咳笑也。至一百六十五日五變，以成機關也。至一百九十二日六變，變且蒸，以知五機成也。至二百二十四日七變，以知匍匐也。至二百五十六日八變，變且蒸，以知學語矣。至二百八十八日九變，以亭亭然也。凡九變三蒸也。至三百二十日十變，變且蒸，蒸積三百二十日小蒸畢。後六十四日大蒸，後百二十八日複蒸。積五百七十六日大小蒸畢，乃成人也。所以變蒸者，皆是榮其血脈，攻其五臟，故一變竟輒覺情態有異者也。

凡蒸之候，身壯熱、脈亂、汗出、目精不明，微欲驚、不乳哺、上唇頭小白肉起如死魚目珠子，耳令尻赤冷，此其診也，近者五日歇，遠者八九日歇也。當審計其蒸日，不可針灸服藥。

凡兒變(蒸)之時，不欲驚動，勿令邊多人也。小兒變時，或早或脫也。

凡兒生三月不蒸則耳聾目盲；五月不蒸身不行；九月不蒸五機不成，此為痿蹶不能行之疾也。

《產經》云：脈決曰：凡小兒變蒸之時，汗出不用食，食輒吐而脈亂，無所苦也。

《葛氏方》云：凡小兒生後六十日，目瞳子成，能咳唆，識人。百五日經脈生，能反覆。百八十日尻骨成，能獨坐。二百一十日掌骨成，能匍匐。三百日髓骨成，能獨倚。三百六十日為一期，膝骨成，乃能行。

治少小初變蒸時，有者服之，發汗已止，黑散方：

杏仁(二分) 大黃(一分) 麻黃(二兩，去節)

上三物，先搗大黃、麻黃下篩，杏仁令如脂。納散，令調，更粗篩之，盛以葦囊。二十日兒以汁和之，如小豆一丸，分為二丸，易吞，濃衣包之，令汗，汗出畢，下帳、燃火解衣、溫粉粉之。百日兒取散如棗核大，以小陽和服之，汗出之後，消息如上法；當豫溫粉，不可解衣，乃溫粉。(出《葛氏》。)

治已服黑散，發熱不歇，服之熱小瘥便止，勿複與。紫丸方：

赤石脂(一兩) 巴豆(三十枚) 代赭(一兩) 杏仁(三十枚，一方五十枚，去皮)

上四物，先治巴豆、杏仁，搗二千杵，乃納代赭、赤石脂，更搗三千杵，掩也。藥熱即成。一方云：相和，與少蜜和之，盛以密器，無令藥燥，燥則無熱。以巴豆、杏仁自丸，常苦不能盡屑，當稍稍納之令相丸。二十日兒服如黍米一丸訖，小乳小乳之，令藥得下。卻兩食頃，乃複乳之，勿令飽耳。平旦一服藥，日中熱盡；日西夕時複小增丸，至雞鳴時，若複與一丸，愈者止。三十日兒服如大黍米一丸。三十日兒服如麻子一丸。六七十日兒如胡豆一丸。百日兒服如小豆一丸。不下故熱者，增半丸，以下利為度。

又方說：服紫丸，當須完出，若不出，出不完，為病未盡，當更服之。有熱乃服紫丸，無熱但有寒者勤服乳頭。單當歸散、黃散。變蒸服藥後微熱者，亦可與除熱黃芩湯方。(出《僧深方》。)

黃芩湯少小輩變蒸時服，藥下後有朝夕熱吐利。除熱方：

黃芩(一兩) 甘皮(六銖) 人參(一兩) 乾地黃(六銖) 甘草(半兩, 炙) 大棗(五枚, 去核)

凡六物, 切之, 以水三升, 煮取一升, 絞去滓。二百日兒服半合, 三百日兒服一合, 日再。熱瘥止。變蒸, 兒有微熱可服。(出張仲。)

又云：經曰：天不足西北, 故令兒腮後合; 地不足東南, 故兒髓後生成; 人法於三, 故令齒後。故腮合乃而言, 髓成乃而行。大陰氣不足而太陽氣有餘者, 故令兒羸瘦 脛三歲乃而行。

### 小兒擇乳母方第十五

(備在第七小兒與乳方末)

《短劇方》云：乳母者, 其血氣為乳汁也, 五情善惡, 血氣所生也。乳兒者, 皆宜慎喜怒, 夫乳母形色所宜, 其候甚多, 不可悉得, 今但令不狐臭、癭瘤、  
□ 癭、氣味、蝸、蚘、癬癢、白禿、瘍、唇、耳聾、鼻、癩眩, 無此等病者, 便可飲兒也。師見其故, 灸盤便知其病源也。

### 小兒為名字法第十六

《產經》云：

子日生名救(一名壽;) 丑日生名帶(一名徐, 一名去病;) 寅日生名令(一名阿金;) 卯日生名官(一名金, 一名宣令;) 辰日生名道(一名阿種;) 巳日生名益宗(一名阿善;) 午日生名徐(一名阿師;) 未日生名護; 申日生名多(一名起, 一名立, 一名桓,) 酉日生名多; 戌日生名帶子(一名弟;) 亥日生名他人(一名侶。)

又云：正月一日、十一日、二十一日、寅日、寅時生子名為正月子。二月二日、十二日、二十二日、卯日、卯時生子名為二月子。五月五日、十五日、二十五日、午日、午時生子名為五月子。七月七日、十七日、二十七日、申日、申時生子名為七月子。諸此日月合生者可為忌耳。

又云：以二月、五月生者, 皆不利父母。二月生男名安都, 生女名候女, 一名定女, 無咎。五月生男名連□, 一名扶紆, 女名恐華朱。如此名之, 無咎。是周文王為作神字, 不妨害父母, 吉。

又云：初立名字, 勿以五子曰, 凶。又不以巳日, 大凶。

## 小兒初著衣方第十七

《產經》云：小兒初著衣法：甲乙日生子，衣以黑衣(忌庚日、晡時、補時，凶。)丙丁日生子，衣以青衣(忌夜半。)戊巳日生子，衣以絳衣(忌甲申日、旦時，凶。)庚辛日生子，衣以黃衣(忌丙子日、申時，凶。)壬癸日生子，衣以白衣(忌戊巳日、晡時，凶。)

又云：小兒初著衣，良日辰巳。男以甲，女以乙，吉。

又云：凡作兒衣，勿以新綿繒之，損兒氣，故宜用故布帛。有人氣者，著益也。兒衣不欲濃，多綿之，恆如不忍，見其寒，乃為佳耳。

## 小兒調養方第十八

《禮記》云：童子不衣裘(裘)裳。(裘大溫，消陰氣，使不堪苦，不衣裳以便宜也。)

《養生要集》云：嬰兒之生，衣之新繒則骨蒸焉。食之魚肉則蟲生焉。串之逸樂則易傷焉。

《千金方》云：小兒始生，肌膚未成，不可暖衣，暖衣則令筋骨緩弱；不見日風，則令肌膚脆軟，便易傷。皆當以故絮著衣之，勿用新綿也。天和暖無風寒之時，令母將於日中嬉戲，數見風日，則血疑氣剛，肌肉牢密，能耐風寒，不致疾病。若常藏在帳中，重衣溫暖，辟陰地之草，不見風日，軟脆不堪風寒。

又云：養小兒常慎驚，勿令聞大聲，抱持之間，當安徐，勿令怖也。

又云：天雷塞耳，但作餘細聲以亂之。

又云：凡兒冬不可浴，冬生傷寒，夏不可浴，不浴久，久傷熱。

又云：凡小兒不能乳哺，當雙丸下之。小兒氣盛有病，但下之，必無所損，若不時下，則成病，痼難治矣。

《病源論》云：薄衣之法：當從秋習之，不可以春夏卒減其衣，則令中寒。從秋習之以漸，猶寒，如此，則必□寒，冬月但當著兩薄襠一複裳耳，常令不忍見其寒，適佳耳。愛而蠕之過，所以害之也。

又云：當消息，無令汗出，汗出則致虛損，便受風寒。晝夜寤寐，皆當慎之。

《產經》云：凡養小兒法，隨大人身之寒溫而養之，隨天時寒溫減增之，能察其微之。

又：不用新綿帛，新者過即有患兒故也。

凡小兒衣，其寒薄者，則腹中乳食不消，乳食不消則其大行酢臭。酢臭，此欲為癖之漸也，便將雙丸以微消之。

凡小兒大行黃而臭者，此是腹中有熱，故宜將服龍骨湯，良。

凡小兒不節哺乳者，則病易後，後下之則傷胃氣，令腹脹滿。再三下尚可，過此則傷小兒矣。

凡小兒冬日下為無所畏，夏日下不癢，難治。壯有疾者，不可不下，夏日下之後，腹中常當小脹滿，故當節哺乳，將護之，數日間愈矣。

凡小兒不使溺灶灰上，令兒陰生瘡，難治。

## 小兒禁食第十九

《產經》云：小兒食語害，令兒腹中生瘕，難治。

又云：小兒齒未易，蜜及飴糖不可與食，令兒齒壞，雖易，齒不堅。

又云：小兒不可與食狗鼠殘物，令兒咽中生白瘡，死。

又云：小兒不可與食核未成諸果，令兒生寒熱及癩癧。

《養生要集》云：大豆炒小麥，勿與一歲以上，十歲以下小兒，喜氣壅而死也。

又云：凡男子年十五以下，不得飲冰沉漿，腠理未成，故成病。

又云：小兒未斷乳，不可啖雞肉，生蛔蟲，亦令體瘦。

《崔禹錫食經》云：大麥面勿與一歲以上，十歲以下小兒，其喜氣壅塞而死。

《孟詵食經》云：黍，不可與小兒食之，令不能行。

又云：小兒食葢菜，便覺腳痛。

《蘇敬本草注》云：栗(栗)餌孩兒，令齒不生。

《本草拾遺》云：蝦，小兒食之，腳屈不能行。

又云：小兒食蕨，腳弱不行。

### 治小兒解顛方第二十

《病源論》云：解顛者，其狀小兒年大凶應合而不合，頭縫開解是也。由腎氣不成故也。腎主骨髓，而腦為髓海，腎氣不成，則髓腦不足，不能結成。

《產經》論云：細辛一分，桂心一分，乾薑五分。凡三物，以乳汁和，塗上。乾，複塗。

《僧深方》云：取豬牙車骨髓，塗凶上，日一，十日止。良。

《短劇方》云：生蟹骨、白 各二分。凡二物，下篩，以乳汁和，塗上立愈。

《千金方》云：熬蛇蛻末，和豬頰車中髓塗凶上，日三四。

《葛氏方》：燒藜蘘末敷良。

《極要方》云：防風六分，白芨，柏子仁各二分。上為散，以乳汁塗凶上，日一，十日知，二十日合。

又方：灸臍上下半寸。(出《新錄方》。)

### 治小兒凶陷方第二十一

《病源論》云：小兒凶上陷，此謂凶陷下不平也。由腹(腸)內有熱，熱氣熏臟，臟熱則竭(渴)，引飲而小兒(便)泄曳利者，則腑臟血氣虛弱，不能上充髓腦，故凶陷也。

《千金方》云：灸臍上下各半寸，及灸足太陰各一壯。

今按：《玉遺針經》云：足太陰穴在內踝後白肉際陷骨宛中。

### 治小兒搖頭方第二十二

《子母秘錄》云：治小兒長搖頭方：

狗腦以摩頭，即瘥。

### 治小兒髮不生方第二十三

《病源論》云：小兒稟生足少陰之血氣不足，則髮疏薄不生，亦有因頭瘡而禿落不生。

《短劇方》楸葉中心無多少，搗絞取汁，塗頭上。（《產經》同之。）

《新錄方》云：以蜜和豬毛灰塗之，即生。

又方：蓮子草汁塗之，驗。

又方：桑上寄生汁塗，立生。

《千金方》云：枸杞根搗作末，和臘月豬脂敷。和酢亦佳。

### 治小兒白禿方第二十四

《病源論》云：白禿之狀，頭上白點斑剝，初似癬，而上有白皮屑，生痂生瘡。頭髮禿落，謂之白禿。

《葛氏方》云：燒鯽魚末，以醬汁和敷之。

又方：末藜蘆，豬膏和塗之。

《產經》云：先以桑灰汁淨洗之，末，白焚灰，和塗之，良。

《短劇方》云：搗楸葉中心，取汁，以塗頭，立生。

《極要方》云：搗莞花以豬脂和如泥，灸，洗去痂，塗之。

《錄驗方》云：取熊白脂敷之。

《千金方》云：不中水蕪菁葉燒作灰，和豬脂塗之。

又方：葶藶子細末，先洗而洗之。

又方：桃樹青皮，搗，和醋塗之。

### 小兒鬼舐頭方第二十五

《病源論》云：人有風邪在於頭，有偏虛處那髮落肌肉枯死，或如錢大，或如指大，髮不生，故謂之鬼舐頭。

《千金方》云：狸骨燒末，以豬脂和塗之。

《產經》云：亂髮如鴨子大一枚，醋鯽魚一頭，苦參一兩，附子一枚，雄黃二兩，豬膏四升。凡六物，搗，篩下，用膏煎發，魚令盡，納諸藥末絞之，敷瘡上，良。

### 治小兒頭瘡方第二十六

《病源論》云：腑臟有熱，熱氣上沖於頭，而複有風濕乘之，濕熱相搏，折血氣，血變生瘡。

《極要方》云：胡粉膏主之。

胡粉 水銀(各二兩) 松脂 豬膏(各四兩)  
上，煎成去滓，納水銀，胡粉和調，塗瘡上，日二，大人蒸治之。

今按：《千金方》云：銀膏在下條。

《產經》云：梁上塵，下篩，麻油和，先洗瘡畢，拭燥，敷上。

《僧深方》云：燒竹葉，和雞子白，敷之，不過三愈。

《蘇敬本草注》云：生嚼胡麻，塗之，大效。

《葛氏方》云：雞屎燒冶為末，和豬脂，敷之。

《劉涓子方》云：取臘月豬屎燒末敷之，良。

《經心方》：治小兒一切頭瘡久，即疽癢不生痂，藜蘆膏方：

黃連(八分) 藜蘆(二分) 黃柏(八分) 礬石(八兩) 雄黃(八分) 松脂(八分)  
六味，以豬膏二升，煎令調，先以赤龍皮湯洗，敷之。

《子母秘錄》云：竹葉燒灰，和雞子白敷之。（《僧深方》云：不過三，愈之。）

《范汪方》：治小兒頭瘡，面赤有瘡，日日益甚方：

黃連 赤小豆

熬，分等作屑，和豬膏塗之。

《千金方》治小兒頭瘡經年不瘥方：

松脂(六分) 大黃(四分) 苦參(五分) 黃連(六分) 胡粉(四分)

凡五味，下篩，以豬膏和研水銀散敷上。

《徐之才方》云：白帝瘡，小兒頭上瘡團團然白色者是也，大蒜揩白處，早朝敷之。

### 治小兒頭面身體瘡方第二十七

《病源論》云：腑臟熱盛，熱氣衝發皮膚而外有風濕折，與血氣相搏則生瘡。其狀：初赤起，後乃生膿汁，隨癢隨發。或生身體，或出頭面，或身體頭面皆有之者。

《千金方》云：水銀膏主之。（今按《極要方》號胡粉膏在頭瘡條。）

《葛氏方》：取兒父 □ 汁以浴之，勿令兒及母知也。

《范汪方》：治小兒頭瘡面亦有瘡，日日益甚方：

黃連 赤小豆

熬，分等作屑，和豬膏塗之。

《廣利方》療小兒面上忽生瘡黃水土方：

黃連(末三分) 胡粉(三分) 甘草(一分，炙)

三味，以豬脂和，以帛貼瘡上，日一。

又方：鯽魚一頭，燒作灰，和醬汁塗上。

《集驗方》治少小面瘡方：丹茱萸葉，以東流水煮，以浴，良。

### 治小兒面白屑方第二十八

《產經》云：吳茱萸根白皮，煮取汁，拭洗。

又方：以刀刃克□樹，取其汁，塗白處上，日三四。

今按：礬石和酒敷之，尤良。

### 治小兒耳鳴方第二十九

《病源論》云：小兒耳鳴，頭腦有風，令耳鳴。

《產經》昌蒲散方：

菖蒲 烏頭(炮，各四分)

凡二物，為散，以綿裹，塞耳，日再易。

### 治小兒耳瘡方第三十

《病源論》云：小兒瘡生於兩耳，時癢時發，亦有濃汁，是風濕搏於血氣所生也。

《千金方》云：燒馬骨灰敷之。

又方：敷雞屎白。

《產經》云：小兒耳有惡瘡及有惡害生耳中方：

雄黃(六分) 曾青(二分) 黃芩(一分)

凡三物，合下篩，以敷耳中，以綿塞耳中，汁出，複敷，良。

### 治小兒耳方第三十一

《病源論》云：小兒腎臟盛而有熱者，熱上沖於耳，津液壅結則生膿汁。亦有因沐浴，水入耳內而不頃瀝停積，搏於血氣，蘊結成熱，亦令有膿汁。皆謂之耳。(久不癢變成聾。)

《集驗方》云：桃核中仁，熟治，末，(熱)或以裹塞耳，常用，良。

《效驗方》云：燒杏仁黃香塞耳。

又方：黃連、礬石各二兩，下篩，如棗核，吹納耳中，立止。

《產經》云：搗桂末，以魚膏和，塞耳，不過三四日。

又方：釜下灰吹入耳中，令入深，無苦即自丸出，良。

### 治小兒耳中百蟲入方第三十二

《產經》云：以苦酒灌之便出。

又方：油脂灌耳中，良。

又方：水灌注之(佳)。

又方：熬麻子綿裹，塞耳即出。

又方：桃葉汁灌耳中。

又方：以革帶 鉤向耳孔，即諸蟲皆出。

### 治小兒耳蟻入方第三十三

《產經》云：炙豬膏，香物，安耳孔邊，自出，良。

### 治小兒耳蜈蚣入方第三十四

《產經》云：以□ 樹葉裹鹽炙，令熱，掩耳孔，冷換之即出。

### 治小兒耳蚰蜒入方第三十五

《產經》云：胡麻，熬，以葛囊盛，枕之，蟲聞香，即出。

### 治小兒目不明方第三十六

《錄驗方》：治小兒眼茫茫不見物方：

魚膽敷目，鯉鮒等良。

### 治小兒目赤痛方第三十七

《產經》云：黃連七枚 人乳汁一合(半)，漬敷之。(今按：《極要方》無人乳，黃連數分等用之。)

又方：竹瀝汁三合，人乳汁一合，和以綿取藥拭目。

又云：小兒目赤，淚出不止，灸足大指上叢毛中，名大都。

《葛氏方》云：搗薺菜取汁，以注目 中。

《錄驗方》云：鯉魚膽敷之良。

### 治小兒眼爛癢方第三十八

《產經》云：治小兒傷風， 間赤爛癢，經年不瘥，青銅散方：

取大銅錢一百文，以好酒三升煎錢令乾燥，刮取屑，下篩，稍以納眼 。

### 治小兒眼翳方第三十九

《產經》云：治小兒眼有障翳，大小兒年至七八歲，眼瞳子猶不堅，不宜輒敷食翳散，止單敷珊瑚散，取如粟米大納翳上，日再。

又方：宜單敷馬珂散，皆令精細，好濃蜜。（絹篩用之。）

### 治小兒雀盲方第四十

《病源論》云：人有晝而精明，至暝便不見物，謂為雀目，言如鳥雀，暝便無所見也。

《千金方》云：至黃昏時，看雀宿處，打驚之，雀起飛，乃咒曰：柴公，我還汝盲，汝還我明。如此三日暝三過為之，眼明也。秘法也。

《產經》云：見定雀宿處，夜令雀驚起之，曰：雀，汝目去之。如此三日，即愈。

又方：大豆七枚，稻一穗，以二物暮向於鼠穴，曰：穴公穴公，甚甲得雀目，夜無所見故欲汝眼，汝許與之，我獲汝眼。誦三遍訖，則以稻置孔口，則曰：我得鼠目，暗夜能視。豆穗置鼠窟而起，去之。如此三夕。驗。秘術。

《新錄方》云：鯉魚、鮒魚膽敷並良。

### 治小兒目昧第四十一

《產經》云：以豬脂著鼻孔中，隨目左右以鼻噏<sup>口</sup>之訖，閉目仰寤寐，須臾，不復知味處，有驗。

又方：早起對戶門再拜跪言：戶門狹小，不足宿客。愈之。

又方：吞蠶砂一枚，即出。

#### 治小兒目竹木刺方第四十二

《產經》云：鮑魚二，以繩貫，以水煮，令爛，取汁灌目中，即出。

#### 治小兒目芝草沙石入方第四十三

《產經》云：研好墨，以新筆注瞳子上，良。

又方：取麥汁注目中。

又方：燒甑帶末，服方寸匕，立出。

#### 治小兒眼為物撞方第四十四

《產經》云：炙羊肉慰之，勿令甚熱，無羊用豬肉，良。

又方：好黃連去毛細切，以人乳汁漬令黃色，如大豆許，著目中，仰臥，勿覆之，甚佳。

#### 治小兒燕口方第四十五

《病源論》云：小兒燕口，兩吻生瘡，此由脾胃有客熱，上氣熏於口，兩吻生瘡。自白色如燕子之吻，故名為燕口。

《千金方》揪云：燒髮灰和豬脂塗之。

又方：□白皮及濕貼上，四五度。

#### 治小兒口瘡方第四十六

《病源論》云：小兒口瘡，由血氣盛，兼將養過溫，必有客熱，熱熏上焦，故口生瘡。

《產經》云：取烏賊魚骨燒作屑，以乳汁和，塗口中瘡上。

《葛氏方》云：（治小兒口瘡不得飲乳方）：

桑白汁塗瘡上，日夜十餘過。（《產經》云：塗乳以飲兒，良。）

《博濟安眾方》：以白礬，鍛石塗之。

又方：牛膝炙根，酒煎含之。

《極要方》云：取赤葵莖灸（炙）為末，蜜和含之。

《蘇敬本草注》云：檳榔帽。作灰敷之。

#### 治小兒口下黃肥瘡方第四十七

《病源論》云：小兒有涎唾多者，其汁流溢，浸漬於頤，生瘡，黃汁出，浸淫肥爛，挾熱者，瘡汁則多。

《千金方》云：治小兒口下黃肥瘡方：

熬灶上飯令焦，末敷之。

#### 治小兒唇瘡方第四十八

《葛氏方》云：葵根燒末敷之。

《經心方》云：蟾蜍燒末敷之。

#### 治小兒緊唇方第四十九

《單要方》云：澤蘭心，嚼以敷之。

又方：肉機上垢塗之。

#### 治小兒口噤方第五十

《病源論》云：小兒中風口噤者，是風入頸項（頰）之筋故也。

《錄驗方》云：服竹瀝汁二合，分溫四分（服）。

又方：灸百會穴。

《僧深方》：取雀矢白，丸如麻子，服之即愈。

《千金方》：鹿角粉、大豆末分等和，塗乳飲兒。

### 治小兒重舌方第五十一

《病源論》云：小兒重舌者，心脾熱故也。其狀附舌下，如舌而短，故謂之重舌也。

《葛氏方》：以兒著箕中東向，納中灸箕舌三壯，良。

又方：釜月下土苦酒和，敷舌下。

《短劇方》：以赤小豆屑洒和，敷舌上。又方：燒亂髮作末，敷舌上，良。

又方：用以栗哺之，良。

《徐大山方》：甑帶燒灰，末，敷之。

《極要方》：取蒲黃敷上，良。

又方：取衣中白魚燒作屑，敷舌下。

《產經》云：以鉞針刺舌上(下)腫者，令血，有刺大脈。

又方：燒烏扇根苦酒和，塗上。

《徐大山方》：甑帶燒灰敷之。

### 治小兒舌上瘡方第五十二

《病源論》云：小兒苦心臟有熱，舌上生瘡也。

《短劇方》：用烏賊魚骨燒屑，以雞子黃和，塗喉下及舌下也。(今按：《產經》云：以乳汁和塗上。)

又方：清旦起，斫桑木令白汁出，塗乳以飲兒。(今按：《龍門方》：塗舌。)

### 治小兒舌腫方第五十三

《病源論》云：小兒舌腫者，心脾俱熱，氣發於口，故舌(舌)腫也。

《千金方》：釜月下墨末，和醋，塗舌上(下)。

又方：滿口含糖醋，少時熱氣通，愈。

### 治小兒齒晚生方第五十四

《病源論》云：齒是骨之所終，而為髓之所養也，小兒有稟氣不足者，則髓不能充於齒骨，故久不生也。

《葛氏方》：以薄□ 編繩，向東磨齒處，微令破，即生，甚神驗。

《極要方》：雌鼠屎二七枚，以一鼠屎拭齒處，盡二七枚止，二十一日齒當生。  
(今按：

《短劇方》：雌鼠屎，一頭大一頭小是也。)

《蘇敬本草注》云：人屎中竹木，以正旦刮之即生也。

### 治小兒齒落不生方第五十五

《產經》云：取牛屎中大豆二七枚，小開兒口，以注齒處即生。(《葛氏方》同之。)

### 治小兒齒間出血方第五十六

《范汪方》治少小齩齒間血出，齩皆赤黑色方：取生雀割之，以血塗齩上及齒間，便愈。有驗。

### 治小兒鼻衄方第五十七

《病源論》云：小兒經脈血氣有熱，喜令鼻衄也。

《極要方》：取烏馬屎，薄綿裹，塞鼻中。

又方：燒發作灰，少許吹納鼻中。

《產經》云：阿膠令烱，水著貼額上良。

又方：書額上言“今日血忌”，即止。

又方：書額上言：“血出不止，流入東海”。良。

### 治小兒鼻塞方第五十八

《病源論》云：小兒風冷氣入於頭腦，停滯鼻間，則氣不宣和，結聚不通，故鼻塞也。

《產經》云：小兒患鼻不通有涕方：

杏仁(二分) 蜀椒(一分) 附子(一分半) 細辛(一分)

凡四物，咀，以淳苦酒五合，漬一宿，明旦以成；煎豬肪五兩，微火上煎，令附子黃，膏成，綿絮絞去滓，以塗鼻中，日再。

又：披兒頭發，凶上左右以膏摩十數過，良。

《千金方》：治鼻痛方：

恆以油塗鼻內外。

又方：塗酥佳。

### 治小兒鼻息肉方第五十九

《產經》云：治少小鼻息肉通草散方：

通草(一兩) 細辛(一兩)

凡二物，下篩，展綿如棗核，取藥如小豆著綿頭納鼻中，日二。

又方：礬石一兩。(今按：《千金方》：細辛二兩，云云。)

### 治小兒喉痺方第六十

《病源論》云：小兒喉痺，是風毒之氣客於咽喉之間，與血氣相搏而細(結)腫痛，甚者，腫塞，飲粥不下，乃成膿血也。

《產經》：取烏扇燒灰，以水服，大良。

又方：甌帶作繩系頭，愈。

《千金方》：桂一分，杏仁一兩，凡二味。為散，綿裹如棗大，咽其汁。

又方：煮大豆汁含之。

### 治小兒噦方第六十一

《病源論》云：小兒噦，由哺乳冷。冷氣入胃，與胃氣相逆，冷折胃氣，不通則噦也。

《千金方》云：生薑汁，生乳各五合，合煎，取五合，分二服。

### 治小兒津頤方第六十二

《病源論》云：津頤之病，是小兒多涎唾流出，漬於頤下也。

《葛氏方》：取東行牛口中沫，塗兒口。

又方：搗鹿角，熬如豆，著舌下。

《千金方》：桑白汁塗之。

《玄感方》：牛口中飼草絞汁，塗口中。

### 治小兒吐方第六十三

《病源論》云：小兒吐者，由乳哺冷熱不調故也。

《應驗方》：取桑根汁，著汁口中，即瘥。

又方：取新牛屎，水絞汁，少少飲兒，大良。

《經心方》：當以空乳乳則消。

《聖惠方》：治吐乳黃色方：

用韭根汁滴豆大，入口中，立瘥。

又方：用新熱馬糞絞取汁半合，灌之效。

#### 治小兒難乳方第六十四

《病源論》云：小兒初生惡血，兒咽入腹，令心腹痞滿，兒不能飲乳，謂之難乳。

又：兒在胎之時，母取冷，冷氣入胞，兒生則腹痛，不肯飲乳，亦名難乳。

《千金方》：炒鹿角末如小豆，著舌下，□□與之。

又方：雀屎四枚，未著乳頭飲之。大兒十枚。

#### 治小兒風不乳哺方第六十五

《錄驗方》：治小兒風，數十日口中寒，不能乳哺方：

取生竹汁服之即瘥，炙(名)竹瀝也。

《博濟安眾方》：小兒吐乳方：

人參(二兩) 橘皮(一兩) 生薑(一兩)  
以水一升半煎取八合，細細服之。

#### 治小兒臍不合方第六十六

《千金方》：蜂房灰末敷之。

又方：燒甌帶灰和膏敷之。

又方：大車轄脂，燒作灰，日一敷之。

#### 治小兒臍中汁出方第六十七

《千金方》：燒蒼耳子粉之。

又方：燒蜂房灰粉膏中。《效驗方》：

甘草(二分) 椒(一分)  
下篩，以粉之。

又方：礬石，附子各二分，下篩，粉臍中，日二。

### 治小兒臍赤腫方第六十八

《千金方》：杏仁(二分) 豬頰車中髓(二分)  
凡二味，先研杏仁如脂，敷上。

### 治小兒臍瘡方第六十九

《病源論》云：小兒臍瘡，由初生斷臍洗浴，拭不即拭燥，濕氣在臍中，遇風濕相搏故也。

《本草》云：蒿艾莖間白毛敷之，立瘥。

《錄驗方》：可用薑黃柏散粉之。

《產經》云：黃柏，釜月下墨各四分，末，敷之。

《千金方》小兒風臍遂作惡瘡，歷年不瘥方：

敷東壁土，大佳。

又方：蜂房灰末敷之。

《葛氏方》：小兒風臍及臍瘡久不瘥方：

燒甌帶作灰和乳汁敷之。

又方：末當歸粉之。

### 治小兒腹痛方第七十

《病源論》云：小兒腹痛，多由冷熱不調，冷熱之氣與臟相系故也。

《千金方》：梨葉濃煮，取湯，一服七合，可三四與之。

又方：半夏隨多少微火炮之，末，酒和服如粟粒五合丸，日三。

### 治小兒腹脹方第七十一

《病源論》云：小兒腹脹，是冷氣客於臟故也。

《千金方》云：燒父母指甲灰，塗乳上，飲之。

又方：腹上磨書魚。

又方：故衣帶饒垢者，切一升，水三升，煮取一升，分三服。

《葛氏方》：粉及鹽分等，合熬，令變色，以磨腹上，即愈。

## 治小兒痞病方第七十二

《病源論》云：小兒胸膈熱實，腹內有留飲，致令營衛痞塞；腑臟之氣不宜通，其病(痛)腹內結。脹滿，或時壯熱是也。

《葛氏方》方：若患腹中痞結常壯熱者方：

生蠶血，和桂屑塗痞上。

又方：末麝香，服如大豆者。

又方：大黃(灸，令煙出) 龜甲(灸令黃) 茯苓  
凡三物，分等蜜丸，服如大豆一枚，日三。(以兒大小增減也。)

又方：搗白頭翁，練右囊盛以掩痞上。

《產經》云：治小兒痞，面黃羸瘦，丁奚不欲食，食不生肌膚；心中嘈嘈，煩悶，發時寒熱五臟臘脹，腹中繞臍痛，常苦下，八痞丸方：

桂心 曾青(無代空青) 牡丹 鱧頭甲(頭漬，灸令黃色) 乾薑(各三分) 蜀漆(七分) 細辛(六分) 龍膽(五分) 附子(四分，炮)  
凡九物，治下篩，蜜和如梧子，服二丸，日三，禁如藥法。

《本草拾遺》云：小兒痞，三白草搗汁，服之令人吐。

## 治小兒瘰方第七十三

《病源論》云：五臟不和，三焦不調，有寒冷之氣容之。則令乳哺不消化，結聚成瘰癧結也。其狀按之不動，有形段者，微也，推之浮移者，瘰也。

《千金方》：灸兩乳下一寸三壯。

又方：桃樹青皮搗，和酢，塗，日二。

又方：枸杞根搗作末，和豬脂敷之，和酢亦佳。

《醫門方》：搗蒜和酢敷，如移餘處，隨就拊之，驗。

《本草拾遺》云：苦瓠取未硬者，煮令熱，解開，熨小兒閉癩。

#### 治小兒米症方第七十四

《產經》云：治少小米症恆欲食米方：

雞屎（一升）白朮（五合）

凡二物，合炒，取米焦，搗末，以水一升，頓服取盡；斯須即吐出症，吐出症如研米末為症，若無症而吐出白痰水，增米須食米。

#### 治小兒土症方第七十五

《產經》：治少小食土，腹中作土瘕，恆欲食土，啖肉方：

生肉一斤，以繩系曳地行數裡，勿洗便炙，啖之即愈。

#### 治小兒腹中有蟲方第七十六

《耆婆方》：治小兒腹中有蟲方：

蕪荑作末，每食隨多少和，少少水食之乃止。（百無所禁。）

#### 治小兒陰腫方第七十七

《病源論》云：小兒下焦熱，熱氣衝陰，陰頭勿腫合，（令）不得小便，乃至生瘡。俗雲尿火所為也。

《千金方》：搗蕪菁敷之。

又方：書魚磨之。

又方：搗莧菜根敷之。

又方：熬桃仁末，酒服方寸匕，日三。

### 治小兒陰痛方第七十八

《千金方》云：猝陰痛如刺，汗出如雨方：

小蒜 韭根 楊柳根(各一斤)  
凡三味，合燒，以酒灌之，及熱以氣重之。

又方：甘草末和乳洗之。

又云：玉莖痛方：

甘草 石蜜  
末，和乳洗之。

《極要方》：濃煮野狼牙根，洗之，甚良。

### 治小兒陰瘡方第七十九

《產經》云：治小兒陰瘡爛痛方：

濃煮野狼牙根，洗之，甚良。

又云：小兒陰頭生瘡，似石榴花者方：

虎牙 犀角  
凡二物，刀刮，以豬脂煎，令變色，去滓，塗上，神，良。

《千金方》云：治小兒陰癢生瘡方：

嚼胡麻敷之。

又方：蜜煎甘草，末之塗上。

又方：黃連，胡粉分等和，面脂塗之。

《葛氏方》：取灶中黃土，末，以雞子白和，敷之。

又方：濃煮黃柏汁漬之。

### 治小兒陰傷血出方第八十

《產經》：治女小兒為物觸傷，陰道血出不止方：

人頭髮並青布燒作灰，以麻油和塗之，亦可仍以粉，良。

又云：若深刺觸藥塗不及方：

蒲黃，水和服之，即止。

### 治小兒陰囊腫方第八十一

《千金方》：酢和面塗之。

又方：釜月下土，和雞子白敷之。

《醫門方》：末桂心，塗，良。

又方：末大黃，和酢塗，良。

### 治小兒陰頰方第八十二

《病源論》云：頰者，陰核氣結腫大也。小兒患此者，多因啼怒，氣不止，動於陰氣，下擊，結聚不散所致也。

《千金方》：灸足厥陰大敦，左灸右，右灸左。

又方：三月上除日，白頭翁末敷之，一宿作瘡，二十日愈。

《產經》云：牽陰頭正丁上行，灸頭所極。又牽下行向穀道，灸所極。

《短劇方》云：小兒頰方：

先將兒至碓頭祝之曰：坐汝令兒某甲稱兒名也，陰稱故灸汝三七一，灸訖，便牽小兒令莖以下向佳囊縫，當陰以所著處灸縫上七壯即消，有驗。

又：左右髀直行，灸所極，皆四處，隨年壯。

又方：小兒騎碓軸前齊陰莖頭前灸，有年壯。

又云：《葛氏方》：但灸其上，又灸莖上向小腸脈。

又方：灸手小指頭七壯，隨癢左右也。

《經心方》：灸兩足內踝上七寸，日七壯。

又方：但灸其上也。

### 治小兒差頰方第八十三

《病源論》云：差頰者，陰核偏腫大也，其偏虛者，氣虛而行，故偏結腫也。

《千金方》：五等丸治小兒陰偏大，卵核及頰方：

香豉 牡丹 防風 桂心 黃柏(各二兩)

凡五味，丸如大豆，兒三歲飲五丸，日三，兒小者，以意減之，著乳頭與之。

### 治小兒脫肛方第八十四

《病源論》云：小兒患脫肛門，(脫)出多因利，大腸虛冷兼因 氣故也。

《蘇敬本草注》云：燒蟹頭為灰塗(服)之。

《本草拾遺》云：有以似為藥者，蝸牛蟹頭，脫肛皆燒末，敷之自縮。

《錄驗方》：取鐵精粉推納之。

又方：宜灸龜尾骨上三七丸。

《葛氏方》：熬鍛石令熱，故綿(帛)裹坐其上，冷復易之。

《僧深方》：取蒲黃一兩，以豬膏和，敷之，不過三，愈。

《千金方》：灸頂上施毛中即入。

《產經》云：生鐵三斤，以水一斗，煮取五升，以汁洗，日三，乃以蒲黃敷上，良。

### 治小兒穀道癢方第八十五

《子母秘錄》云：小兒穀道蟲癢方：

大棗取膏和，捻長三寸，綿裹，納孔中，明日出之，蟲死。

又方：胡粉，雄黃分等著中。

今按：煮桃皮洗之，煮枸杞洗亦良。

### 治小兒穀道瘡方第八十六

《葛氏方》治猝下部有瘡方：

煮豉以漬之。

又方：□ 汁以磨墨，導也。

### 治小兒甘濕方第八十七

《病源論》云：甘濕之病，多因久利，脾胃虛弱。腸胃之間，蟲動侵食五臟，使人心煩懊悶；其上食者，則口鼻齒齦生瘡；其下食者，則肛門傷爛，皆難治。或因久利，或因臟熱嗜眠，或好食甘美之令蒸，令血動，致生此病患。

《子母秘錄》云：羊膽和漿灌下部，用豬膽亦佳。

《千金方》：細和胡粉塗之。

又方：嚼麻子塗之。

又方：以鐵衣著下部中即瘥。

### 治小兒寸白方第八十八

《病源論》云：小兒寸白者，九蟲之內一蟲是也。因腑臟虛弱而能發動也，食生栗所成。

又食生魚後即食乳酪，亦令生。

《葛氏方》：薏苡根二斤，細銼，水七升，煮取二升，分再服。又可作糜也。

《極要方》云：東行茱萸根白皮四兩，桃白皮三兩。上，切，以酒一升漬一宿，去滓，頓服良驗。

又方：煮扁竹汁飲之，有驗。

今按：蒸之當上。

又方：濃煮豬，檳榔，飲三升，蟲則出盡。

又方：多食榧子。(今按：《千金方》：榧子四十九枚去皮，以月上旬，旦，空腹服七枚，七日服盡，蟲消成水，永瘥。)

今按：研胡桃仁敷。

《產經》云：練皮，削去上皮，取中白者，切五升，以水五升，煮得二升。先令小兒食餈令渴，因飲之。今按：《子母秘錄》：練實一枚，納孔中。

又方：研芥子敷之。

又方：研雄黃，和酢敷之，檳榔子亦佳。

### 治小兒癩病方第八十九

《病源論》云：癩，小兒病也。十歲以上為癩，十歲以下為癩。其發之狀，或口眼相引而目睛上搖，或手足掣縱，或背脊強直，或頸項反折。諸方諸(說)癩(癩)，名証不同，大較其發之源，皆因三種。三種者風癩、驚癩、食癩是也。風癩因衣濃行出，出而風入為之；驚癩因驚怖大啼乃發；食癩因乳哺不節所成。然小兒氣血微弱，易為傷動，因此三種變作諸癩也。

凡諸癩正發，手足掣縮，慎勿捉持之，捉則令曲戾不隨也。

《短劇方》云：《玄中記》云：天下有女鳥，一名姑權，又名鉤皇鬼也；喜以陰雨夜過飛鳴，徘徊人村裡，喚得來者是也。是鳥專雌無雄，不產，喜落毛羽中塵，置人兒衣中，便使兒作癩，病必死，便化為其兒也。是以小兒生至十歲，衣被不可露，七八月尤忌。

《神農本草經》云：小兒驚癩，有百二十種，其証候異於常。

《千金方》云：所以有癩病，瘡病(者)，皆由臟氣不平故也。新生即癩者，是其五臟未收斂，血氣不聚，五脈不流故也。

又云：灸癩法：囟中未合，骨中隨息動者，是最要處也。(灸五壯。)

又云：頂上回毛中、臚中、巨闕、臍中，毛尺澤、勞宮、伏兔、三裡、然谷穴，灸之。

今按：《明堂經》伏兔穴禁灸。

又云：灸癩當先下，使兒虛，乃承虛灸之。未下有實而灸者，氣逼前後不通，殺人。

又云：龍膽湯主之。（其方在本書第五卷。）

《廣利方》：核子驚癩不知人，迷悶嚼（舌）作目方：

牛黃一大豆許，和蜜，水服之，立效。

又方：烏犀角尖（尖），研，並水二大合，服之立效。

《枕中方》：取紙中白魚，隨羊乳和之即愈。

### 治小兒魘病方第九十

《病源論》云：小兒所以有魘病者，婦人懷娠，有惡神道（導）其腹中胎，如娠（妒）嫉而製伏他小兒令病也。妊娠婦不必悉能（製）魘，人時有此耳。魘之為疾，喜生微下，寒熱有去來，毫毛髮□□不悅，是其証也。魘音製。

《千金方》灸（灸）伏翼，熟嚼哺之。

篇□〔切，一升（斤）〕 冬瓜〔切，一升（斤）〕

以水五六升，煮六七沸，去滓，稍以浴之出。（出《新錄方》。）

《蘇敬本草注》云：白馬眼療小兒魘，母帶之。

### 治小兒客忤方第九十一

《病源論》云：小兒中客忤者，是小兒神氣嫩（軟）弱，忽有非常之物，或是未經識見之人觸之，與兒（鬼）神氣相忤而發病，謂之客忤也。又名中客，又名中人。其狀吐下青黃白色水穀，解離，腹痛反倒夭矯，面變易五色，狀似癩，但眼不上，搖耳，其脈弦（強）急數者是也。若失時不治，小久則難治。若乳母飲酒過醉及房勞喘後乳者最劇，能殺兒也。

《千金方》云：少小所以有客忤病者，是外人來氣息忤之，一名中人，是為客忤也。雖是家人或別房異戶，雖是乳人父母，或從外還，衣服或經履鬼神，粗惡異氣，牛馬之氣，皆為忤也。

又云：凡小兒衣，布帛綿中不得有頭發，履中亦爾，白衣青帶，青衣白帶，皆令兒中忤。

又云：凡非常人及物從外來，亦驚小兒。欲防之法，諸有從外來人及異物，當持兒避之，勿令兒見也。若不避者，燒牛屎灰令常煙，置戶前，則善。治之方：

馬屎三升，燒令煙絕，以酒三升煮三沸，去滓，浴兒。

又方：燒母衣帶三寸並發，合服汁，服之。

《極要方》：蚯蚓屎，灶中黃土，等分為散，水和塗兒頭上及手心。

又方：取銅鏡鼻燒令赤，著小許酒中代飲之，小兒又能飲合之，即愈。取熱馬屎一丸，注取汁飲之，兒下便愈。

《短劇方》：吞麝香如大豆，立愈。

又方：取衣中白魚十枚，末，以塗母乳頭令兒飲之，入咽即愈。

《葛氏方》：令兒仰臥，以小盆著胸上，燒甌蔽於盆中，火滅即愈。

《產經》云：牛黃如大豆研，飲之即效。

## 治小兒夜啼方第九十二

《病源論》云：小兒夜啼者，臟冷故也，夜陰氣盛，與冷相並則冷動，冷動與臟氣相搏，或煩或痛，令兒夜啼也。亦有犯觸禁忌，令兒夜啼。

《龍門方》：取鏡系床腳即止。

又方：書臍上作田字，瘥。

《短劇方》少小夜啼至明安寢，夜輒啼，芎 散方：

芎（二分）朮（二分）房己（二分）

凡三物，搗下篩，二十日兒未能服散者，以乳汁和之，服如麻子一丸，兒大能散，散者，服之多少，以意節度。

《產經》：真珠少許，以水和，塗腹上。

又方：取車膏著臍中。

《集驗方》取空井中草，懸戶上，勿令母知。

今按：《本草拾遺》云：井口邊草，潛著母臥席下，勿令知。

《玄感方》取乾（牛）屎手許，安母臥席下，（臥上）勿令母子俱知，吉。

《葛氏方》：取犬頸下毛，縫囊裏以系兒兩手立止。

又方：暮取兒衣，以系柱。

《千金方》：以妊身時，食飲偏有所思物，（以此）哺兒愈。

《本草拾遺》云：灶中土及四交道中土，合末以飲小兒，辟夜啼。

### 治小兒驚啼方第九十三

《病源論》云：小兒驚啼者，是於眠睡裡忽然啼而驚與覺也；由風熱邪氣乘於心臟，生熱，精神不定，故臥不定，則驚而啼也。

《產經》云：真珠少許，以水和，塗腹，良。

《葛氏方》搗柏子仁以一刀圭飲之。

《千金方》酒服亂髮灰。

又方：車轄肪，納口中臍中。

又方：燒皮三寸灰，著乳頭飲之。

### 治小兒啼方第九十四

《病源論》云：小兒在胎時，其母將養，傷於風冷，邪氣入胞，傷兒臟腑。故兒生之後，邪猶在兒腹內，邪動與正氣相搏則腹痛，故兒張蹙氣而啼也。

《千金方》：取新出馬屎一丸，絞取汁，含之。

又方：燒豬屎沸湯，淋取汁，浴之，並與少許飲之。

### 治小兒瘧病方第九十五

《病源論》云：瘧病者，夏傷於暑，至秋風邪乘之發。小兒未能觸胃於暑亦病瘧者，是乳母抱持解脫，不避風也。

《千金方》：生鹿角末，發先時便服一錢匕。

又方：燒鱉甲，酒服方寸匕，至發時服三七，並火灸身。

《葛氏方》云：臨發時，搗大附子，下篩和苦酒塗背上。

又方：石上菖蒲濃煮，浴兒。（三四時亦佳也）。

今按：《集驗方》：桃葉二七枚按心上，艾灸葉上十四壯。

《葛氏方》云：恆山四分，小麥三合，淡竹葉切一升。上，以水三升，煮取一升，服之。（今按：《產經》云：兒生四十餘日至六十日者，分三服，或至百日服二合半，或於二百日一服三合。）

《產經》云：師左手持水碗，右持刀子，正面於北兒曰：北斗七星，主知一切死生之命，屬北斗之君王某甲病瘧，勿令流行。誦三遍訖，禹步就病兒前，令視碗中，師則吐呵，以其持刀刺碗中兒影，急急如律令，勿令及顧。甚秘驗，過病發後取刀子。（《范汪方》同之。）

又法：頭面胸背上皆筆作“天公”字，胸上書作咒曰：太山之下有不流水，上有神龍，九頭九尾；不食餘物，正食瘧鬼，朝食一千，暮食五百，一食不足，遣我來索。瘧鬼聞之，亡魄走行千裡。用朱書之。

### 治小兒傷寒方第九十六

《產經》云：治小兒傷寒頭痛方：

生葛汁(六合) 竹瀝(六合)  
凡二物，相不(和)煮，兩三歲兒，分三服。

#### 治小兒猝死方第九十七

《葛氏方》：治小兒猝不知何所疾，痛而不知人，便絕死方：

取雄雞冠血，臨兒口上割，令血出，瀝兒口，入喉便活。

《子母秘錄》：鹽湯極鹹，作服一升，取吐即活。

又方：熱湯和灰擁封之即活。

《范汪方》：熱馬屎一丸，絞取汁吞，兒下喉愈。

#### 治小兒注病方第九十八

《病源論》云：注之言住也，謂其風邪氣留人身內也。

《千金方》云：取灶突中灰三指撮，鹽末等服之。

#### 治小兒數歲不行方第九十九

《病源論》云：小兒生，自變蒸至於能語，隨日數血脈骨節備成。其髓骨成則能行，骨是髓之所養。若稟生血氣不足者，即髓不死強，故其骨不即成，而數歲不能行也。

《千金方》：取喪家未閉戶時，盜取其飯以哺兒，不過三日即行，勿令人知之。(今按：《短劇方》取束哺之，日三便起。)

#### 治小兒四、五歲不語方第百

《病源論》云：人之五臟有五聲，脾之聲為言，小兒四五歲而不能言者，內在胎之時，其母猝有驚怖，內動於兒臟，邪氣乘其脾，使脾氣不和故也。

《千金方》：灸足兩踝上三壯。

又方：末赤小豆，和酒塗舌下。

#### 治小兒無辜方第百一

《病源論》云：小兒面黃發直，時壯熱，飲食不生肌膚，積經日月，遂致死者，謂之無辜。言天上有鳥，名無辜，晝伏夜游，兒洗小兒衣席，露之經宿。此鳥則飛從上過，而取此衣與小兒著，並席與兒臥，便令兒著此病也。

《崔侍郎方》：以酢煮大黃末為丸，服之甚驗

### 治小兒大腹丁奚方第一百二

《病源論》云：小兒大腹丁奚病者，由哺食過度；而脾胃尚弱，不能磨消故也。其病腹大、頸小、黃瘦是也。

《葛氏方》：取生韭根，搗，以豬膏煎，稍稍服之。

又方：熟炙鼠肉若伏翼肉，以哺飲之。

《蘇敬本草注》云：牛臍中毛燒服之。

《錄驗方》：甘草十八分。一物下篩，蜜和為丸。一歲兒服如小豆粒二十九，日二三，不妨食及乳，服盡更合。

### 治小兒霍亂方第一百三

《病源論》：小兒腸胃嫩弱，因解脫逢風冷，乳哺不消，而變吐利也。或乳母觸冒風冷，食生冷物，皆冷氣流入乳，飲之亦成霍亂。牛涎灌口中一合也。

又：熱牛屎汁含之。

又方：研□ 滓乳上服之三刀圭，日三。（出《千金方》。）

《產經》：人參湯方：

人參（四分） 濃朴（二分） 甘草（二分，炙） 白朮（三分）  
凡四物，以水一升二合，煮取五合，五日兒服一合，百日兒分三服之。

《千金方》治小兒吐利方：

亂髮燒之二分，鹿角一分，末，米汁服之三刀圭，日三。

《錄驗方》：煮濃朴服之。

又方：煮梨葉服之。

#### 治小兒泄利方第一百四

《病源論》云：甚冷氣盛，利甚為洞泄，洞泄不止，為注下。

《千金方》：小兒洞泄下利方：

炒倉米，末，服之。

又方：石榴石榴燒末，服一錢七，日三。

《產經》云：小兒洞利，晝夜不止。黃芩丸方：

黃芩(二分) 乾薑(二分) 人參(二分)

下篩，蜜丸如大豆，服三丸，日三。

《錄驗方》治小兒患利腹內不調方：

薤白(切，七合) 人參(切，八分) 濃朴(四分，切) 粟(三合)  
凡四物，以水四升，煮取二升，稍飲之。

《葛氏方》下利不止方：

末赤小豆，和苦酒塗踐下。

又方：豬肉炙哺之。

《本草拾遺》云：食菰烏郁甚良。

#### 治小兒白利方第一百五

《病源論》云：凡利色青白黑皆為冷色，黃赤色，是熱也。

《產經》云：治小兒白利：灸足內踝下骨際三壯，隨兒小大增減。

《子母秘錄》云：治小兒冷利方：

濃朴 人參(各四分)

以醋漿半大升，煮取二合，母含吐與之。

## 治小兒赤利方第百六

《龍門方》：孩子赤利方：

薤白(切，三合) 梔子(七枚) 香豉(二合)  
水二升，煎取六合，去滓，分三服之。

《博濟安眾方》藍青汁五合，分服。

## 治小兒赤白滯下方第百七

《千金方》：搗石榴汁服之。

又方：蜂房灰服之。

又方：鯉魚一頭，燒末服之。

又方：燒骨末服之。

《極要方》：薤白一把，香豉一升，水三升，煮取一升，(分)三服之。

《本草拾遺》云：鯽魚膾主水穀不調，下利。

又方：柿，小兒食之，止下利。

《產經》云：龍骨三兩，研如米粒，以水三升，煮取一升五合，服。(多少任意。)

又方：大棗三十枚，以水三升，煮取二升，去滓，熱服之。

《子母秘錄》云：孩子赤白利方：

犀角一兩，甘草二兩，以水一大升，煮取一大合，飲多少。

## 治小兒蠱利方第百八

《產經》：治小兒蠱利血尿方：

取生地黃汁一升，分四五服之。

《千金方》云：蠱利以蠱法治之，其方在治蠱毒方中。藍青汁一合，分四服之。

### 治小兒大便不通方第九

《病源論》云：小兒大便不通者，腑臟有熱，乘於大腸故也。

《葛氏方》：取蜂房熬末，以酒若水，服少許。

又方：以白魚蟲磨臍下至陰。

### 治小兒小便不通方第十

《葛氏方》：取衣中白魚蟲，塗臍中，納尿道中（橫骨又佳也）。

又方：取故席多垢者，銼一升，以水三升，煮取一升，去滓，飲之。

《千金方》車前子半升，小麥一升。二味煮為粥服，日三。

又方：葵莖子久在一升，水四升，煮取一升，納滑石一分，研服半合，日三。

《子母秘錄》治小兒尿不通符：

□ 墨書臍下，亦朱書甚驗。

《效驗方》蒲黃，滑石各一分，下篩，以酒服方寸匕，日二。

《產經》治小兒未滿十日（腹滿）煩不得小便方：

燒蜂房服之。

又方：蒲黃一升，以水和，塗橫骨上良。

《短劇方》治少小小便不利，莖中痛欲死方：

牛膝大把無多少，煮作飲，飲之立愈，有驗。

### 治小兒大便血方第十一

《葛氏方》大便血方：

刮鹿角作屑，以米汁服五分七。(日三四之。)

又方：燒鵲巢為屑，飲之少少許。

《千金方》大便竟出血方：燒甑帶末塗乳飲之。

又方：燒車 一枚赤，納一升水中，分二服。

《僧深方》茅根二把，以水四升，煮取二升，服之。

### 治小兒小便血方第一百十二

《產經》云：小便血方：

末龍骨，溫酒服方寸七。

又方：煮大麻根飲之。

又方：煮白 根飲之，多少任意。

《千金方》小兒尿血方：

燒鵲巢灰，井花水服之。

### 治小兒淋病方第一百十三

《病源論》云：少兒淋者，腎與膀胱熱也。其狀小便出少起數，小腹急痛引臍是也。

《千金方》：車前子一升，水四升半，煮取一升半，分三服。

又方：滑石水煮服之。

又方：蜂房，亂髮分等燒末，水服兩錢七。

《效驗方》陳葵子一升，水二升，煮取一升，分三服之。

《短劇方》治少小淋瀝，形羸不堪，大湯藥者：枳實三兩，炙，篩，兒三歲以上服方寸七，兒小以意稍服之。有驗。

《僧深方》云：車前子，滑石分等，冶篩，麥粥清和，服半錢匕。

《產經》治少小石淋方：

蜂房(一分)，炙 桂心(一分)

凡二物，冶篩，服一刀圭，以銅器承尿，尿與石俱出。

#### 治小兒遺尿方第一百十四

《病源論》云：遺尿者，此由膀胱有冷，不能約於水故也。

《千金方》：灸臍下一寸半，隨年壯。

又方：小豆葉搗汁服之。

《葛氏方》：取燕巢中蓐燒，服一錢匕即瘥。

#### 治小兒身黃方第一百十五

《病源論》云：小兒在胎，其母臟氣有熱，熏蒸於胎；至生兒皆體黃，謂之胎疸。

《千金方》治小兒身黃方：搗土瓜根汁五合服之。

又方：麥青汁服之。

又方：搗韭根汁，滴兒鼻口，大豆許。

#### 治小兒身有赤處方第一百十六

《病源論》云：小兒因汗，為風邪熱毒所傷，與血氣相搏，熱氣蒸發放外，其肉色赤而壯熱是也。

《千金方》治小兒身有赤處者方：

熬米粉令黑，唾和塗之。

又方：伏龍肝、亂髮灰、豬脂，和，塗之。

《葛氏方》：燒牛屎塗之。

又方：雞冠血塗之。

### 治小兒腹皮青黑方第一百十七

《病源論》云：小兒因汗，腠理則開，而為風冷所乘，冷搏於血，隨肌肉虛處停之，則血氣沉澀，不能榮其皮膚，而風冷客之於腹皮，故青黑。

《千金方》治小兒猝腹皮青黑方：

灸臍上下左右，各去臍半寸，並鳩尾下一寸，五處三壯。

又方：酒和胡粉塗上，若不急治，須臾即死。

### 治小兒赤疵方第一百十八

《病源論》云：小兒有血氣不和，肌肉變生赤色，染漸長大無定，或如錢大，或闊三數寸。〔今按：小兒藍注有《病源》死（無）治方。〕

《千金方》：治小兒體有赤疵，赤黑方：摘父腳中，取血貼疵上，漸消。

又方：狗熱屎塗之，皮自卷落。

《產經》云：小兒赤斑駐方：唾、胡粉和，從外向內塗之。

又方：屋塵，臘月豬膏和，敷之。

又方：鐵屎，以豬膏敷之。

### 治小兒癩瘍方第一百十九

《產經》云：治小兒身上癩易方：

石硫黃以苦酒研之，塗病上，日三。（出《產經》。）

又方：生栝藁切一升，以驗苦酒三升，煎取一升汁，塗病上良。此是德家秘方不傳。（出

《產經》。）

### 治小兒疣目方第一百二十

《病源論》云：人有附皮肉生，與肉色無異，如麥豆大，謂之疣子，即疣目也。此多由風邪客於皮膚，血氣變化所生。故亦有藥治之瘡者，亦有法術治之瘡者，而多生於手足。

《千金方》方：以刀子決目根四面，令血出。取患瘡人瘡中黃膿敷之，勿近水，三日即膿潰、根動、自脫。

《產經》：以松脂塗疣上一宿，即落。良。

又方：以礬石拭疣上七過，即去。

又方：艾柱小作，可灸始生疣上三壯，即自去。良。

又方：月晦日於廁前取故草二七枚，拭目上，訖，祝曰：今日晦疣驚去。勿反顧之，不過十日枯死。

今按：俗人以赤莧汁敷之即落，或以煮荒布之汁洗之。

### 治小兒身上□方第二百二十一

《千金方》治小兒體上□方：

取馬尿洗之，日三四度。

又方：揩破以牛鼻津塗之。

### 治小兒身熱方第二百二十二

《病源論》云：小兒血氣盛者，表裡俱熱。則煩躁不安，皮膚壯熱。

《千金方》治少小身熱李葉湯方：

李葉無多少，咀，以水煮，去滓，浴兒。（今按：《短劇方》：避日反陰處。）

《蘇敬本草注》云：梓白皮主小兒熱瘡，身頭熱煩，煮湯浴並散敷之。

《葛氏方》：治小兒猝身熱如火，不能乳哺方：

猝急斷犬耳，取血以塗兒面及身也。

《本草拾遺》云：小兒暴熱，搏（搗）水芹，取汁塗之。

又方：生銀，小兒諸熱，以水磨服，功勝紫雪。

### 治小兒盜汗方第二百二十三

《病源論》云：小兒盜汗者，眠睡而汗自出也。若將養過溫，因於睡臥陰陽氣交，津液發泄，而眠臥汗自出也。

《葛氏方》：以乾薑末一分，粉三分，合以粉之。

又方：石膏一兩，麻黃二兩，蜜和如小豆，服一丸。

《短劇方》：黃連三分，貝母三分，牡蠣二分。凡三物，粉一升，合搗下篩，以粉身。

《集驗方》：麻黃根三分，故扇燒作屑一分。治合乳汁，飲三分七，大人方寸七，日三。（《短劇方》同之。）

### 治小兒隱疹方第二百二十四

《病源論》云：小兒因汗而解脫衣裳，風入腠理。與血氣相搏成之，結聚起相連，成隱疹。風氣止在腠理浮淺，其勢微，故不腫不痛，但成隱疹癢耳。

《千金方》治隱疹方：

鹽湯極鹹，洗，絞蓼塗之。

又方：蠶砂（二升），水（二升），煮，去滓，洗之。

《產經》云：治小兒風瘙隱疹入腹，身體腫強舌乾燥。腫方：

末蕪菁子，酒服方寸七，日三。

《極要方》：芒硝二兩，清酒三升，煮取二升，洗癢上，良。菁子酒服存七日三。

### 治小兒丹瘡方第二百五

《病源論》云：風熱毒客在腠理，熱毒搏於血，蒸發於外，其皮上熱而赤，如塗丹，故謂之丹也。若久不歇，則肌肉爛傷也。

《產經》云：夫丹者，惡毒之氣，五色無常，不即治，轉壞肌肉，治之方；則去膿血。或發於節解間，多斷人四肢，治之方：赤小豆作屑以甘草湯和塗之。

今按：《錄驗方》：和麻油（經溫）塗之。

又方：升麻湯，大黃湯主之。

《錄驗方》治小兒丹毒方：

取甘蕉根敷之，亦宜服少許汁。

又方：搗慎火草敷之。

又方：取白鵝血敷之。

《千金方》搗赤小豆和雞子白塗之。

又方：

牛屎塗之（乾復易）。

又方：伏龍肝下篩，雞子白和油敷之。

又方：和油塗之。

《短劇方》：水中苔搗敷之。

又方：芒硝納湯中取汁拭上。

《新錄方》：水若油研（和）梔子仁，採汁洗之。（取濃汁，洗塗，日二三易）。

又方：生藍汁塗之。

《范汪方》：以生魚血塗之。（《葛氏方》乾更塗之。）

《蘇敬本草注》塗鯉血，良。

又云：搗菜敷之。

又方：煮栗毛殼洗之。

《本草拾遺》云：鯽魚膾，主小兒大人丹毒。

又云：淬鐵水，主小兒丹毒，飲一合，是打鐵槽中水也。

### 治小兒赤游腫方第二百二十六

《病源論》云：小兒有肌肉虛者，為風毒熱氣所乘，熱毒搏於血氣，則皮膚赤而腫起，其風隨氣行游不定，故名赤游腫也。

《千金方》：凡小兒赤游行於體上，不治入腹即死。治之方：

用伏龍肝，末，和雞子白塗，乾易之。

《葛氏方》：糯米研，和粥敷之。

又方：米粉熬唾，和塗之。

《華佗方》云：芸苔搗敷之。

### 治小兒身體腫方第二百二十七

《病源論》云：小兒腫滿，由將養不調，腎脾二臟俱虛也。其狹水腫者，皮薄如熟梨(李)之狀。若皮膚受風，風搏血氣致腫者，但虛腫如吹，此風氣腫也。

《產經》云：少小兒中風，水中身體腫滿浴方：

取香以水煮取汁，以漬浴之。良。

又方：赤小豆煮取汁，漬浴，甚良。

《千金方》云：小兒手足身體腫方：

以小便溫漬之，良。

《僧深方》云：少小手足身體腫方：

取鹹菹汁溫漬之。汁味盡易。

### 治小兒惡核腫方第二百二十八

《產經》：治小兒惡核腫，壯熱欲死，升麻湯方：

升麻(一兩) 夜干(半兩) 沉香(一分) 黃芩(一分) 丁子(三銖)  
凡五物，切，以水一升五合，煮取六合，分三服，一歲兒一服半合，隨兒大小，增減水藥，神驗。

### 治小兒瘰方第二百二十九

《產經》云：治小兒瘰癧如梅李海藻酒方：

海藻一斤，切，以酒二斗漬之，稍稍飲之。

### 治小兒諸方第三百十

《產經》云：治小兒諸方：

以大膏和胡粉磨瘡，良。

### 治小兒瘦方第三百十一

《產經》云：治少小瘦瘰癧，久年不瘥海藻酒方：

海藻一斤，去鹹，切，好酒二斗漬，服二合，日二三，酒盡滓干作散，服方寸七。

### 治小兒附骨疽方第三百十二

《產經》云：凡小兒有附骨疽者，招抱才近其身，便大啼喚，即是肢節有痛處，或四肢有不欲動搖，如不隨狀。治之方：初得即服漏蘆湯下之，敷小豆薄。

### 治小兒疽方第三百十三

《產經》云：凡疽喜著指，與代指相似，人不知不忽治，其毒入臟，殺人。更審之，疽著指端者，先作黑，痛入心也。先刺指頭，去惡血，以艾灸七壯，良。

又方：服犀角汁，佳。

又方：服升麻汁。

又方：服葵根汁。

又方：服竹瀝汁。

又方：服藍青汁。

### 治小兒代指方第三百三十四

《產經》云：代指者，先腫，欣欣熱色不黯也。然後緣爪甲結膿，劇者脫爪也。治之方：甘草湯熱漬之。

又方：芒硝汁漬之。

又方：刺去血，漬熱湯。

又方：以豬膏和鹽熱納指甲，須臾即安。若已膿者，針去膿血。

### 治小兒疥瘡方第三百三十五

《病源論》云：饒蟲多變化所作，其瘡裡有細蟲，甚難見。小兒因乳養之人疥而染著。

《千金方》：燒竹葉末，和雞子白敷，日二三。

又方：酥和胡粉塗之。

又方：亂髮灰和臘月豬脂敷，之。

《產經》：蜀椒五合，搗末，以水一斗，煮三沸，去滓，溫洗浴，良。食頃良，若癢不止，複漬之。食頃良。

### 治小兒癬瘡方第三百三十六

《病源論》云：癬瘡由風邪與血氣相搏為癬。小兒面上生癬謂之為乳癬，言乳汁潛穢兒面而生，仍以乳汁洗之便瘥。

《產經》：凡癬不搯破上皮而藥塗者不除，用黑毛牛矢溫洗之。良。

又方：末桃白皮，以苦酒和塗之。

又方：胡粉熬令黃色，和酢塗上，燥複塗，良。

《千金方》濕癬方：

桃青皮，搗，和酢塗之。

又云：乾癬方：枸杞根，搗，以豬脂和敷之。又以醋和佳。

《集驗方》以水銀合胡粉敷之。

又方：蛇床子末和白膏敷之。

### 治小兒浸淫瘡第三百三十七

《病源論》云：小兒五臟有熱，外為風濕所折，發瘡。

《千金方》：灶中土二分，髮灰一分，末，下篩，豬脂和敷之。

《產經》：取牛屎，絞取汁，塗之。

又方：以乾牛屎燒熏，良。

又方：胡燕巢，末，和水敷之。

### 治小兒瘡方第三百三十八

《病源論》云：者，風濕搏於血氣所成，多著手足節腕間匝匝然，搔之癢痛，浸淫生長，呼之為，以其瘡有細蟲，如蝸蟲。

《產經》治小兒大人蝸疥百療不瘥方：

地榆(五兩) 棟實(一升) 桃皮(五兩) 苦參(五兩)

凡四物，以水一斗，煮取五升，溫洗良，並治癬。

又方：谷樹白皮一合，臘月豬脂一合，苦酒二合，小蒜半合，釜下土半合。凡五物，搗如泥，以敷上，密裹，乾複塗之。

### 治小兒王灼瘡方第三百三十九

《病源論》云：腑臟有熱，熱熏皮膚，外為濕氣所乘，則變生瘡。其熱偏盛者，其瘡發熱亦盛。初生如麻子，須與王大，汁流潰爛，如湯火所灼，故名王灼瘡。

《千金方》：小兒王灼瘡者，一身盡有如麻子小豆者，戴膿汁出，乍痛乍癢乍熱方：

又方：桃仁熟搗，和面脂，塗之。

又方：牛□ 灰敷之。

又方：燒艾灰敷之。

《產經》治小兒黃爛瘡方：

黃連 胡粉

上二物，治下篩，分等，以麻油和塗之。

### 治小兒月蝕瘡方第四百十

《病源論》云：小兒耳鼻口間生瘡，其謂月食瘡，其瘡隨月生死，因以為名也。世云：

小兒見月初生，以手指指之，則令耳下生瘡，故呼為月食瘡也。

《千金方》：治小兒疥月蝕月死方：酥和胡粉塗之。

又云：月蝕九竅皆有者方：

又方：燒蚯蚓令赤，屎末和膏敷之。

《葛氏方》：以五月五日蝦蟆屑和膏敷之。

《產經》：取蘿摩草汁塗上。

又方：銼槐枝煮取汁洗之。

《龍門方》：豬脂和杏仁敷之。

《徐之才方》：小柏皮搗為末敷之。

### 治小兒凍瘡方第四百十一

《病源論》云：小兒冬月，為寒氣傷於肌膚，寒氣搏於血氣，血氣壅澀，因即生瘡，其瘡腫而難瘥，乃至皮肉爛，謂之為凍瘡(爛)瘡。

《產經》云：小兒冬月涉水，凍手足，瘡壞疼痛方：

取麥蘘，煮(令濃)熱，洗漬之(即愈)。

又方：櫟木灰和熱湯(取汁，清)洗之，良。

《千金方》：生胡麻搗敷之。

### 治小兒漆瘡方第四百十二

《病源論》云：人無問男女大小，有稟性不耐漆者，見漆及新漆器，便著漆毒，令頭身面體腫，起隱疹色赤，生瘡癢痛是也。

《產經》云：治小兒犯觸漆器，面目皆腫，身體作瘡，爛方：

嚼□塗之。

又方：芒硝若礬石一一著鹽湯中令消，以洗之。

又方：煮柳葉洗之。

又方：搗薤以塗之。

### 治小兒蠟尿瘡方第四百十三

《千金方》搗梨葉敷之。

又方：燕巢土酢漿和敷，乾，易。

《產經》云：初得便以犀角水磨塗上。

又方：鹿角燒末，苦酒和敷之。

又方：小豆屑苦酒和敷之。

又方：大麥飯嚼敷之。

又方：胡粉以生油和塗之。

#### 治小兒惡瘡久不瘥方第一百四十四

《病源論》云：夫身體生瘡，皆是臟熱沖外，外有風濕相搏所生。而風濕之氣有挾熱毒者，其瘡則痛癢腫，久不瘥，名為惡瘡。

《產經》燒蛇蛻末，以豬膏和敷之。

又方：豆豉熬(令黃)，末，敷上。

《集驗方》：浣其父，取汁，以浴兒，勿令兒及母知，大良。

《葛氏方》燒亂髮並釜月下土，豬膏和敷之。

又方：梁上塵敷之。

又方：黃連、胡粉、水銀末，和敷之，若瘡燥，和豬肪敷之。

《隨時方》：取桑樹孔中水洗之，立瘥。

《范汪方》：燒雞屎敷之。

《本草拾遺》云：廁中泥敷之。

#### 治小兒金瘡方第一百四十五

《病源論》云：小兒為金刃所傷，謂之金瘡。

《產經》云：以灶灰敷瘡中。

又方：馬屎燒末，著瘡中。

又方：燒綿末，著瘡孔中。

又方：燒青布煙絕敷之。

今按：地菘敷之。

#### 治小兒湯火灼瘡方第一百四十六

《千金方》：熟煮大豆濃汁，溫塗之，無瘢。

又方：白蜜塗，日十遍。（《僧深方》：十餘口之。今按：《經心方》：以蜜解，冷水飲之。）

今按：《經心方》以蜜斛（解），冷水飲之。

《產經》：石膏末敷之立止。

又方：桑灰水和敷之。

#### 治小兒竹木刺方第一百四十七

《產經》治小兒竹木刺及針不出方：

燒鹿角末水和塗瘡口立出，不過一夕，良。

又方：生牛膝根搗敷瘡口，令自出。

又方：嚼白梅，烏梅敷之，水和塗之。

又方：王不留行，瞿麥隨在，服方寸匕，日三，自出。

#### 治小兒落床方第一百四十八

《葛氏方》：治小兒落床墮地，腹中有瘀血、壯熱、不欲乳哺、啼喚方：

大黃 黃連 蒲黃（各二分） 芒硝（一分半）

以水二升，煮取一升，去滓，納芒硝，分二三服，當大小便去血。（《產經》同之。）

#### 治小兒食不知飽方第一百四十九

《病源論》云：小兒有嗜食，食已仍不知飽足。又不生肌肉，亦腹大，其大便數而多（泄，又呼為豁泄），此腸胃不守故也。

《千金方》治小兒食不知飽方：

鼠屎二七枚，燒末服之。

### 治小兒吐食方第一百五十

《千金方》：取肉一斤，繩系曳地行數裡，勿洗，火炙啖之，良。

### 治小兒吐血方第一百五十一

《病源論》云：小兒吐血者，是有熱氣盛而血虛，熱乘於血，血性得熱則流散妄行，氣逆即血隨氣上，故吐血也。

《千金方》：油三分，酒一分，和，日再服之。

### 治小兒咳嗽方第一百五十二

《病源論》云：小兒咳逆，由乳哺無度，因挾風冷，傷於肺故也。

《產經》治少小十日以上至五十日猝得□咳，吐乳，嘔逆。晝夜不息方：

牡桂(三分) 甘草(十分) 紫菀(三分) 麥門冬(七分)

凡四物，以水二升，煮取半升，以綿著湯中，漉兒中口，晝夜四五過與之，即乳哺。

《千金方》云：主小兒大人咳逆短氣，胸中吸吸，吐出涕唾。出臭膿方：

燒淡竹瀝，煮十沸，小兒一服一合，日五。大人一升，日五。今按：大棗丸尤驗。(其方在第九卷大人方。)

《張文仲方》云：孩子咳嗽宜與乳母藥方：

竹葉(切一升) 石膏(碎) 乾薑(各四兩) 貝母(三兩) 紫菀 百部根(各二兩)  
上六物，切，以水八升，煮取二升六合，分三服，但乳母禁食蒜面。

《新錄方》治小兒嗽方：

飲服紫菀末。

《僧深方》云：款冬花丸治小兒咳嗽方：

款冬花(六分) 紫菀(六分) 桂心(二分) 伏龍肝(二分)  
上四物，下篩，蜜和如棗核，著乳以日三夜二。(今按：以大棗丸治之尤驗，其方在大人方中。)

### 治小兒食魚骨哽方第一百五十三

《產經》云：治小兒食魚骨哽方：以大刀環磨喉二七過，良。

又方：燒魚骨末，以水飲之良。

又方：仍取投地魚骨著耳上，因□咳之即出。

又方：燒鷓鴣羽，末，以水服之，即出。

### 治小兒食肉骨哽方第一百五十四

《產經》云：治小兒食諸肉，骨哽方：

狸骨末服方寸七，良。

又方：取雄雞左右翮大毛各一枚，燒末，服一刀圭。

### 治小兒食草芥哽方第一百五十五

《產經》云：治小兒飲食過草介，雜物哽方：

以好蜜少少咽之。

又方：末瞿麥，服方寸七。

又方：以豬膏和雞子吞之，不去複吞兩三過，良。

### 治小兒飲李、梅輩哽方第一百五十六

《產經》云：治小兒吞李、梅之輩。塞咽不得出方：

以水灌兒頭上，承取汁，與飲之良。(《葛氏方》同之。)

### 治小兒食發繞咽方第一百五十七

《產經》云：治小兒食發澆咽方：

取梳頭髮燒末，服一錢匕。（《極要方》同之。）

#### 治小兒誤吞錢方第一百五十八

《產經》云：治小兒誤吞錢方：

搗炭服方寸匕。

又方：服蜜一升即出。

又方：艾一把，以水五升，煮取一升，頓服之，立下。

#### 治小兒誤吞針方第一百五十九

《千金方》治小兒誤吞針方：

吞磁石棗大，立出。（今按：《產經》云：末，少少服之。）

《產經》云：小兒誤吞針、箭、金鐵物方：

多食肥羊脂肉及諸肥物，自裡出之。

#### 治小兒誤吞釣方第一百六十

《產經》云：治小兒誤吞釣鉤緒若在手中莫引之方：

以珠若薏苡子，貫著繩，稍稍推，令至釣處，少少引之，即出之。

#### 治小兒誤吞方第一百六十一

《產經》云：治小兒誤吞方：

取韭，曝令萎，煮，不切，食多大束。

又方：多食白糖，自隨出之。

#### 治小兒誤吞方第一百六十二

《產經》云：治小兒誤吞若驅方：

燒鷹羽數枚，末服之，家所養鵝羽亦可用之。

### 治小兒誤吞竹木方第六十三

《產經》云：治小兒誤吞竹木方：

取布、刀、故鋸，燒染酒中。以女人大指爪甲二枚燒末，納酒中，飲之良。

醫心方卷第二十五

《候水鏡圖》云：治小兒瘡於大人異。

治大丹方：

蕎麥面 黃鹽(各少許) 水銀 牛乳(各少許)  
上，同研令極細，塗之便瘥。

治赤斑瘡方：

土龍子(一條) 赤小豆(少許) 牙屑(六分) 薰陸香(少許加，無以鬱金代之)  
上物，細研，以新汲井水調灌之立瘥。

治豌豆瘡方：

干漆(炒斷煙) 人中白 瓦松灰(各少許) 馬牙硝(一分)  
上，並研令細，空心，冷漿水調一錢，溫服之，取吐為度。吐了又服一錢，利  
三五行，其瘡自瘥。

治小兒急疳痢瀉不止，或濃，或血，或青，或黃發作穗，或頭發墜落，鼻乾，  
咬指，吃炭，吃壁土，金髓散方：

黃連一兩，(宣州者為末，用雞子一個取清和連末作餅子，炙焙) 石中黃(一  
分) 禹余糧 麝香 朱砂(各少許) 烏頭[二個，生，去臍尖 肉豆[一介  
(個)] 訶子[二介(個)，去核] 金牙石(一分)  
上件物，並為散，空心，以米飲下，一歲兒一字，五歲一錢，忌熱物。

治小兒紫疳，面模黑色，身上或生青斑、紫斑，鼻內生瘡，腦陷，手背、腳背  
虛腫。不脫肛，不腦陷即榷醫。宜服竹天黃丸方：

天竹黃(小一分) 朱砂(一小分) 巴豆(一粒, 去皮心) 膜麩(炒壓出油) 麝香(小許) 烏頭(一顆, 生去臍尖)

上五味, 細研為末, 以蟾酥為丸如黃米大, 一歲兒一丸, 空心溫米飲下如吃奶奶汁下。忌熱面, 毒魚及一切熱物, 不忌冷物。